

San Juan

Ñu waïcugũ ipũre gojadigu Jesucristore ïamuriñumi. Jesucristo i yebare buhecũ Ñu ïgu buhegu ármuriñumi. Eropigu Jesu sïridigu masa muria ïgu Pagu pohro muriara pũhrugue Ñu ipũre gojañumi.

Cristo masu ta árĩnugañumi

¹ Negohraguere i yeba árĩboro coregue ta Cristo mata árĩmũhtamurituhapũ. ïgu Goãmu mera árĩpũ. Eropigu ïgu Goãmu ta árĩcãgu iipũ.

² Matague ta Cristo Goãmu mera árĩpũ.

³ Eropigu i yebare, umũsire árĩpehrerire ïhacũnugudorepũ Goãmu ïgure. Eropigu masa sãre ïhacũnugudorepũ ïgure. Eropigu irire ïhacũnugupehopũ ïgu Jesucristo. Eropiro irire ïgu ïhacũnugupehobiricũ i ne mariboya.

⁴ Cristo ojocaririre ogũ áhrimi. Boyocũ mari mari basi ôaro mari ïha masiro dopa ta, ïgu mari Pagure ôaro ïha masicũ iimi marire. Eropigu i yebare eragu mari Pagure masicũ iimi masare.

⁵ I yeba majarã erã guñaricuri naitĩaro iro dopa ñeri áhraa. Jesucristo boyogoro dopa ta masa pohro eragu erã Goãmu yare masicũ iimi. Eropiro naitĩariñe, boyoriñere ne tarinugabiro dopa ta Cristore ñeripũ ne tarinugabiriyoro.

⁶⁻⁷ Goãmu Ñu waïcugũpure obeomũhtapũ Cristore quere aĩgã weremũhtadoregu. ïgu

obeodigu Ñupũ eraa guare masare Cristo ñgu ariburire weremi.

⁸ Ñupũ Cristo árĩbirimi. Eropã árĩbiriqueregu ta ñgu Cristore masare wereyumũhtagũ árĩmi.

⁹ Cristo boyogoro dopa ta árĩgu árĩpehrerã masare Goãmũre masicũ iibu i yebaguere aridigu árĩmi. Diaye ta ãhraa. Ñgu masare masicũ iigu ta ãhrimi.

¹⁰ Eropigu Cristo i yebare árĩdigu árĩrimi. I yebare ñhacũnugudigu árĩpũ. Ñgu eropa árĩquerecũ ta i yeba majarã ñgure ne ñha masibirinirã árĩma.

¹¹ Ñgu ya yeba ñgu masa dehyoadigu árĩrimi. Ñgu ya yeba ñgu masa dehyoadigu árĩquerecũ ta ñgu ya yeba majarãpũ ñgure ne gamebirinirã árĩma.

¹² Erã eropa gamebiriquerecũ ta árĩpehrerã ñgure gamerãpũre erãre Goãmũ ñgu porã árĩcũ iimi. Ñgure umupeorãre árĩpehrerã Goãmũ ñgu porã árĩcũ iimi.

¹³ Erã Goãmũ porã ta ãhrima. Eropirã masa erã gamero Goãmũ porã wabeama. Goãmũ gamero mera ñgu porã wahama.

¹⁴ Eropigu Cristo ñgu masũ ñgu árĩnũgara pũhrũ mari mera árĩmi ñgu. Ñgu eropa árĩcũ ñarã masare mahigu, diaye majare ñgu wereniguigu árĩcũ gua masibũ. Ñgu dihta Goãmũ magũ árĩgu turagu árĩmi. Ñgu eropa árĩgu árĩcũ gua masibũ.

¹⁵ Ñu waĩyegu ñgu buherogue Cristo eracũ ñha õpa arĩ gaguiniguimi guare weregu:

—Siĩ ahrimi yũ mũare weredigu. Ñgu yũ pũhrũ masa dehyoadigu ãhrimi. Eropã

árĩqueregu ta yu tauro turagu áhrimi. Ĩgu yu masa dehyoaboro coregue árĩtuhapu. Eropigu ĩgu yu tauro áhrimi. Yuhu mũare eropa arĩ weredigũ ta áhrimi ihĩ, arĩmi Ñu guare.

¹⁶ Ĩgu Cristopũ ðagu turaro masare mahigu árĩgu marire árĩpehrerãre ðaro iiniguicãmi.

¹⁷ Goãmu dorerire Moisepu apimũhtapu marire. Jesucristopũ Goãmu masare ĩgu mahirire buhegu árĩmi. Goãmu ĩgu diaye wereniguiiri sãre buhegu árĩmi ĩgu.

¹⁸ Masa ne Goãmure ĩabeama. Ĩgure mari ĩabiriquerecũ ta ĩgu magu ĩgu turaro mahigu yujugu ta árĩgupũ ĩgu Pagure marire masicũ iimi.

Gajirã Ñu waĩyegure serẽpiñuma

Mt 3.11-12; Mr 1.7-8; Lc 3.15-17

¹⁹ Judio masa oparã Jerusalén árĩrã pahiare, Goãmu wihi mohmerã sãre Ñu pohrogue obeoñorã. “¿Nihino áhriri mũhu?” arĩ serẽpidorerã obeoñorã erãre. Erã eropa arĩ serẽpirã ejacũ ðpa arĩ weremi Ñupu.

²⁰ Ne yayaro mariro weremi. Diaye ta werepehocãmi guýaro mariro.

—Yuhu Cristo Goãmu ĩgu masare taudoregu ĩgu obeodigu árĩbeaa, arĩmi ĩgu.

²¹ Ĩgu eroparĩcũ erãpu ĩgure dipaturi serẽpima daja:

—¿Mũhu Cristo árĩbigu Eliapu áhriri? arĩma.

—Árĩbeaa yuhu, arĩmi ĩgu.

—¿Gua coredigu Goãmu yare weremũhtagupu áhriri mũhu? arĩma erã.

—Árĩbeaa yuhu, arĩmi Ñu.

²² Īḡu eroparīcũ erã ĭḡure dipaturi serēpima daja.

—Guare serēpidorenirãre gua ðaro wereboro dopa guare wereque daja. ¿Nihinopu āhriri muhũ? ¿Dohpa árĭḡuno āhriri muhũ? arĩma erã Ñure.

²³ Erã eroparīcũ ðpa arĩ yuħrimi:

—Masa mariroḡe ðpa arĩ gaguiniguḡu āhraa yuħu. Goãmu ya weremuhtadigu ĩsaia muru ĭḡu werediro dopa ta werea yu sã: “Mari Opu ĭḡu ariboro core ðarã árĭyuque ĭḡure peemorã,” arĩ masare wereyu gaguiniguḡu āhraa yuħu, arĩmi Ñu erãre

²⁴ Ñure serēpirã fariseo masa erã obeonirã árĩma.

²⁵ Eropirã erã Ñure serēpima daja:

—¿Muhũ Cristo, Elia Goãmu ya weremuhtagu gua coreḡu árĭbiriquereḡu ta duhpigu masare Goãmu ya árĭburire waĩyeri muhũ? arĩma erã.

²⁶ Erã eroparīcũ yuħrimi ĭḡu.

—Yu deco mera masare Goãmu ya árĭburire waĩyea. Gajigupu mua masibigupu mua watope árĭtuhami.

²⁷ Īḡupu yu puħru arigu yu tauro turagu āhrimi. Ōatariagu āhrimi. Īḡu iro dopa árĭbeaa yupu. Eropigu ĭḡure pepigu, “Bu árĭḡu āhraa yuħu,” arĩ pepia, arĩmi Ñu erãre.

²⁸ Eropa arĩ wereniguima erã Betaniague, dia Jordán waĩcũriya gajipu maseḡe, Ñu ĭḡu masare ĭḡu waĩyeroḡe.

—Jesu Goãmu ĭḡu obeodigu cordero iro dopa āhrimi, arĩ wereñumi Ñu masare

²⁹ Gajinu Jesu Ñu pohro igu aricũ ñagu Ñu òpa arĩmi guare:

—Ñaque. Ihĩ Goãmũ igu obeodigu igu cordero iro dopa ãhrimi. Cordero mari ñeri iira dipuwajare sĩriro dopa ihĩ sĩrigu i yeba majarãre erã ñero iirare cóãgucumi igu.

³⁰ Ihĩ ta ãhrimi yu òpa arĩdigu: “Yu pũhrũ arigu yu tauro turagu ãhrimi. Yũhũ masa dehyoaboro core igu matague ta árĩtuhapũ. Eropigu igu yu tauro turami,” yu arĩdigu ihĩ ta ãhrimi.

³¹ Yũpũ ñre Goãmũ magu igu árĩñire masibirinibũ. Eropa masibiriqueregũ ta deco mera waĩyegũ arigu iibũ yu acawererã Israe masa ñre erã masiborore, arĩmi Ñu.

³² Eropa arĩtuha Ñu werenemomi:

—Espíritu Santo umarogue buja iro dopa bejagu Cristo weca dijarimi. Ñgu weca igu dujanugacũ ñabũ.

³³ Ñgu weca dujanugajacũ ñha ñgure ñha masibũ. Ñgu yure masare deco mera waĩyedore obeodigu Goãmũpũ òpa arĩ weremũhtatuhami yure: “Espíritu Santo dijari ñgu weca dujanugajagu ñgu ta árĩgucumi. Ñgupũ Espíritu Santore masa mera eropa árĩñiguicũ iigu árĩgucumi,” arãmi Goãmũ yure. Ñgu yure eropa werebircũ ñha masibiriboya ñgure.

³⁴ Dohpaguere ñgure ñha masituhaa yũhũ. Eropa ñha masigu “Diaye ta Goãmũ magu ta ãhrimi,” arãa yũhũ mũare, arĩ weremi Ñu.

Jesu buherã ñgu ne sihunuganirã árĩñuma

³⁵⁻³⁶ Gajinu Ñu mera gua perã ïgu buherã ïgu mera gua niguicũ, Jesu gua pohro tari wahgãgu iimi. ïgu eropa tari wahgãcũ ïagu Ñu dipaturi òpa arĩmi guare:

—Ïaque. Ihĩ Goãmu ïgu obeodigu cordero iro dopa árĩgu ãhrimi, arĩmi Ñu.

³⁷ ïgu eroparĩcũ gua perã ïgu buherãpu irire peerã Jesure nũrsiagãbu.

³⁸ Gua eropa nũrsiagãcũ ïagu Jesu guare maji ïha, serẽpimi:

—¿Nohogue wahari mua? arĩmi ïgu guare. ïgu eroparĩcũ gua sã ïgure serẽpibu.

—Buhegu, ¿nohogue ãhriri muhu? arĩ serẽpibu gua ïgure.

³⁹ —Yu mera arinijarã, ïarã arique, arĩmi guare Jesu.

ïgu eroparĩcũ guapu ïgu árĩroque ïarã wabu. Irisubu ñamicague cuatro hora árĩbu. Eopirã iri ñamire ïgu mera dujabu gua.

⁴⁰ Gua perã Ñure peerã, Jesure nũrsiagãrã yu mera majagu Andre mera árĩbu. Andrepu Simo pagu magu arĩmi.

⁴¹ Eropigu ïgu mata ïgu tĩgure ahma boca, òpa arĩ werepu ïgure:

—Mesiare Goãmu marire taubure Goãmu ïgu obeodigure bocabu gua, arĩpu Andre Simore. Mesia ero majarã ya mera arĩrã, Cristo arĩrã iima.

⁴² Eropa arĩtuha ïgu Simore Jesu pohro aĩgãmi. ïgu pohro erã ejacũ ïagu Jesupu Simore òpa arĩmi:

—Muhũ Simo waĩcũgu Jona waĩcũgu magũ ãhraa. Dohpaguere mũre Cefa waĩyegũra, arĩmi Jesu Simore. Cefa ero majarã ya mera arĩrã, Pedro arĩma. Eropigu Pedro waĩcũmi pare.

Felipere, Natanae sãre sihuñumi Jesu

⁴³ Gajinũ Jesu “Galilea yebague ina warã,” arĩmi guare. Eropigu erogue eja ĩgu Felipere bocatĩri ōpa arĩmi:

—Yũ mera majagu árĩbu arique, arĩmi Jesu.

⁴⁴ Felipepũ Betsaida majagu árĩmi. ĩgu, Andre, Pedro mera yuju maca majarã árĩma.

⁴⁵ Eropigu Felipe Natanaere ahma, boca ōpa arĩ weremi:

—Goãmũ dorerire Moise ĩgu gojarapũgue ĩgu weredigũre, gajirã Goãmũ yare weremuhtanĩrã sã erã weredigũre gua bocabũ. Jesu Nazare majagu José magũ ĩgu ta árĩcumi, arĩmi ĩgu Natanaere.

⁴⁶ —Nazareguere ne yujugu ōagu marimi, arĩmi Natanaepũ.

—Ĭagu arique muhũ, arĩmi Felipe.

⁴⁷ Eropi Natanae Jesu pohro ĩgu ejacũ ĩagu Jesupũ ōpa arĩmi Natanaere:

—Ihĩ dohpague arigu diaye ta ōagu judio masũ gohra ãhrimi. ĩgũre ne gũyari mara, arĩmi Natanaepũre.

⁴⁸ ĩgu eroparĩcũ peegu Natanae ĩgũre serẽpimi:

—¿Duhpigũ yũre ōaro masiri muhũ? arĩmi.

—Felipe, ĩgu mũre ĩgu sihuboro core, higueraqu doca mũ árĩcũ ĩhabũ yuhũ mũre, arĩmi Jesu ĩgũre.

49 Īgu eroparīcū Natanaepu ōpa arīmi ĭgure daja:

—Buhegu, diaye ta mūhu Goāmū magu ta āhraa. Mūhu Israe masa gua opu árību āhraa, arīmi Natanae.

50 Īgu eroparīcū peegu ōpa arī yūhripu Jesu:

—Higueragu doca yu mure ĩarare masigu yure “Goāmū magu āhraa,” arī umupeoa mūhu yure. ĭIri ta mure umupeocū iiri? Mure yu eropa ĩara tauro Goāmū turari mera yu iicū ĩaguca mūhu, arīmi Jesu Natanaere.

51 Eropa arīgu ōpa arī werenemomi:

—Diaye ta mure arīgu iiaa. Yūhu masu Goāmū ĭgu obeodigu āhraa. Ũmarogue Goāmū yarā anyua erā yu weca erā dijaricū, erā mūriacū sāre ĩaguca mūhu, arīmi Jesu ĭgure.

2

Caná waĩcūri macague erā mojoto diriri bosenugue Jesu ĩagu wañumi

1 Ũhrenu pūhru Caná Galilea árīri macague mojoto diriri bosenu árību. Eropigo Jesu pago iri wihigue árīmo.

2 Jesu gua ĭgu buherā sā erā mojoto dirirogue sihubeonirā árību.

3 Iri bosenu maja vino pehrecū Jesu pago ĭgure weremo:

—Dohpaguere vino pehrea wahabu erāre, arīmo ĭgure Jesure.

4 Igo eroparīcū peegu Jesu ōpa arīmi:

—Meho, ĭduhpigo irire yure wereri mūhu? Masa erā yure masiboro dūhyania dohpa, arīmi Jesu ĭgu pagore.

⁵ Īḡu eroparĩra pũhrũ ĭḡu pagopũ mohme corerãre weremo.

—Yũ magũ ĭḡu dorero dopa ta iique mũa, arĩmo igo.

⁶ Irisubuguere gũa acawererã judio masa Goãmũ yare iimorã masare erã dũpũre eropa coeniguicãdorema. Eropi iri wihi seis gohra máta sorori, deco dicuri sorori árĩbũ. Iri deco Goãmũ yare iimorã erã coeri deco árĩbũ. Iri soroburire ochenta o cien litros sihajabũ decore.

⁷ Eropigũ erã mohme corerãre doremi Jesu:

—I soroburire deco mera pisãnemo ʋjũtu dobopehocãque, arĩmi Jesu.

Īḡu eroparĩcũ erãpũ õaro ʋjũtu dobopehocãma iri soroburire.

⁸ Erã eropa iira pũhrũ Jesu erãre doremi daja:

—Dohpaguere iri decore waa aĩ, sihu bosenu iigure tĩarã waque, arĩmi.

Īḡu eroparĩcũ peerã iri decore waa aĩgã, sihu bosenu iigure tĩama erã.

⁹ Erã tĩacũ ĭḡupũ iri decore vino poyara decore ihriĩami. Iri vinore “¿Noho majare aĩḡarayuri erã?” arĩ pepipũ ĭḡu. Īḡu eropa masibiriquerecũ iḡure mohme corerãpũ iri vinore tĩanirãpũ masima. Sihu bosenu iigu eropa masibirinijagũ, mojoto diridigure sihubeo

¹⁰ õpa arĩ weremi:

—Gajirã masa õari decore vino decore tĩamũhtamũrima. Masa erã õaro ihrira pũhrũ ñequeyari vino decopũre tĩama erã. Mũpũ õari vino decore dihbu, pũhrũgue guare tĩaa, arĩmi sihu bosenu iigu mojoto diridigure.

¹¹ Caná Galilea árĩri macague decore vino ĩgu poyacũ iira ne Goãmũ turari mera ĩgu deyoro moanũgara árĩbũ. Eropa iigu gajirãre ĩgu turarire ii ĩhmũmi Jesu. ĩgu eropa ii ĩhmura pũhrũ gua ĩgu buherã ĩgure umupeobũ.

¹² Pũhrũ Jesu, ĩgu pago, ĩgu pagũ porã, gua ĩgu buherã mera Capernaumgue sihugã wami. Eroque ejarã bajamenũrigã dujabũ gua.

Jesu Goãmũ wihiguere ejañumi

¹³ Pascua árĩcũ gua judio masa bosenu árĩboro merogã duhyanijabũ. Eropigu Jesu gua mera Jerusaléngue wami.

¹⁴ Eroque ejagu ĩgu Goãmũ wihigue ñajajagu, wecuare, ovejare, bujare duarãre bocajami. Eropigu niyeru gohrotorã erã mesarigue erã doacũ bocajami.

¹⁵ Eropa bocajagu yuradari mera tãraridari ii, erãre árĩpehrerãre disiporogue tãranũru wiumi. Eropigu niyeru gohrotorã erã ya mesarire yomemuju mehpicãmi. Erã niyeru turi sãre mehsiripicãmi.

¹⁶ Eropa iituha bujare duarãre õpa arĩmi:

—Mũa yarã bujare aĩgãque. Yũ Pagũ ya wihire doberi duari wihi iibiricãque, arĩmi Jesu erãre.

¹⁷ ĩgu eropa iicũ ĩarã gua ĩgu buherãpũ Goãmũ ya gojarapũ erã arĩrare guñabũ. Õpa arĩ gojanirã árĩma. “Goãmũ, mũ wihire turaro mahia. Eropa mahigu mũ wihire ñero erã iicũ ĩagu turaro bujawerea yũhũ,” arĩ gojarare guñabũ gua Jesu ĩgu buherãpũ.

¹⁸ Jesu ĩgu eropa iira pũhrũ judio masa oparã ĩgure serẽpima:

—¿Duhpigü mûhû oãre Goãmû wihigue árírãre cohã wiuari? Goãmû irire mûre iidoregü árícû Goãmû turari mera ii deyoro moaque gua ïaburire, arĩma erã Jesure.

¹⁹ Erã eroparĩcû Jesu yûhrimi:

—I wihire mua cóãcû, ûhrenû pûhrû tuha-jagûca yûhû, arĩmi Jesu erãre.

²⁰ —Ûhrenû i wihire iisome mûhû. Cuarenta y seis bojori gohra erã iira wihi âhraa i wihi, arĩ yûhrima erã Jesure.

²¹ Jesu ïgû eropa arĩrare erã ôaro pee masi-birima. Jesu i wihire arĩgû ïgû dâpû waburire arĩgû iirimi.

²² Eropi ïgû sîrira pûhrû, ïgû masa mûriara pûhrû gua ïgû buherâpû ïgû eropa arĩrare guñabû. Goãmû yare erã gojarapûre, Jesu ïgû werera sãre guña, “Iri diaye ta âhraa,” arĩbû gua.

Árípehrerã erã guñarire Jesu masiñumi

²³ Pascua bosenu árícû Jesu Jerusaléngue arĩmi. Ero ïgû árícû masa bajarã Goãmû turari mera ïgû deyoro moarire ii ïhmucû ïarã ïgure umupeoma.

²⁴ Erã eropa umupeoquerecû ta Jesu masa erã guñarire ôaro masigû, “Yure eropa umupe-oniguiçãrãcoma,” arĩ pepibiridi arĩmi.

²⁵ ïgû masa erã guñarire ôaro masími. Eropa masigû masa ïgure erã pepirire serëpibirimi.

3

Jesu Nicodemo mera weretamuñumi

¹ Iri maca majagu Nicodemo waĩcuḡu, judio masa oparã mera majagu árĩmi. Ĩḡu fariseo masa ya curu majagu árĩmi.

² Eropigu ĩḡu yuju ñami ĩḡu Jesu pohro ahri ĩḡu mera weretamupũ:

—Buheḡu, muḡu Goãmu ĩḡu buhedoredigu ĩḡu obeodigu mu árĩcũ ḡua masia. Goãmu mure ĩḡu itamubiricũ mupũ ĩḡu turari mera ne deyoro moarire ne iibiriboaya. Muḡu bajasuburi Goãmu turari mera ii ĩhmua, arĩpũ Nicodemo Jesure.

³ ĩḡu eroparĩcũ Jesu werepũ:

—Diaye mure arĩḡu iiaa. Ne masa dehyoagu iro dopa dipaturi masa dehyoagu dihta Goãmu yagu árĩmasimi. Mu sã eropa ta árĩmasia, arĩpũ Jesu.

⁴ —Yaho. ¿Buḡupũ dohpa ii dipaturi masa dehyoabocuri ĩḡu? ĩḡu pago niji suhriroguere ñajaa, dipaturi masa dehyoa masiya mariboca ĩḡure, arĩpũ Nicodemo.

⁵ ĩḡu eroparĩcũ Jesu yuhripũ:

—Diaye ta arĩḡu iiaa mure. Ne masa dehyoagu iro dopa ta deco mera, Espíritu Santo ĩḡu turari mera dipaturi masa dehyoagu dihta Goãmu yagu árĩmasimi.

⁶ Nome nijipo sã nome árĩrã, majirãḡare masa dehyoacũ iima. Espíritu Santopũ masare Goãmu porã árĩcũ iimi.

⁷ “Ne masa dehyoagu iro dopa ta dipaturi masa dehyoagu dihta Goãmu yagu árĩmasimi,” yu arĩcũ ne pee gorowerebita.

⁸ Espíritu Santo masare Goãmu porã ïgu iicũ iiri mĩruñe iro dopa ãhraa. Miruñe iri arirogue ahraa. Iri ariro caricũ mari peea. Eropa peequererã ta iri aridiore, iri waro sãre ne masibea. Eropa ta iimi Espíritu Santo masare Goãmu porã iigu, arĩpu Jesu Nicodemore.

⁹ —Mu eropa arĩrire ñaro masibea, arĩpu Nicodemo.

¹⁰ ïgu eroparĩcũ peegu ñpa arĩpu Jesu:

—¿Mũhu judio masare buhegu árĩqueregu ta, duhpigu yu arĩrire peebeari?

¹¹ Diaye mure arĩgu iia. Gua masirare, gua ïarare gua werea. Gua eropa werequerecũ ta ne mua gua acawererã judio masa ne peediabiribu.

¹² I yeba majare yu werenigui queoñaquerecũ ta “Diaye ta ãhraa,” arĩbea mua. Eropa arĩbirã Goãmu yare yu werecũ sãre “Diaye ta ãhraa,” arĩsome mua.

¹³ “Ne yujugu umarogue Goãmu pohrogue wagu ne dipaturi dujarisome. Yũhu Goãmu ïgu obeodigu yu dihta umarogue árĩdigu i yebaguere aribu. Eropigu yu dihta Goãmu yare mure weremasia.

¹⁴ Iribojeguere masa marirogue Moise mure añare come mera erã wéadigugue yucugu erã nugudigugue duhsiupu. Yucugugue ïgu duhsiudiro dopa ta yure Goãmu ïgu obeodigugue eropa ta yu sãre duhsiurãcoma.

¹⁵ Yure erã eropa iicũ árĩpehrerã yure umupeorã árĩpehrerinuri Goãmu mera árĩniguirãcoma, arĩpu Jesu.

*Goāmɯ árĩpehrerãre mahimi, arĩ gojañumi
Ñu*

¹⁶ Eropa arĩtuha õpa arĩnemopu Jesu:

—Goāmɯ árĩpehreri yeba majarãre turaro mahimi. Eropigu yure igu magure yujugu ta árĩgure Goāmɯ obeomi árĩpehrerã yure umupeorã peamegue erã wabiriborore. Eropirã árĩpehrerinuri Goāmɯ mera árĩrãcoma erã.

¹⁷ Goāmɯ yure igu magure masare dipuwaja moadoregu obeobirimi i yebaguere. Eropigu masare peamegue wabonirãre taubure yure obeomi.

¹⁸ “Yure Goāmɯ magure umupeorãre ne dipuwaja moasome Goāmɯ. Yure umupeobirãpуре Goāmɯ dipuwaja moadoretuhami. Masa yure Goāmɯ magure yujugu ta árĩgure erã umupeobirira dipuwaja, dipuwaja moagucumi Goāmɯ erãre.

¹⁹ Yuhu Goāmɯ magu i yebaguere arigu boyoriñe õaro iha masicũ iro dopa ta Goāmɯ yare õaro masicũ iiaa masare. Yu Eropa masicũ iicũ iarã yure umupeobirã yure gamebeama. Erã ñerire iiripure turaro gahmema. Erã Eropa gameri dipuwaja erãre dipuwaja moagucumi.

²⁰ Árĩpehrerã ñerire iirã erã ñero iirire duhudiabeama. Eropirã boyoro iiriñe deyro moaro dopa ta erã ñero iirare deyro moari arĩrã yure gamebeama.

²¹ Õarire iirãpu yure, yu buheri sãre gahmema. Goāmɯ yare erã iirire yu õaro deyro moacũ guhyasiribeama erã. Eropiro yure boyoro iro dopa árĩgure gahmema, arĩ werepu Jesu.

Dipaturi Ñu waĩyegu Jesure wereñumi

22 Puhru Jesu guare ĩgu buheräre Judea yebague sihugã wami. Eroque ejagu ero majarã mera bajamenurigã duja, Goãmu ya árĩburire waĩyemi eräre.

23 Ñu sã masare waĩyegu iipu Enón waĩcũri macague. Enón waĩcũri maca Salim waĩcũri maca pohro árĩbu. Ero wuaro dia árĩbu. Ero eropa árĩcũ ero majarã masare waĩyegu iipu Ñu.

24 Erã ĩgure peresu iiboro core Enóngue masare waĩyegu iipu Ñu.

25 Irisubure Ñu buherã mera majarã bajamerãgã judio masa mera waĩyerire wereniguirã duyasoñorã.

26 Tuhaja erã Ñu pohroque eja irire wereñorã.

—Buhegu, dia Jordán waĩcũriya gajipu masegue mu mera árĩdigu “Ĭgu ta Cristo ta árĩgucumi,” mu arĩdigupu dohpague masare waĩyegu iimi. Ĭgu eropa iicũ árĩpehrerã ĩgu pohroque wahama pare, arĩñorã erã Ñure.

27 Erã eroparĩcũ peegu Ñu yuhripu:

—Ĭgu dorerire ĩgu opacũ Goãmu ĩgure odi árĩmi.

28 “Cristo árĩbeaa yuhu,” yu arĩcũ mua peeabu. Eropo Cristo árĩbiriquregu ta ĩgu core wereyubure Goãmu ĩgu obeodigu āhraa yuhu.

29 Ōpa āhraa iri: Mojoto diridigo igo marapu mera árĩgo wahamo. Mojoto diridigu mera majagupu diridigu ĩgu marapocũcũ ĩagu ĩgu werenicũ peegu turaro mucubirimi. Eropigu mojoto diridigu mera majagu ĩgu mucubiridiro

dopa ta yu sã Cristo mera masa erã wacũ ãagu ãaro mucubiria.

³⁰ Cristopure umupeoro gahmea masare. Yupure umupeobiricãro gahmea masare, arĩ yuhripu Ñu.

Goãmu magu umarogue aridigu ahrimi, arĩ wereñumi Ñu

³¹ Eropa arĩtuhagu ãpa arĩnemopu Ñu.

—Umarogue aridigu árĩpehrerã nemoro turagu ahrimi. Mari masa i yeba majarã ahraa. Eropirã i yeba majare wereniguia mari. Umarogue aridigupu árĩpehrerã nemoro turagu ahrimi.

³² Igũ ãarare, igũ peerare igũ weremi. Igũ eropa werequerecũ ta masa igũre ne peedia-beama.

³³ Umarogue aridigu igũ wererire masa peerãpu, “Goãmu diaye árĩgu tiimi,” arĩrã iima erã.

³⁴ Ihĩ Cristore Goãmu igũ obeodigure Espíritu Santo ya turarire opehoñumi Goãmu. Eropigu igũ Goãmu ya wereniguirire wereniguimi.

³⁵ Goãmu igũ magure turaro mahimi. Eropigu árĩpehrerire, árĩpehrerã sãre erã opu árĩdoremi Goãmu igũ magure.

³⁶ Goãmu magure umupeorãpu umuri nucu Goãmu mera árĩniguicãrãcoma. Igũ magure tarinugarãpu Goãmu pohro wasome. Eropirã umuri nucu umaroguere árĩsome. Eropigu Goãmu erãre turaro dipuwaja moagucumi, arĩpu Ñu masare.

4

Jesu Samaria majago mera weretamuñumi

¹ Jesu Ñu nemoro bajarã ñgu buherã ñgu opacũ, Ñu nemoro masare ñgu waĩyecũ fariseo masa peeñorã.

² Erã eropa peebeoquerecũ ta Jesupũ ñgu basi masare waĩyebirimi. Gũa ñgu buherãpũ masare waĩyebũ.

³ Fariseo masa erã eropa masicũ peegu Jesupũ Judea yeba árídigu Galilea yebague sihu dujaa wami guare.

⁴ Galileague warã gũa “Samaria yebare tarigã warãca,” arĩbũ gũa.

⁵ Eropa tarigã Samaria yebague árĩri macague Sica waĩcũri macague ejabũ. Iri maca pohro iribojegue Jacobo mũrũ ñgu magũ José mũrũre ñgu ora yeba árĩyoro.

⁶ Ero Jacobo mũrũ ñgu deco ihrira gobe árĩbũ. Eropigu Jesupũ yoarogue aridigu, ñgu oẽtaria wagũ iri gobe pohro doajami. Irisubu ñgu ero doajarisubu goeri boje gohra árĩbũ.

⁷⁻⁸ Gũa ñgu buherãpũ macague gũa barire asũrã wara pũhrũ yujugu ta ñgu erore dujadoami. Eropigo Samaria majago iri gobegue igo deco waago eracũ Jesu igore deco serẽpũ:

—Deco oque yũre, arĩpũ.

⁹ —Mũhũ judio masũ ãhraa. Yũpũ Samaria majago ãhraa. ¿Duhpigũ yũre decore serẽri mũhũ? arĩpo igo Jesure. Judio masa Samaria majarãre game ñadiabirã árĩñorã. Eropigo igo eropa arĩpo Jesure.

¹⁰ Igo eropa arĩra pũhrũ Jesu igore werepũ:

—Mure Goãmu ïgu itamudiarire masigo árigo, mure decore serẽgure masigo árigo, mupũ yũpũre serẽboaya. Mu eropa serẽcũ gaji decore oboaya yũhũ mure. Iri decopũ ojocariniguicãcũ iiri âhraa, arĩpũ Jesu igore.

¹¹ Ñgu eroparĩcũ peego igo yũhripo ïgure:

—Ne mure sorobu mara. I gobe sã ãhcãri gobe âhraa. ¿Eropigu i ojocaricũ iiri decore nohogue waabocuri mũhũ?

¹² Gua ñecũ mũrũ Jacobo iribojegue majagu mũrũ i gobere guare apimũripũ. Ñgu, ïgu porã, ïgu ejorã sã i decore ihrimũriñorã. “Gaji decore oboaya yũhũ,” mũ arĩgu, ¿Jacobu tauro turagu âhriri mũhũ eropa arĩ pepigu? arĩpo igo.

¹³ Igo eroparĩcũ Jesu yũhripũ:

—Árĩpehrerã i decore ihrirã dipaturi ñemesiburãcoma.

¹⁴ Yaha decopũre ihrirã ne dipaturi ñemesibusome. Eropirã yaha decore ihrirã Goãmu mera eropa árĩniguirãcoma. Mau dipagãgue eropa deco wiriniguero dopa ta yaha deco ne pehresome, arĩpũ Jesu.

¹⁵ Ñgu eroparĩcũ nomeopũ õpa arĩpo:

—Ne dipaturi yũ ñemesibubiriboro dopa iri decore oque yũre. Eropigo dipaturi õguere ne deco waasome, arĩpo igo.

¹⁶ Igo eroparĩcũ Jesu igore werepũ:

—Irisubu tamerare mũ marapũre sihugo waque. Sihutuha õgue arique ïgu mera, arĩpũ Jesu igore.

¹⁷ —Marapũ marigo âhraa yũhũ, arĩpo igo.

—Diaye ta arãa mũhũ.

18 Mũhũ cincoſuburi marapũcutuharibũ. Eropigũ dohpague mũ mera árĩgũ mũ marapũ gohra árĩbeami. Eropigo “Marapũ marigo āhraa,” arĩgo, diaye ta arāa mũhũ, arĩpũ Jesu igore.

19 Īgũ eroparĩcũ peego õpa arĩpo igo:

—Ne, Goãmũ yare weremũhtagũ āhraa mũhũ yũ pepicũ.

20 Gũa ñecũ ſumarã mũra irigũ utāgũgue Goãmũre umupeomũriñorã. Eropirã mũapũ judio masa “Jerusaléngue masare Goãmũre umupeoro gahmea,” arĩmũribũ mũa judio masa, arĩpo igo.

21 Igo eroparĩcũ Jesu yũhripũ:

—Nomeo, yũpũre peenique. Pũhrũguere irigũ utāgũgue, Jerusaléngue sãre mari Pagũre umupeosome mũa.

22 Mũapũ mũa umupeorire masibea. Masare taubupũ judio masũ āhrimi. Eropirã gũa judio masapũ gũa umupeogũre masia.

23 Dohpagũre pũhrũgue sãre Goãmũre diaye umupeorã erã õaro pepiri mera ĩgũre umupeorãcoma. Eropa mari umupeocũ gahmemi Goãmũ.

24 Goãmũ dupũ marigũ ta ĩgũ árĩcũ masa ĩgũre ĩabeama. Eropiro ĩgũre umupeori mera erã õaro pepiri mera ĩgũre õaro diaye umupeoro gahmea masare, arĩpũ Jesu igore.

25 Īgũ eroparĩcũ igo yũhripo:

—Mesia, “Cristo,” erã arĩgũpũ, masare taubu ĩgũ ariburire masia yũhũ. Īgũ arigũ marire árĩpehrerire buhepehogũcumi, arĩpo igo.

26 —Yũhũ ta āhraa Cristo, arĩpũ Jesu igore.

27 Ìgu eropa arĩ weretamurisubu guapũ ìgu buherãpũ erabũ. Jesu nomeo mera ìgu wereniguicũ ìarã uca wacarabũ. Eropa ucaquererã ta “¿Dohpa gahmeri mũhũ? ¿Dohpa arĩri mũhũ igore?” arĩ serẽpiñabiribũ.

28 Eropigo nomeo igo sorobure ero duhudobocã, macague waha wamo. Eja masare werego õpa arĩpo:

29 —Yũ iirare werepehogure ìarã arique mũa. ¿Ìgu diaye ta Cristo árĩbocuri? Ìarã arique mũa, arĩpo igo.

30 Igo eroparĩcũ iri maca majarã Jesure ìarã arimorã iima.

31 Irisubure gua Jesu buherã ìgure turaro badoreribũ.

—Buhegu, baque, arĩribũ gua.

32 —Gajiropa árĩri barire opaa yuhũ. Irire mũa masibea, arĩmi ìgu guare.

33 Ìgu eroparĩcũ peerã gua basi õpa arĩ wereniguibũ:

—¿Gajirã ìgure barire otuhayuri? arĩbũ gua basi. Gua eroparĩcũ Jesu weremi:

34 —Masapũ basuama. Yũre obeodigu ìgu gamerire iigu suaa yupũ.

35 “Wapicurã aberi duhyaa mari dũca aĩboro,” pohe opũ ìgu arĩ pepimi. Mũapũ “Goãmũ yare gua masare wereboro duhyania,” arĩ pepibiricãque. Diaye arĩgu iiaa mũare. Dohpague tamerare masare wererã waque. Masare ìaque. Dohpague tamerare yũ buherire masa erã pee-burĩsubuno árĩro tiiaa.

³⁶ Dũcare aĩrãre erã wajayero dopa ta, yaharã árĩmorãre aĩnirãre yahare buhenirãre wajayegura yũhũ. Erã eropiira waja õaro wajayegura erãre. Erã eropa buhecũ peerã yũ buherire peenirã yaharãpũ Goãmũ mera umuri nũcũ árĩrãcoma. Eropirã erãre buhemũhtanirã, pũhrũ yaharã árĩcũ iirã sã yujuropa mucubirima.

³⁷ “Yujugũ otemũhtagũ ãhrimi. Gajigupũ dũcare aĩgũ ãhrimi,” arĩmuriñorã iribojeguerẽ. Iri diaye ta ãhraa. Erã eropa arĩdiro dopa ta yujurãyeri yahare weremũhtarã ãhrima. Gajirã yahare buhe yaharã árĩcũ iirã ãhrima.

³⁸ Pohe opũ ĩgũre mohmerã erã otebirinirã árĩquerecũ ta erãre dũcare aĩdoregũ obeomi. Eropa ta masare buhemũhtabirinirã mũa árĩquerecũ ta erã yũre umupeocũ iidoremorãre obeoa mũare. Gajirãpũ erãre buhemũtatuhama. Erã buhenirãguere dipaturi buhenemorã, yaharã árĩcũ iirãca mũapũ. Eropirã buhemũhtarãpũ erã itamuro mera gajirãre yaharã árĩcũ iirãca, arĩmi Jesu gũare.

³⁹ Irisubure Samaria majago, “Yũ iira mũrare ĩgũ werepehoami,” igo arĩcũ peerã Samaria majarã bajarã Jesure umupeoma.

⁴⁰ Eropirã Samaria majarã Jesu pohro ejarã, “Gũa mera dujanique,” arĩma ĩgũre. Erã eroparĩcũ gũa penũ ĩgũ mera ero dujanibũ.

⁴¹ Gajirã sã bajarã Jesure peerã umupeoma.

⁴² Őpa arĩma masa nomeore:

—Nere mũ arĩrare peerã Jesure umupeonũgarabũ. Dohpague tamerare ĩgũ wereniguirire gũa basi peerã ĩgũre õaro

umupeoa. Eropirã ĩġupure peerã i yeba majarãre peamegue wabonirãre taubu diaye ta ĩġu árĩcũ, dohpague ġua masia, arĩma masa Samaria majagore.

Opu magure dorecugure òagu wacũ iĩñumi Jesu

⁴³ Penu pũhrũ Jesu ġuare Galileague sihu wami daja.

⁴⁴ Neguere òpa arĩmũrimi ġuare Jesu: “Goãmũ ya weremũhtagure ĩġu ya yeba majarã ĩġure umupeobeama,” arĩmũrimi Jesu.

⁴⁵ Eropirã ġua Galileague ĩġu mera ejacũ ero majarã ĩġure òaro bocatĩrima. Ero core Jerusalengue bosenu árĩcũ Jesu ĩġu iirare ĩanirã arĩma erã.

⁴⁶ Eropi Caná Galilea árĩri macague ĩġu decore vino wacũ ĩġu iira macague waha wabũ ġua ĩġu mera daja. Caná pohro árĩri maca Capernaum waĩcũri maca opu magu dorecugũ iipũ.

⁴⁷ Eropigũ Jesu Judea árĩdigũ ĩġu Galileague ejari querere peepũ. Irire peegũ Jesu pohrogue erami.

—Yũ magu sĩrigũ iiami. Eropigũ ĩġure òagu wacũ iigũ arique, arĩ yojaro mera sihumi ĩġure.

⁴⁸ ĩġu eroparĩcũ peegũ Jesu yũhrimi:

—Goãmũ turari mera yũ deyoro moarire ĩabirã, ne yũre umupeobeaa mũa, arĩmi Jesu.

⁴⁹ ĩġu eroparĩcũ peegũ opu opũ òpa arĩmi:

—Opu, yũ magu ĩġu sĩriboro core arique, arĩmi ĩġu Jesure.

⁵⁰ —Dujaaque. Mũ magu ojocarigucumi, arĩmi Jesu.

Īgu eroparīcū peegu, “Īgu arīdiro dopa ta ojocarigucumi yu magu,” arīgu opu dujaa wami.

⁵¹ Eropa dujaniguigure ĩgu pohro majarā ĩgure bocatīri wereñorā.

—Mu magu masa wahámi, arī wereñorā erā ĩgure.

⁵² —¿Noho gohra abe árīcū ðagu wahári ĩgu? arī serēpipu ĩgu pohro majarāre.

—Cārure goeri boje puhrugā ta nimacuri tahriabu ĩgure, arīñorā erā ĩgure.

⁵³ Erā eroparīcū ðpa arī pepipu ĩgu: “Jesu yure ‘Mu magu masa wahámi,’ arī werera puhru ta nimacuri tahria waya,” arī pepipu opu. “Diaye ta arāñumi yure,” arīgu, ĩgu árīpehrerā ĩgu acawererā mera Jesure umupeoñorā.

⁵⁴ Jesu Judea árīdigu Galileague ĩgu ejara puhru opu magure ĩgu ðagu wacū ĩgu iira mera mari queocū pesubu Goāmū ĩgu turari mera ii ĩhmúmi Jesu.

5

Curimasibigure ðagu wacū iñumi Jesu

¹ Puhru judio masa Goāmure gua umupeori bosenu árīcū gua Jesu mera Jerusaléngue ejabu daja.

² Ero maca ñajari disiporo oveja waĩcari disiporo pohro guhari gobe árību. Gua judio masa ya mera Betesda waĩcari gobe árību. Iri deco gobe pohro cinco gohra tiaya mariri tari dipabu árību.

³ Iri tari dipabugue bajarā dorecurā oyarāre ĩabu. Cuirī ĩhajabirā, curimasibirā, gōari

marirã, erã iri gobe pohro oyama. Deco ñohmeborore corerã iĩñorã.

⁴ Eroque dijarigu iri gobe maja decore yujuy-erisuburi ñohmecũ iipũ anyu. Iri gobe maja deco igu ñohmera puhru ñaja guhamuhtagupũ ñagu wapũ. Dohpa áriri dorere opagu ñagu wapũ.

⁵ Eropigu ero yujugu dorecugu oyami. Igu treinta y ocho bojori gohra dorecugu árĩpũ.

⁶ Ero igu oyacũ ñagu igu eropa yoari boje igu dorecucũ masimi Jesu igure. Eropa masigu igure serẽpimi:

—¿Ōari dupũ dore marigu árĩdiari muhũ? arĩmi Jesu igure.

⁷ Igu eroparĩcũ dorecugupũ yuhrimi:

—Iri deco ñohmecũ yure decogue aĩ acugu marimi. Iri decogue yu ñajadiaquerecũ ta gajirãpũ yu core yuu ñajamuhtama, arĩmi igu Jesure.

⁸ —Wahgãnuagajaque. Mu omasiariñere aĩ, mu guburi mera cuhrapĩ wahgã waque, arĩmi Jesu igure.

⁹ Igu eroparĩcũ ta dorecugupũ wahgãnuagaja igu omasiariñere aĩ waha wami. Irinũ Sabado gua judio masa soorinũ árĩbũ.

¹⁰ Igu eropa ñagu wadigu igu omasiariñere aĩgãcũ ñarã judio masa gua oparãpũ dorecudigure õpa arĩ wereñorã:

—Dohpagãre Sabadonũ mari soorinũ árĩquerecũ mu yañe omasiariñere aĩ wahgãa muhũ. Eropa iigu mari dorerire tarinuagagu iiaa, arĩñorã erã igure.

11 —Yure yu dorecurire taudigupu ōpa arāmi yure, arīpu dorecudigupu. “Mu omasiariñere aī, mu guburi mera cūhrapi wahgāque,” arāmi yure, arī yuhripu dorecudigu murupu erāre judio masa oparāre.

12 —¿Irire mure eropa arīdigupu nihino āhriri īgu? arī serēpiñorā erā īgure.

13 Ero bajarā masa erā árīcū īagu Jesupu waha wadigu árīmi. Eropigu dorecudigupu īgure ōagu wacū iidigu īgu waire masibiripu.

14 Puhru Goāmu wihigue gua īgure bocatīricū Jesu īgure weremi:

—Peenique mūhu yure. Dohpaguere ōaro dūpucua mūhu. Ñerire iinemobiricāque. Dipaturi iinemogu mu dorecudiro tauro waguca, arīmi Jesu īgure.

15 Īgu eropa arīra puhru dorecudigu judio masa oparā īgure serēpinirā pohrogue eja, werepu erāre:

—Jesu waīcugu yure ōagu wacū iiami, arī werepu īgu.

16 Eropi Sabado árīcū Jesu dorecugure īgu dorere īgu taucū masirā judio masapu īgure ñero iinugañorā. Eropirā erā īgure wejēdiariñorā.

17 Eropa ñero erā iidiarire masigu Jesupu weremi erāre:

—Yu Pagu dohpaguere mohmenimi. Yu sā eropigu mohmenigu iiaa, arī weremi īgure ñero iidiarāre.

18 Īgu eroparīcū judio masa gua oparā īgu mera turaro guarā, ero core erā arīdiro tauro īgure wejēdiañorā. Sabadonare erā soorinure

ĩgũre ðagũ iicũ ĩarã erã gũañorã. Eropa guarã Goãmũre ĩgũ “yũ Pagũ,” ĩgũ arĩcũ peerã erãpũ tauro gũañorã. “ ‘Yũ Pagũ,’ arĩgũ Jesu ĩgũ basi ‘Goãmũ mera yujuro mera ãhraa,’ arĩ guñacumi ĩgũ,” arĩ pepiñorã judio masa gũa oparã.

Jesu “Goãmũ ĩgũ obeodigũ ãhraa yũhũ,” arĩ masare wereñumi

¹⁹ Eropi Jesu erãre weremi:

—Diaye mũare arĩgũ iiaa. Yũhũ Goãmũ magũ yũ gamero iigũ iibeaa. Yũ Pagũ ĩgũ iirare ĩagũ irire iiaa.

²⁰ Yũ Pagũ yũre ĩgũ magũre mahimi. Eropigũ ĩgũ iirare yũre ii ĩhmupehomi. I dohpaguere ĩgũ turari mera yũ iira tauro ĩgũ gajire iidoregũcumi yũre. ĩgũ eropa iidorecũ ĩgũ turari mera ii ĩhmugũca ĩgũre yũhũ. Eropa yũ ii ĩhmucũ ĩha ãcarãca mũa.

²¹ Yũ Pagũ sĩrinirãre ĩgũ masuro dopa ta yũ sã yũ gamerãre masugũra.

²²⁻²³ Ne yũ Pagũpũ masa erã ñeri iira dipuwaja, ĩgũ basi dipuwaja moagũ moabeami. Yũpũre irire erã ñeri iira dipuwaja dipuwaja moabure apimi. Erã ĩgũre umupeodiro dopa ta yũ sãre umupeoborore eropa apimi. Eropirã yũre ĩgũ magũre umupeobirã yũ Pagũ sãre umupeobeaa mũa. ĩgũ ãhrimi yũre obeodigũ, arĩmi Jesu.

²⁴ Eropa arĩtuha ðpa arĩ werenemomi:

—Diaye mũare arĩgũ iiaa. Yũ wereniguirire peerã yũre obeodigũre umupeorã ãmũri nũcũ ãmarogue eropa árĩniguicãrãcoma. Eropigũ erãre dipuwaja moasome yũhũ. Eropirã erã peamegue wabonirã tarirãcoma.

25 Diaye ta mware arĩgu iiaa. Peamegue wamorã yure Goãmu magure erã peeburisubu dohpague ãhraa. Pũhrũ sãre erã yure peerãcoma daja. Eropa peerã peenururãpu Goãmu mera eropa árĩniguirãcoma.

26 Goãmu yũ Pagurũ erãre eropa árĩniguicũ iigu ãhrimi. Eropigu yure ĩgu magure erãre eropa árĩniguicũ iibure árĩdoremi ĩgu yure.

27 Eropigu yũhu masũ Goãmu ĩgu obeodigu árĩcũ ĩgu masare dipuwaja moadorerire apimi yure.

28 Ire peerã, pee ucabiricãque mwa. Gajinũguere árĩpehrerã sĩrinirã masa goberigue árĩrã yũ wereniguicũ peerãcoma.

29 Eropa pee wahgãrã õarire iinirã mura umuri nũcu Goãmu mera árĩmorã masa mũriarãcoma. Neri iinirã murapũ ñerire erã iira dipuwaja peamegue warãcoma, arĩ weremi Jesu.

30 Eropa arĩtuha õpa arĩ werenemomi:

—Yũ gamero ne gajinore iibea. Ne yũ basi yũ gamero iibea. Yure obeodigu ĩgu gamero dopa ta iiaa. Eropigu ĩgu arĩdiro dopa ta dipuwaja moaa. Eropigu masare yũhu dipuwaja moagu diaye ta iiaa.

31 “Yũhu Goãmu magu ĩgu obeodigu ãhraa,” yũ basi arĩ werecũ, “Mũ wereniguri ne diaye árĩbea,” arĩboca mwa.

32 Gajigu ãhrimi yure weregu. ĩgu Goãmu ãhrimi. ĩgu yure werera diaye ta ãhraa. Irire yũ õaro masia.

33 Mũa gajirãpure Ñure yure serëpidore obeobũ. Eropigu ãgu sã diaye ta weremi mũare.

34 Masare yure “Goãmũ ãgu obeodigu ãhrimi,” arĩ weremorãre amabeaa yũpũ. Eropa amabiri-queregu ta Ñu masũ ãgu árĩquerecũ ta “Yure diaye ta weremi,” arãa. Mũa yure umupeoburire, mũa peamegue wabonirã mũa tariburire yure ãgu werera “Diaye ta ãhraa,” arĩ weregu iiaa.

35 Ñu mũare buhemũhtagũ bajamenurigã buhemi mũare. ãgu eropa buhecũ peerã bajamenurigã mucubiriribũ mũa.

36 Ñu yũ árĩricũre weremi mũare. ãgu wereri mera yũ árĩricũre masiquererã yũ iirire ãarã tauro masirãca. Goãmũ yũ Pagũ ãgu turari mera ãgu yure iidorerare dohpague iigu iiaa. Ire yũ iicũ ãarã diaye ta Goãmũ ãgu obeodigu yũ árĩcũ masirãca mũa.

37 Eropiro yũ Pagũ yure obeodigu ãgu basi yũhũ ãgu obeodigu árĩrire arĩ weremi mũare ãgu yare erã gojarapũgue. ãgu eropa arĩ werequerecũ ta ãgu wereniguirire ne peebeaa mũa. Eropi mũa ãgure ne ãabeaa.

38 Yure Goãmũ ãgu obeodigure mũa ne peediabeaa. Eropirã mũa ne Goãmũ yare gamebeaa.

39 Goãmũ yare erã gojarapũre mũa õaro buhea. Eropa buherã “Gũa ipũre buherã umuri nũcũ Goãmũ mera eropa árĩniguirãca,” arãa mũa. Iripũ ta yure werea.

40 Iripũ yure werequerecũ ta mũapũ yure gamebeaa. Umuri nũcũ Goãmũ mera mũa árĩniguiburire yũhũ ogũ árĩquerecũ yure gamebiribũ mũa, arĩ weremi Jesu erãre.

⁴¹ Eropá arĩtuha òpa arĩnemomi:

—Yũre masa erã umupeorire amabeaa yũhũ.

⁴² Eropá amabiriqueregũ ta Goãmũre mũa mahibiricũ masia yũhũ.

⁴³ Goãmũ yũ Pagũ ĩgũ dorero dopa ta yũ ariquerecũ ta mũa yũre gamebeaa. Gajigũpũre Goãmũ ĩgũ obeobiridigũ ĩgũ árĩquerecũ ta ĩgũpũre gamerãca mũa.

⁴⁴ Gajirã masa mũare erã umupeocũ gahmea mũa. Goãmũ mũa mera ĩgũ mucubiririre gamebeaa mũa. ĩgũ dihta Goãmũ gohra āhrimi. Eropá gamebirã yũre peebeaa mũa. Yũre umupeobeaa mũa.

⁴⁵ Mũare yũ Pagũguere ne weresāsosome yũhũ. Irire pee masique mũa. Moise ĩgũ gojarapũpũ mũare weresāroca. “Iripũ maja dorerire iipehorã, Goãmũ pohro warãca mũa,” arĩripũpũ mũare weresāroca.

⁴⁶ Moise ĩgũ gojarapũ yũpũre weremũhtayoro. Eropirã iripũre òaro umupeorã yũ sãre umupeoboaya mũa.

⁴⁷ Moise ĩgũ gojarapũre mũa òaro peebirã, yaha wereniguirĩ sãre peesome mũa, arĩmi Jesu erãre.

6

Cinco mil umare masare bajarã gohrare bari oñumi Jesu

Mt 14.13-21; Mr 6.30-44; Lc 9.10-17

¹ Eropá ĩgũ buhera pũhrũ Galilea waĩcũri ditaru gajipũ masegue gũa Jesu mera taribuja wabũ. Galilea ditaru ta Tiberia waĩcũbũ.

² Ero core Galilea yeba Jesu dorecuräre ñgu ñarã ñgu iicũ masa ñanirã árĩma. Erã eropa ñanirã árĩrã Jesu ñgu taribujacũ ñarã masa bajarã ñguere nurusia taribujama.

³ Eroque eja, gua ñgu buherã ñgu mera utãgugue muria, doabu.

⁴ Irĩnu Pascua waĩcũri bosenu árĩboro judio masa bosenu árĩboro merogã duhyabu.

⁵ Eroque doagu, Jesu masa bajarã ñgu pohro erã aricũ ñhabeomi. Eropa ñhabeogu Felipe serẽpimi Jesu:

—¿Oã masa erã baburire nohogue asũrãcũri mari? arĩ serẽpimi.

⁶ Jesu ñgu basi ñgu iiburire masiqueregu ta Felipe serẽpi ñami, “¿Dohpa yuhrigũcũri?” arĩgu.

⁷ ñgu eropa serẽpicũ Felipepu yuhrimi:

—Doscientos niyerupũri waja mera mari asũquerecũ ta, masare yujurãyerire mutarigã barire mari guerequerecũ ta ne sihasasome, arĩmi Felipe Jesure.

⁸ Gua mera majagu Andrepu Simo Pedro pagu magupu Jesure weremi.

⁹ —Cinco pan dipuru, perã wai ihĩ majigu ohõ opami. Iri pan dipurugã ñgu opaquerecũ ta masapu bajarã gohra ãhrima. Eropiro i merogã bari ne sihasasome, arĩmi Andre.

¹⁰ —Masare doadoreque mua, arĩmi Jesu guare ñgu buheräre.

Ero mutarigã taacũro árĩbu. Gua doadorecũ masa árĩpehrerã doajapehrea wama taa weca. Ñma dihtare queocũ cinco mil gohra árĩma.

¹¹ Erã eropa doajacũ ñagu Jesupu panre aĩ Goãmure “Õhaa,” arĩmi. Eropa arĩtuha guare ñgu buherãre gueredoremi. Ñgu eropa gueredorecũ guapu erã doarãre guere wahgãbu. Perã wai sãre aĩ guere wahgãbu. Árĩpehrerãre erã sihajaro barire guerebu.

¹² Eropirã masa erã yapicũ ñagu Jesu guare doremi:

—Erã ba duharire aĩque. Eropirã iri barire ne dedeosome, arĩmi.

¹³ Ñgu eroparĩcũ guapu cinco pan dipuru duhyarare gua gameneocũ doce puiro gohra wirĩbu.

¹⁴ Eropirã masa Jesu Goãmũ turari mera iri deyro moariñere ñgu iicũ ñarã õpa arĩma:

—Diaye ta ãhraa. Ihĩ Goãmũ ya wereniguĩ i yebague aridigu mari coredigũ ta ãhrimi, arĩma erã.

¹⁵ Eropirã erã Jesure erã opu árĩbure acudiarima. Jesu irire masigu dipaturi yujugu ta utãguque waha wami.

Jesu deco weca curiñumi

Mt 14.22-27; Mr 6.45-52

¹⁶ Ñamicague gua ñgu buherã dihta ditarugue buhabũ.

¹⁷ Eroguere buhaja dohodirugue ñaja, Capernaum waĩcũri macague taribujabũ. Gua eropa taribujacũ ñamigue árĩbu. Eropigu Jesu gua pohroque arinibirimi dohpa.

¹⁸ Miruñe turaro aricũ gua taribujariyaguere pãgũri wahgãbu.

19 Cinco kilómetros gohra gua taribujara puhru Jesu gua pohrogue árimi. Deco weca nígui wahgáricũ íabu gua ígure. Eropa gua pohro ígu aricũ íarã gua güibũ.

20 Gua güicũ íagu ígu guare weremi:

—Ne yure íha ucabiricãque. Guñaturarã áríque. Yũhũ ta áhraa, arĩmi Jesu.

21 Ígu eroparĩcũ peerã gua ígure mucubiriri mera bocatĩri ñajadorebũ. Ígu ñajara puhrugã gua wara yebaguere taribujabũ.

Masapũ Jesure amañuma

22-24 Gajinũ masa ero dujanirãpu gamenerenugañorã daja Jesure corerã. Iri ñamire gua yaru mera gua dihta taribujacũ íanirã árĩma erã. Jesu gua mera ígu wabiricũ sãre íanirã árĩma erã. Eropa gamenererã Jesure bocabiriñorã. Bocabiri ero pohro Tiberiague ariri gasi tuhajacũ íañorã. Jesu Goãmure “Õhaa,” arĩ, masare ígu bari guerediro pohroñarigue árĩyoro. Eropirã Jesu gua sã maricũ íarã, iri gasigue ñaja, Capernaumgue guare nurusia taribujajama. Jesure ahma nurusiagãrã iima erã.

Yũhũ ojocaririre ogũ, bari iro dopa árĩgu áhraa, arĩ wereñumi Jesu masare

25 Ditarure taribuja, gua árĩrogue eja, Jesure bocajanijarã erã serẽpima ígure:

—Buhegu, ¿dohpárĩcũ ahrari mũhũ õguere? arĩ serẽpima erã ígure.

26 Erã Eropa arĩ serẽpicũ, Jesu erãre weremi:

—Diaye arĩgu iiaa mũare. Deyoro moarire yu iiquerecũ ta yũpure umupeobeaa mũa. Yũre umupeobiriquererã ta yũre ahmaa mũa. Yũ mera pagari baha, mũa yapinirã árĩrã yũre amagãrirã iiaya daja.

²⁷ Bari ne árĩniguibeaa. Pũhrũ pehrea wahaa iri. Eropirã irire eropa amaniguibiricãque. Gaji bari gajiropa árĩri baripũre amaque mũa. Iri barire amarã umuri nũcũ Goãmũ mera árĩrãca. Eropiro iri bari tamera ne pehrebeaa. Iri barire yũhũ masũ Goãmũ ĩgu obeodigu mũare ogura. Goãmũ yũ Pagũ yũre irire odoregũ ãhrimi. ĩgu obeodigu yũ árĩrire ĩhmutuhami mũare, arĩmi Jesu.

²⁸ ĩgu eroparĩcũ erã serẽpima ĩgure:

—¿Goãmũ iidorerire iimorã dohpa iirãcuri gũa? arĩ serẽpima erã.

²⁹ —Ire Goãmũ mũare iidoremi: “Yũre ĩgu obeodigure umupeoque,” arĩ doremi Goãmũ, arĩmi Jesu.

³⁰ ĩgu eroparĩcũ peerã erã õpa arĩma:

—Goãmũ ĩgu obeodigu mũ árĩgu ĩgu turari mera ii ĩhmuque gũare mũre gũa õaro umupeoborore. ¿Ñehenore iibocuri mũhũ?

³¹ Mari ñecũ sumarã mũrague iribojegue majarã masa marirogue mana waĩcuri dipurure bamuriñorã. Goãmũ yare erã gojaripũgue õpa arĩ wereyoro: “Ĩgu erãre umaro maja dijuri barire omuripũ erã baburire,” arĩ gojañuma Goãmũ yare erã gojarapũgue. ¿Ĩgu eropa iidiro dopa ta iigu iiri mũ sã? arĩma erã.

³² Erã eroparĩcũ Jesu weremi erãre:

—Diaye muare arĩgu iiaa. Moisepu iri umaro maja barire mua acawereräre obiriñumi. Yu Pagupu umaro maja barire diaye maja barire muare ogu ährimi.

³³ Goãmu ĩgu bari umaro dijari árĩpehreri yeba majaräre ojocaririre omasia, arĩmi Jesu.

³⁴ —Opu, umuri nucu iri barire oque guare, arĩma erã.

³⁵ Erã eroparĩcũ peegu Jesu weremi eräre:

—Yupu ojocaririre ogu bari iro dopa árĩgu ähraa. Mari ya barire barã matagã ta oaboa wahaa mari. Ihriri sãre mari ihrira puhragã ta ñemesibua daja. Yure gamegupu, yure umupeogupu, ne oaboabigu ñemesibubigu iro dopa ĩgu ñaro árĩri ne pehresome ĩgure.

³⁶ Muapu yure ĩaquererã ta umupeonibea dohpa. Irire ta muare wererabu yuhu.

³⁷ Árĩpehrerã yu Pagu yarã árĩmoräre ĩgu aĩnirãpu yure gamerãcoma. Eropigu yure gameräre ne cóãsome yuhu.

³⁸ Umarogue arigu yu gamero iigu arigu iibiribu. Yure obeodigu ĩgu gamero dopa ta iigu aribu.

³⁹ Ita árĩbu yure obeodigu ĩgu gameri gohra: Árĩpehrerã yaharã árĩmorã yure ĩgu oniräre yu dedeobiricũ gahmemi. Yure obeodigu pehrerinu árĩcũ eräre yu masucũ gahmemi.

⁴⁰ Árĩpehrerã yure Goãmu magure ĩarã, yure umupeorã umuri nucu ĩgu mera erã árĩcũ gahmemi yu Pagu. Eropigu pehrerinu árĩcũ eräre masugura, arĩmi Jesu.

41 “Yũhũ Ʃmarogue ariri bari iro dopa árĩgũ ãhraa,” ĩgũ arĩcũ peerã judio masa gũa oparãpũ ĩgũ mera guarã, erã basi Jesure ñero arĩ wereniguima.

42 —¿Ihĩ Jesu José magũ árĩbeari? ĩgũ pagũ, ĩgũ pago sãre mari masia. ¿Eropa árĩqueregũ ta duhpigũ “Ʃmarogue aribũ,” arĩ wereniguiri ĩgũ? arĩ guama erã.

43 Erã eroparĩcũ peegũ Jesu weremi erãre:

—Mũa basi yũre ñero arĩ wereniguibiricãque.

44 Yũ Pagũ yũre obeodigũpũ masare yũre gamecũ iimi. ĩgũ eropiibiricũ masapũ yaharã árĩmasibiriboñuma. Pehrerinũ arĩcũ yaharãre masugũca yũhũ.

45 Goãmũ ya weremuhtanirãpũ õpa arĩ go-jañuma: “Goãmũ erãre buhegũcumi,” arĩ go-jañuma. Árĩpehrerã yũ Pagũ ĩgũ buherire peerã ĩgũre yũhrirã yũre gahmema. Eropirã yaharã ãhrima.

46 “Yũ Pagũre ne yujugũ masũ ĩabeami. Yũhũ Goãmũ ĩgũ obeodigũ dihta yũ Pagũre ĩabũ.

47 Diaye arĩgũ ĩiaa mũare. Yũre umupeogu árĩpehrerinũri yũ Pagũ mera árĩniguigũcumi.

48 Yũpũ ojocaririre ogũ bari iro dopa árĩgũ ãhraa.

49 Mũa ñecũ sũmarã mũrague masa mariroque manare bamũriñorã. Eropa irire baquererã ta sĩria wañorã.

50 Ʃmarogue ariri baripũre masũ bagũ ne sĩrisome.

51 Yũhũ Ʃmarogue ariri bari ojocaririre ori bari iro dopa árĩgũ ãhraa. I barire bagũ Ʃmũri nũcũ yũ Pagũ mera eropa árĩniguigũcumi. I

bari ojocaririre ori bari iro dopa árĩri yu dũpu ta áhraa. Árĩpehreri yeba majarã Goãmu mera eropa erã árĩniguiburire yu dũpũre ogũra. Eropa ogũ sĩrigũca, arĩmi Jesu.

⁵² Ĩgu eroparĩcũ peerã judio masapu òpa arĩ wereniguima erã basi:

—¿Ihĩ dohpa ii ĩgu dũpũre baburi ogũcuri? arĩma erã erã basi.

⁵³ Erã eroparĩcũ peegu Jesu weremi:

—Diaye arĩgu iiaa mũare. Yũhu Goãmu ĩgu obeodigu áhraa. Yu dũpũre babigu, yu dire ihribigu Goãmu mera árĩsome.

⁵⁴ Yu dũpũre bagũre, yu dire ihrigũre, pehrerinũ árĩcũ masugũra.

⁵⁵ Yu dũpu diaye ta bari gohra iro dopa áhraa. Yu di diaye ta ihriri gohra iro dopa áhraa.

⁵⁶ Yu dũpũre bagũ yu dire ihrigu yu mera mucubiriri mera árĩniguigũcumi. Eropigu yũhu ĩgu mera mucubiriri mera árĩniguigũca.

⁵⁷ Yu Pagũ yũre obeodigu eropa árĩniguicãmi. Eropa árĩniguigu yu sãre eropa árĩniguicũ iimi. Eropirã yũre eropa árĩniguigũre masa barã, Goãmu mera umaroguere eropa árĩniguirãcoma erã sã.

⁵⁸ Ita áhraa umarogue ariri bari. Mari ñecu sumarã mũra erã bara mũra iro dopa árĩbeaa i bari. Erãpu iri barire baquererã ta sĩa wañorã. I baripũre bagũ umaroguere eropa árĩniguicãgũcumi, arĩmi Jesu.

⁵⁹ Capernaum judio masa gũa buheri wihi Jesu buhegu, eropa weremi.

Jesu ĩġu buherire peerã umarogue eropa árĩniguirãca mari, arĩ gojañumi Nũ

⁶⁰ ĩġu eropa wereniguicũ peerã bajarã ġua watope árĩrã Jesure gamerã, ĩġure nũrusianirã õpa arĩ wereniguima:

—I buheri diasa ãhraa. Eropirã mari peedia-biriñaria, arĩ wereniguima erã erã basi.

⁶¹ Erã eroparĩcũ Jesupũ erã wereniguirire masimi. Eropa masiġu ĩġu erãre serẽpimi:

—¿I buherire peerã guari mũa?

⁶² ¿Yũhũ masũ Goãmũ ĩġu obeodigũ umarogue dujaa wacũ dohpa wabocuri mũa?

⁶³ Masũ ĩġu sĩporãre opagũ ojocarimi. ĩġu dũpũpũ ĩġure ojocaricũ iĩbeaa. Masũre ĩġure ĩġu sĩporã ojocaricũ iro dopa ta yũ buheripũ mũare Goãmũ mera eropa árĩniguicũ iiaa.

⁶⁴ Gajirã mũa mera majarã ne yũre umupeobeama, arĩmi Jesu.

Negohraguere Jesu ĩġure umupeobiribonirãre masituhajapũ. ĩġure ĩhaturirãre wiabu sãre mata masituhapũ. Eropa masiġu “Gajirã mũa mera majarã yũre umupeobeama,” arĩmi Jesu ġũare.

⁶⁵ Eropa arĩtuhaja õpa werenemomi:

—Õpa arĩ wererabũ mũare. “Yũ Pagũpũ masare yũre gamecũ iimi. ĩġu eropa iĩbircũ masapũ yaharã árĩmasibiriboñuma,” mũare arĩrabũ, arĩmi Jesu.

⁶⁶ ĩġu eropa arĩ buhecũ peerã bajarã Jesure gamenirã mũa ĩġure cohã, ĩġu mera dipaturi wabirima.

67 Erã eropa iicũ ãagu Jesu guare doce ãgu buherãre serẽpimi:

—¿Mua sã yure cóãcãrãcuri? arĩ serẽpimi guare.

68 ãgu eroparĩcũ Simo Pedro yãhrimi ãgure:

—Opũ, guare gajigu buhegu marimi. Mu buherire peerã Goãmũ mera eropa árĩniguirãca gua. Mu buheri dihta irire werea guare.

69 Eropirã gua mure umupeoa. Eropa mũhũ õagu, Goãmũ magu ãgu obeodigu mu árĩcũ gua masia. Eropirã mure cóãsome gua, arĩmi Simo Pedro Jesure.

70 ãgu eroparĩcũ peegu Jesu weremi guare:

—Yũpũ muare doce majarãre beyebu. Yujugu mua mera majagu watĩ yagu árĩbu ãhrimi, arĩmi guare ãgu buherãre.

71 Eropa arĩgu Judare Simo Iscariote magure arĩgu iimi. Judapũ doce gua mera majagu Jesure ãhaturirãre wiabu árĩmi.

7

Jesu pagu porã ãgure peediabiriñuma

1 Pũhrũ gua mera Jesu Galilea yeba curigu wami. Judea yeba majarã judio masa ãgure wejẽdiañorã. Erã eropa wejẽdiacũ masigu ãgu iri yebare wabirimi.

2 Judio masa mũta wirigã gua iiburinũ bosenu merogã duhyabu.

3 Eropirã Jesu pagu porã ãgure werema:

—Judeague bosenure ãagu waque. Ero mu yarãre deyoro moarire ii ãhmugu waque mũhũ.

⁴ Masare deyoro moarire ii ñhmudiagu mure dibubiricãro gahmea. Deyoro moarire iigu árĩgu árĩpehrerã erã ñhuro iique, arĩma erã.

⁵ Ĩgu pagu porã árĩquererã ta Jesure “Goãmu magu ãhrimi,” arĩbirima. Eropirã eropa arĩma erã ĩgure.

⁶ Erã eropa arĩra puhru Jesu weremi erãre:

—Masa yure erã ñaro masiburisubu ñhyania dohpa. Muapu bosenure ñadiarã waque.

⁷ Ero majarã muare ñaturibeama. Yupure erã ñeri iirare yu werecũ yure ñaturima.

⁸ Mũa seyaro bosenu árĩcũ waque. Yupure yu waburisubu ñhyania dohpa. Eropigu yupu bosenure ĩagu wanibea dohpa, arĩmi Jesu erãre.

⁹ Eropa arĩgu ĩgu Galilea dujami.

Mũta wirigã erã iirinuri bosenu árĩcũ wañumi Jesu Jerusalénque

¹⁰ Bosenuque Jesu ĩgu pagu porã erã wara puhru Jesu sã gua mera erã puhru wami. Eropa wagu masa erã ñabiririsubu wami.

¹¹ Bosenu árĩrã judio masa gua oparã ĩgure amañorã:

—¿Nohogue árĩcuri ĩgu? arĩ serẽpiñorã.

¹² Eropirã masa bajarã Jesure werewuañorã. Gajirã, “Ĩgu ñagu ãhrimi,” arĩñorã. Gajirãpu, “Ĩgu ñegu ãhrimi. Masare guýagu ãhrimi,” arĩ werewuañorã.

¹³ Eropa arĩquererã judio masa gua oparãre güirã, masa erã ñabirogue Jesure werewuañorã.

¹⁴ Gua erogue ejara puhru bosenu deco Jesu Goãmu wihigue ñajaja buhemi.

15 Īgu eropa buhecũ judio masa ũca wa õpa arĩma:

—¿Ihĩ buherogue buhebigu árĩqueregu ta duhpigu õaro masipehori ĩgu? arĩma erã ĩgure.

16 Erã eroparĩcũ Jesu weremi erãre:

—Yũ buheri yaha wereniguiiri árĩbeaa. Yũre obeodigu ya wereniguiripu āhraa i buheri.

17 Goāmũ gamerire iidiarã yũ buherire “Goāmũ wereniguiiri ta āhraa,” arĩ masirācoma. Yũ buheri yaha wereniguiiri dihta árĩbircũ sãre masirācoma.

18 Yujugu ĩgu gamero ĩgu masiri mera buhegu árĩgu “Yũ dihtare umupeoque,” arĩgu āhrimi ĩgu. Yũre obeodigupũre mũa umupeocũ gahmea yũpũ. Yũ eroparĩcũ peerã, “Diaye ta wereniguiimi ĩgu. Ne guyabeami,” arĩ masirāca mũa.

19 “Goāmũ dorerire Moise mũrupũ apimuriñumi mũare. Īgu eropa apiquerecũ ta mũa árĩpehrerã iri dorerire ne yũhribeaa. ¿Duhpirã yũre wejēdiari mũa? arĩmi Jesu judio masare.

20 —Mũ goroweregu āhraa. Mũre wejēdiarã marima, arĩ yũhrima erã Jesure. Erã eroparĩcũ Jesu yũhrimi:

21 —Yũhũ soorinũ yujusubu Goāmũ ĩgu turari mera dorecũgure ĩgu dorere yũ cóacũ mũa ĩha ũca wabũ.

22 Mari ñecũ sumarã iribojegue majarãpũ erã dupũre merogã gasirogãre wiri aĩrã erã árĩdiro dopa ta Moise wiridoreñumi. Īgu eropa dorecũ majirãgãre ocho nũri erã masa dehyoara pũhrũ soorinũ árĩquerecũ ta erã dupũre merogã erã gasirogãre wiri aĩmũria mũa.

23 Mari soorinu árĩcũ majirãgãre erã dupure merogã gasirogãre wihria mua Moise doreri iimorã. ¿Mua sã soorinu irire iiquererã ta irinu dorecũgare yu taucũ duhpirã yu mera guari mua?

24 Yu iirare mua ôaro masibiriboro core, yure ñero pepibiricãque. Mua ôaro masira puhru yure mua ñero pepicũ diaye ta árĩroca, arĩmi Jesu.

Jesu negohraguere ïgu aridirore wereñumi

25 ïgu eropa arĩ werera puhru bajamerãgã Jerusalén majarã ôpa arĩ wereniñorã:

—¿Ihĩ mari oparã erã wejẽdiagu árĩbeari?

26 Eropigu ïgure erã wejẽdiaquerecũ ta árĩpehrerã masare buhegu iimi ïgu. Eropirã ïgure wejẽdianirã árĩquererã ta eropa ïacãma. Eropa ïacãrã ïgure “ïgu diaye ta Cristo Goãmu ïgu obeodigu ãhrimi,” ¿arĩ pepibocuri oparãpu? Maripu masia. Cristo árĩbiribocumi.

27 Ihĩ Jesu ïgu aridirore gua masia. Cristopu ïgu árĩcũ ïgu aridirore masiya mara. Eropigu Cristo gohra árĩbeamí Jesu, arĩ werewuañorã erã Jerusalén majarã.

28 Erã eropa arĩrare masigu, Jesu ôpa turaro busuro werenigui buhemí Goãmu wihi:

—Yure ôpa arĩ pepia mua: “ïgure masia gua. Eropirã ïgu aridiro sãre masia,” arĩ pepiraa mua yure. Mua eropa arĩ pepiquererã ta yu gamero aribirabu. Yure obeodigu gohrare masibea mua. Yure obeodigu diaye árĩgu, diaye iigu ãhrimi.

29 Īḡu ta yure obeomi. Eropiḡu ĩḡu pohrogue aribu. Eropiḡu yuhu ĩḡure masia, arĩmi Jesu judio masare.

30 Īḡu eroparĩcũ peerã ĩḡure ñeadiarima. Erã eropa ñeadiaquerecũ ta Jesu ĩḡu ñero tariburisubu árĩbiriyo dohpa. Eropirã erã ĩḡure ñeamasibirima.

31 Gajirã masapu bajarã ĩḡure umupeoma. Ōpa arĩma:

—“Cristo bajasuburi Goãmu turari mera deyoro moarire ii ĩhmugucumi,” erã arĩ werediro dopa ta ihĩ Jesupu bajasuburi Goãmu turari mera ii ĩhmumi. Árĩpehrerã gajirã tauro Goãmu turari mera ii ĩhmumi ĩḡu. Eropiḡu Cristo Goãmu ĩḡu obeodigu ta āhrimi Jesu, arĩma Jesure ne umupeonugarāpu.

Fariseo masa Jesure peresu iidoreñuma

32 Masa Jesure eropa arĩ wereniguicũ peerã pahia oparã, fariseo masa mera Jesure ñeadorerã obeoriñorã surarare.

33 Eropiḡu Jesu masare ōpa arĩmi:

—Bajamenurigã mua mera árĩniguca. Eropiḡu puhruñarigã yure obeodigu pohro waguca.

34 Yu árĩborore mua wamasibea. Eropirã yure amaquererã ta ne bocasome mua, arĩmi Jesu masare.

35 Īḡu eroparĩcũ peerã erã judio masa ōpa arĩ wereniguñorã:

—¿Ihĩ eropa arĩḡu nohogue wagucuri mua pepicũ? ¿Griego masa pohrogue judio masa wasirimirã pohrogue erã árĩri macarigue Griego masaguere buheḡu wabocuri ihĩ?

36 “Yũ árĩborore mua wamasibeeaa. Eropirã mua yure amaquererã ta ne bocasome,” ïgu arĩgu ¿dohpa arĩronore ïgu eropa arĩri? arĩ wereniguiñorã judio masa erã basi.

Ojocaricũ iiriyarire wereñumi Jesu

37 Bosenũ ojogorocurinu irinu guhyadiarinu gohra árĩro iibu. Irinu Jesu ero nigui, turaro mera weremi masare:

—Nemesiburã decore turaro gamero dopa árĩrã umuri nucu Goãmu mera turaro árĩdiarã yure serêque. Mua eropa serêcũ ïgu yarã árĩdoregura muare.

38 Yure umupeorãre õpa arĩ gojañuma Goãmu yare erã gojarapũgue: “Erã sĩporãriguere ojocaricũ iiri deco eropa árĩniguicãroca,” arĩ gojañuma, arĩ turaro weremi Jesu masare.

39 “Erã sĩporãriguere ojocaricũ iiri deco eropa árĩniguicãroca,” arĩgu “Yure umupeorã Espĩritu Santore oparãcoma” arĩgu iimi Jesu. ïgu umarogue ïgu murianibiricũ dohpa Espĩritu Santopũ arinibirimi dohpa erãre.

Judio masa dũca wariñuma pe curu

40 Jesu ïgu eroparĩcũ peerã, masa bajarã õpa arĩ wereniguima:

—Ihĩ diaye ta Goãmu yare weremuhtagu mari coredigu ta ãhrimi, arĩ wereniguima.

41 Õpa arĩma gajirã sã:

—Ihĩ Cristo marire taubu ãhrimi, arĩma.

Gajirãpu õpa arĩma:

—Cristo árĩgu Galilea majagu árĩsome ïgu. Ihĩ Jesupu ero majagu ta ãhrimi.

⁴² Cristo Davi muru pãrami gajisubu maca jagu arigu árĩbocumi. Eropigu Davi ya maca muraro Belén waĩcũri maca masa dehyoagucumi Cristopũ. Eropa ta arĩ werea Goãmu yare erã gojarapũ. Ihĩ Jesupu Belén macague masa dehyoabiripũ. Eropigu ĩgu Goãmu ĩgu obeodigu Cristo gohra árĩbeami, arĩrima erã.

⁴³ Eropirã Jesure peenirã gajirã umupeo gajirãpu umupeobirã árĩnjarã game dũca warima pe curu.

⁴⁴ Eropirã bajamerãgã Jesure ñeadiarima. Eropa ñeadiaquererã ta ĩgure ñeabirima.

Judio masa oparã Jesure ne umupeobiriñuma

⁴⁵ Eropirã surara pahia oparã pohrogue fariseo pohrogue dujaa wañorã daja. Erã dujajacũ ĩarã erã surarare serẽpiñorã:

—¿Duhpirã Jesure ñeagãribirari mua? arĩñorã.

⁴⁶ —Ĩgu òatariaro wereniguigu ãhrami. Gajirã ĩgu iro dopa wereniguirã ne marima, arĩ yũhriñorã surara erãre.

⁴⁷ Erã eroparĩcũ fariseo masapu òpa arĩ wereñorã:

—¿Muare ĩgu guyacũ, “Diaye ta arĩgu iimi,” arãri mua sã?

⁴⁸ Mari oparã Jesure ne umupeobeama. Gua sã eropirã ĩgure umupeobeaa.

⁴⁹ Oã masa Goãmu dorerire Moiserẽ ĩgu apirare masibeamã. Eropa masibirã árĩrã Jesure umupeoma. Erã eropa umupeori dipuwaja mari Pagu Goãmu erãre dipuwaja moagucumi, arĩñorã fariseo masa.

⁵⁰ Nicodemo fariseo masu Jesure weretamugu ejadigu ero arĩpu erã mera. Erã eroparĩcũ peegu õpa arĩpu ĩgu erãre:

⁵¹ —Jesu ĩgu ñero iirare masibea mari. Eropa masibirã ĩgu marire wereboro core ĩgure dipuwaja moamasibea mari. Eropa masibiri-quererã ta ĩgure dipuwaja moarã, mari ya dorerire tarinugarã iiaa mari, arĩpu Nicodemo erãre.

⁵² ĩgu eroparĩcũ peerã õpa arĩ yuhriñorã erã:
—¿Mu sã ĩgu iro dopa ta Galilea majagu ta ahriri? Goãmu ya erã gojarapũre buhepehoque. Eropa buhegu, “Goãmu yare weremuhtagu ne yujugu Galilea majagu marimi,” arĩ masiguca muhu, arĩ yuhriñorã erã Nicodemore.

⁵³ Erã eropa arĩra puhru erã ya wirigue dujaa wañorã.

8

Umũ mera ñero iidigore judio masa oparã dipuwaja moadiariñuma

¹ Jesupu ĩgu seyaro utãgugue Olivo waĩcudigugue waha wami.

² Gajinu Goãmu ya wihigue gua wabu daja. Jesu ejacũ ĩarã masa bajarã ĩgu pohro gamenerema. Erã gamenerecũ ĩgupu doanijagu erãre buhenugapu.

³ ĩgu eropa buhero watope judio masa buherã, fariseo masa mera iri wihigue nomeore aĩ ñajajama. Igo marapucquerego gajigu mera igo ñero iicũ bocañañorã erã igore. Eropa boca-ñarã igore Goãmu wihigue aĩ ñajama erã igore

dipuwaja moadorerã. Aĩ ñajatuha árĩpehrerã guã ñaro igore duhu nuguma.

⁴ Duhunugu õpa arĩma Jesure.

—Buhegu, igo marapucugo árĩquerego gajigu mera ñero iigo iicũ bocajabu.

⁵ Moise dorerire õpa ãhraa: “Umũ mera ñero iidigore utã mera dea wejẽcãque,” arĩyoro Goãmũ doreri. ¿Mũca dohpa arĩ pepiri ire? arĩ serẽpima erã Jesure.

⁶ Jesu igũ ñero wereniguicã peediarã iirima erã igũre weresãmorã. Erã eropa serẽpiquerecũ ta Jesupũ muhmusiu dija, yebague igũ mujusĩru mera gojami.

⁷ Eropigu erã eropa serẽpiniguicã peegu Jesupũ wahgã doaja, erãre weremi:

—Mũa mera majagu ñero iibigu árĩgu igore utã mera deanugaporo, arĩmi Jesu.

⁸ Eropa arĩtuha dipaturi muhrisiu dija, yebague gojami daja.

⁹ Irire peerã igore aĩ ñajarinirãpũ erã ñeri iirare guñarã, erã tĩrãpũ wiria wamũhtama. Erã pũhrũ erã mera majarã sã wiriapehrea wama. Eropigo nomeo dihta Jesu pohro dujanugamo.

¹⁰ Eropigu Jesu wahgã doaja, igore serẽpimi.

—¿Nohogue ãhriri erã? ¿Mũre dipuwaja moadianirã mariri dohpaguere? arĩmi igore.

¹¹ —Marima, opũ, arĩ yũhrimo igo.

—Yũ sã dipuwaja moabeaa mũre. Waque. Eropigo ñerire iinemobiricãque, arĩmi Jesu igore.

Jesu i yeba majarãre boyoro iro dopa Goãmũre masicũ iimi, arĩ gojañumi Ñũ

12 Dipaturi Jesu iri wihigue árĩrãre weremi:

—Boyoro iro dopa yũhũ i yeba majarãre Goãmũre masicũ iiaa. Yũre umupeogu Goãmũ mera eropa árĩniguicãgũcumi. Eropigu ãgu boyorogue árĩgu dopa ta ðarire guñagũcumi. Eropigu ãgu ñerire guñadiabeami, arĩ weremi Jesu.

13 Ñgu eroparĩcũ peerã fariseo masapũ òpa arĩma.

—Mũhũ mũ basi mũ árĩricũre eropa arĩ wereniguimaacãgu iiaa. Mũ òpa arĩ wereniguiri ne waja mara, arĩma erã Jesure.

14 Erã eroparĩcũ Jesu yũhrimi:

—Yũhũ, yũ aridirore masia. Yũ waboro sãre masia. Mũapũ ne irire masibea. Eropigu yũ basi yũ árĩricũre werequeregu iri yũ werera diaye ta ãhraa.

15 Mũa sihajaro mũa sã ãara dihtare masia mũa. Eropirã mũa yũre werewũaa. Yũhũ mũa iro dopa ta werewũabeaa.

16 Masa erã árĩricũre ãagu yũhũ yujugu ta ãhamasibea. Yũ tamera yũre obeodigu mera masia. Eropigu yũhũ masa erã árĩricũre diaye ta ãha masia.

17 Mũare doreri erã gojarapũ òpa arĩ werea: “Masa perã erã yujuro mera erã werecũ erã wereri diaye ta ãhraa,” arĩ were gojañuma.

18 Yũre weregu mera guã perã ãhraa. Yũhũ, yũ árĩricũre werea. Eropigu yũ Pagũ sã weremi yũre. Ñgu ta ãhrimi yũre obeodigu, arĩmi Jesu.

19 —¿Nohogue ãhriri mũ Pagũ? arĩ serẽpima erã.

—Yure mua masibeaa. Yu Pagu säre masibeaa. Yure masirã, yu Pagu säre masiboaya, arĩ yuhrimi Jesu eräre.

²⁰ Jesu eräre buhegu eropa arĩ wereniguimi Goãmu wihigue erã niyeru apiri comoro pohro. Igũ ñero tariburisubu ejabiribu dohpa. Eropirã erã mera igũ árĩquerecũ ta igũre ñeabirima.

Yu waboroguere muapu wamasisome, arĩnumi Jesu

²¹ Dipaturi masa mera gua árĩrisubu Jesu eräre weremi daja:

—Yu aridirogue waguca. Yu wara puhru yure amarãca mua. Yu waboroguere muapu wamasisome. Eropirã mua ñeri dipuwajacurã sirirãca, arĩ weremi Jesu.

²² “Yu waboroguere muapu wamasisome,” igũ arĩcũ peerã,

—¿Ihĩ igũ basi wejẽ sirigucuri eropa arĩgu? arĩma judio masa erã basi.

²³ Erã basi erã eroparĩcũ Jesu weremi eräre:

—Muapu i yeba majarã ahraa. Yupu umaro majagu ahraa. I yeba dehyoanirã ahraa muapu. Umarogue aridigu ahraa yupu.

²⁴ Muare yu árĩricurire yu werecũ “Diaye árĩbeaa,” mua arĩrã, mua ñeri dipuwajacurã sirirãca mua. Eropigu “Mua ñeri dipuwajacurã sirirãca,” arĩrabu muare, arĩmi Jesu eräre.

²⁵ —¿Noano ahiriri muhu? arĩ serẽpima erã.

—Neguere yu muare arĩdiro dopa ta ahraa yuhu.

²⁶ Muare yu wereburi wuaro duhyania. Eropiro mua ñeri dipuwajare muare yu were-boro wuaro duhyaa dohpa. Eropigu yure obeodigure yu peerare i yeba majaräre werea. Ìgu werera diaye ta àhraa, arĩmi Jesu eräre.

²⁷ “Yure obeodigu,” Ìgu arĩcũ peerã “Mari Pagu árĩcumi,” arĩ pepibirima erã.

²⁸ Erã eropa arĩ pepibiricũ ìagu Jesu weremi eräre:

—Yure masure Goãmũ ìgu obeodigure mua crusa mera pabia aĩ wahgũ nugurāca. Mua eropa iirã, “Ìgu Goãmũ ìgu obeodigu ta àhrimi,” arĩ masirāca yure. Eropirã yu gamero dopa ta iibigu yu árĩrire masirāca. Eropirã yu Pagu ìgu yure ìgu buhera dihtare weregu yu árĩcũ säre masirāca mua.

²⁹ Eropigu yure obeodigupu yu mera àhrimi. Ìgu gamerire umuri nucu iiniguia. Eropigu ìgu yure ne cóabeami, arĩmi Jesu.

³⁰ Ìgu eroparĩcũ peerã masa bajarã ìgure umupeoma.

Goãmũ poräre, ñerire iirã säre wereñumi Jesu

³¹ Eropirã gajirã judio masa Jesure umupeoma. Eropigu Jesu eräre weremi:

—Yu dorerire iipehorã árĩrã, diaye ta yu buherã àhraa mua.

³² Eropirã diaye ta masirāca mua. Diaye árĩrire masirã, ñero iirire duhumasirāca. Eropirã pohro majarã wiunirã iro dopa árĩrāca mua, arĩmi Jesu eräre.

33 Ìgu eroparĩcũ peerã erã õpa arĩ yũhrima daja:

—Guapũ iribojegue majagu mũrũ Abrahã pãramerã árĩturiarãgue ãhraa. Eropirã ne gajirã pohro majarã árĩbeaa gua. Eropigu “Pohro majarã wiunirã iro dopa árĩrãca,” arĩgu ¿dohpa arĩgu eropa arĩri mũhũ? arĩ serẽpima erã Jesure.

34 Erã eroparĩcũ peegu Jesu õpa arĩmi erãre:

—Diaye mũare arĩgu iiaa. Árĩpehrerã ñerire iirãpũ erã ñeri iirire duhumasibeamã. Eropiro iri ñeripũ erãre dorea. Eropa árĩrã árĩrã pohro majarã iro dopa ãhrima erã.

35 Pohro majagupũ ìgu opũ magũ iro dopa árĩbeami. Doreri opabeami. Iri wihi majagu magupũ umuri nũcũ diaye ta ìgu pagũ doreri opami.

36 Yũhũ Goãmũ magũ ãhraa. Eropigu ìgu doreri opaa. Eropirã mũa ñerire yũ duhucũ iinirã árĩrã diaye ta ñerire duhunirã árĩrãca mũa.

37 Abrahã mũrũ pãramerã árĩturiarã mũa árĩcũ masia. Eropa árĩquererã ta yũ wereripũre peediabeaa mũa. Eropirã yũre wejẽdiaa mũa.

38 Yũ Pagũ ìgu yũre masicũ iirare werea mũare. Yũ eropa werequerecũ ta mũa pagũ ìgu doreripũre iiaa mũa sã, arĩmi Jesu erãre.

39 —Abrahã mũrũ iribojegue majagu gua pagũ mũrũ árĩmũripũ, arĩ yũhrima erã.

Erã eroparĩcũ Jesu yũhrimi:

—Abrahã mũrũ porã árĩrã ìgu iidiro dopa ta iiboaya mũa.

⁴⁰ Goãmũ yure diaye ïgu wererire muare yu werequerecũ ta yure wejẽdiaa mua. Abrahã marũpu ne eropa iibiridi árĩmi.

⁴¹ Mua pagũ ïgu iidiro dopa ta iiaa mua, arĩmi Jesu erãre.

Ïgu eroparĩcũ erã yãhrima:

—Mojoto diribiridigo porã árĩbeaa gua. Yu-jugu ta ãhrimi gua pagũ. Ïgu ta ãhrimi Goãmũ, arĩma erã.

⁴² Erã eroparĩcũ Jesu yãhrimi:

—Goãmũ mera majagu árĩdigũ ta õguere aribũ yũhũ. Eropirã Goãmũ mua Pagũ ïgu árĩcũ yure mahiboaya mua. Yu gamero aribiribũ yũ tamera. Yu Pũ Goãmũ ïgu obeocũ aribũ õguere.

⁴³ ¿Duhpirã yũ wereniguirire peebeari mua? Yu wererire yujuro bojebeaa mua. Eropirã peebeaa mua.

⁴⁴ Mua pagũpu watĩ ãhrimi. Eropirã watĩ ïgu gamerĩpure iidiaa mua. I yeba negohraguere árĩnũgacũgue, dohpague sãre ïgu masare wejẽgu ãhrimi. Ïgure diaye maja ne mara. Eropigu ïgu ne diaye majare wereniguibeamĩ. Ïgu negohraguere gũyanũgadigu árĩmi. Eropigu ïgu eropa gũyaniguigu árĩgu, gũyarire weremĩ.

⁴⁵ Yũpu diaye majare werea muare. Eropa yũ werecũ peebeaa mua.

⁴⁶ “Mũhũ ñero iigu ãhraa,” arĩmasibeeaa mua yure. ¿Diaye muare yũ werequerecũ ta duhpirã peebeari mua?

⁴⁷ Goãmũ porãpu ïgu wereniguirire peema. Ïgu porã árĩbirã ïgu wereniguirire peebeama, arĩmi Jesu erãre.

Abrahã muru ïgu árïboro core Cristo árïmũhtatuhañumi

⁴⁸ Ìgu eroparĩcũ peerã judio masa ïgure òpa arĩma:

—“Mũhu Samaria majagu ãhraa. Eropigu watĩ mera goroweregu ãhraa mũhu,” gua arĩra diaye ta ãhraa, arĩma erã Jesure.

⁴⁹ Erã eroparĩcũ peegu òpa arĩ yũhrimi Jesu:

—Goroweregu árĩbeaa yũhu. Yũ Pagure umupeoa. Mũapu yũre umupeobeaa.

⁵⁰ Yũre masa erã umupeorire amabeaa yũhu. Yũ Pagupu yũre umupeocũ gahmemi masare. Ìgu tamera yũ árĩricũre òaro ïha masigu eropa ta umupeodoremi. Eropigu yũ Pagu erã yũre gamebiriri dipuwaja, dipuwaja moagucumi.

⁵¹ Diaye mũare arĩgu iiaa. Yũ dorerire iigu mũuri nũcu Goãmu mera eropa árĩniguicãgucumi, arĩmi Jesu.

⁵² Ìgu eroparĩcũ peerã òpa arĩma erã:

—Dohpague tamerare mu watĩ mera goroweregu árĩcũ gua òaro masia. Abrahã muru sĩa wañumi. Goãmu yare weremũhtanirã sã sĩa wañuma iribojegue. Eropigu “Yũ dorerire iigu mũuri nũcu Goãmu mera eropa árĩniguigucumi,” arĩgu, ¿dohpa arĩgu eropa arĩri mũhu?

⁵³ ¿Gua ñecu muru tauro turari mũhu? Ìgu, Goãmu ya weremũhtanirã sã sĩa wañuma iribojegue. ¿Mũpu nihino ãhriri eropa arĩ wereniguigu? Mu eropa arĩro dopa árĩbeaa mũhu, arĩma erã.

⁵⁴ Erã eroparĩcũ peegu Jesu werenemomi:

—Yuhũ yũ basire umupeodoreri duhpiburi áríbeaa. Yũ Pagupũ yũre umupeodoregũ áhrimi ĩgũ. “Gũa Pagũ” mũa arĩgũpũ yũ Pagũ ta áhrimi.

⁵⁵ Muapũ yũ Pagũre ne masibeaa. Yuhũ ĩgũre masia. “Ĭgũre masibeaa,” arĩgũ mũa iro dopa ta gũyaricũgũ áríboaya yuhũ. Diaye ta ĩgũre masia. Eropigũ ĩgũ dorerire iiaa.

⁵⁶ I yebaguere yũ áríboro coregue mari ñecũ murũ Abrahã murũ masimũhtatuhamũriĩnumi yũre. Eropa masigũ ĩgũ mucubirimũriĩnumi, arĩmi Jesu.

⁵⁷ Ĭgũ eroparĩcũ erã yũhrima:

—Abrahã murũ iribojegue majagũ áhrimi. Mupũ cincuenta bojori opanibeaa. ¿Eropigũ mũhũ ĩgũ murũre duhpigũ ĩha masiboyuri? arĩma judio masa ĩgũre.

⁵⁸ —Diaye mũare arĩgũ iiaa. Abrahã ĩgũ áríboro core yũpũ árímhũtatuhabũ, arĩmi Jesu erãre.

⁵⁹ Ĭgũ eroparĩcũ peerã erã utãyerire aĩ ĩgũre deadiarima. Erã eropa deadiaquerecũ ta Jesupũ Goãmũ wihigue árídigũ duhri wiria wami.

9

Cuiri ĩhajabigũre ðaro ĩagũ wacũ iĩnumi Jesu

¹ Jesu gũa ĩgũ buherã mera mague tariarã gajigũre cuiri ĩhajabigũre bocajabũ. Ĭgũ ne masa dehyoagũgue ta cuiri ĩhajabigũ arĩpũ.

² Gũa sã ĩgũre ĩarã serẽpibũ Jesure.

—Buhegũ, ¿ihĩ duhpigũ cuiri ĩhajabigũ masa dehyoayuri? ¿Ñerire iimũriyuri eropa wagũ? ¿O

ĩgu pagu sumará erã ñero iira dipuwaja eropa wayuri ĩgu? arĩ serẽpibu gua Jesure.

³ Gua eroparĩcũ peegu õpa arĩ yũhrimi:

—Ihĩ ĩgu pagu sumará sã erã ñerire iira sã ĩgure cuiri ĩhajabiricũ iibeaa. Goãmupũ ĩgure cuiri ĩhajabiricũ iimi. ĩgure ĩacũ iibu masare ĩgu turarire ii ĩhmuburire apimi Goãmũ.

⁴ Yũre obeodigu ĩgu apirare yũre iiro gahmea dohpaguere. Ñamiguere mari mohmemasibiro dopa ta pũhrũgue yũre obeodigu ĩgu apirare iimasibeeaa yũhũ.

⁵ I yebaguere i yeba majarãre Goãmũre masicũ iiaa, arĩmi Jesu.

⁶ Eropa arĩtuha yebague disico ehomepimi. ĩgu disico ehomepirare nicu mera mohmore nijagu, cuiri ĩhajabigũre ĩgu cuirire sũmi.

⁷ Eropa sũgu õpa arĩmi Jesu:

—Siloé waĩcũri gobegue mũ cuirire coegu waque, arĩmi Jesu. Siloé ero majarã ya mera arĩrã obeora gobe arĩrã iima.

Jesu ĩgu cuiri coedoredigupũ waha, coetuhaja, cuiri ĩagũgue dujajapũ ĩgu ya wihigue.

⁸ ĩgu dujajacũ ero majarã ĩgure ĩañorã. Ero core niyeru serẽdigu ĩgu árĩcũ ĩanirã ĩgure õpa arĩñorã erã basi:

—¿Ihĩ sohõ árĩdigu niyeru serẽdoadigu árĩbeari? arĩñorã erã.

⁹ —Ĩgu ta ãhrimi, arĩñorã gajirã.

—Ĩgu árĩbeami. Eropa árĩbiriqueregu ta ĩgu iro dopa ta bejagu ãhrimi, arĩñorã gajirã.

Erã eroparĩcũ peegu cuiri ĩhajabiridigupũ õpa arĩpũ:

—Îgu ta âhraa yuhũ, arĩpu erãre.

¹⁰ Îgu eroparĩcũ masa ãgure serẽpiñorã:

—¿Cuiiri ãhajabiridigu árdigu dohpa ii ãhari mũhũ? arĩ serẽpiñorã erã ãgure.

¹¹ —Jesu waĩcũgu disicore nicu mera mohmore yũ cuirire sũami. Yũre sũtuhaja “Siloé waĩcũri gobegue mũ cuirire coegu waque,” arãmi yũre. Îgu eroparĩcũ coegu ejabu yuhũ. Eropa yũ coera pũhrũ yũ cuiiri õaro dehyoabũ yũre, arĩ werepũ ãgu masare.

¹² —¿Mũre Eropa iidigu nohogue árcuri ãgu? arĩñorã erã.

—Õba. Noho árgũ árcumi, arĩpu ãgu

Cuiiri ãhajabiridigũre fariseo masa serẽpiñuma

¹³ Eropa arĩ wereniguituha erã cuiiri ãhajabiridigũre fariseo masa pohrogue aĩ ejañorã.

¹⁴ Irinũ Jesu dihta nicure mohmore cuiiri ãhajabigũre õagu iiranũ Sabadonũ árĩbũ. Irinũ gũa soorinũ árĩbũ.

¹⁵ Eropirã fariseo masapũ ãgure serẽpiñorã daja.

—¿Dohpa ii ãhari mũhũ? arĩ serẽpiñorã erã.

—Nicu mera yũ cuirire sũami. Eropigu yũ cuirire coera pũhrũ ãhaa yuhũ, arĩ werepũ ãgu erãre.

¹⁶ —Îgu mari soorinũ mari mohmedore-biririnũre mohmeami. Eropigu ãgu Goãmũ yagu árĩbeami, arĩñorã gajirã fariseo masa.

Gajirãpu õpa arĩñorã:

—Ñerire iigu árĩgu òpa ìre òagu wacũ iima-sibeami. Eropigu ìgu òagu árĩbocumi, arĩñorã gajirã Jesure.

Eropirã erã, erã basi pe curu dũca wariñorã.

¹⁷ Eropirã dipaturi erã cuiri ìhajabiridigure serẽpinemoñorã daja.

—¿Mũre mũ cuirire òaro iidigure dohpa arĩ pepiri mũhũ Jesure? arĩñorã erã ìgure.

—Ìgu diaye ta Goãmũ yare weremũhtagũ ãhrimi, arĩpũ cuiri ìhajabiridigupũ.

¹⁸ Negohraguere judio masa òpa arĩ pepiriñorã. “Ìhĩ cuiri ìhajabiridigu árĩbeami,” arĩ pepiriñorã. Eropa arĩ pepirã cuiri ìhajabigu pagũ sũmarãre sihubeoñorã erã.

¹⁹ Sihubeo ìgu pagũ sũmarãre serẽpiñorã fariseo masa oparã.

—¿Ìhĩ diaye ta mũ magũ ãhriri? ¿Mata ìgu cuiri ìhajabigu masa dehyoari? ¿Diaye ta cuiri ìhajabiridigu árĩqueregu dohpa ìi ìhari dohpa-guere? arĩ serẽpiñorã erã ìgu pagũ sũmarãre.

²⁰ —Ìhĩ gua magũ ta ãhrimi. Eropigu mata cuiri ìhajabigu masa dehyoami ìgu.

²¹ Irìre masiquererã ta ìgu ìarare, ìgure ìacũ iidigu sãre masibea gua. Gua magure serẽpique. Bũgu ãhrimi ìgu. Ìgu basi were-masimi ìgu, arĩñorã ìgu pagũ sũmarã.

²² Judio masa oparã ero coreguere òpa arĩtuhãñorã:

—“Jesu ta Cristo mari taubu ãhrimi,” arĩrãre mari buheri wirigue ñajadoresome gua, arĩmuriñorã judio masa gua oparã.

Erã eroparĩcũ peenirã cuiri îhajabigu pagu sumarãpu judio masa oparãre gãi árĩñorã.

²³ Eropa gãirã “Bugu âhrimi îgu. Îgure ta serêpique,” arĩñorã erã judio masa oparãre.

²⁴ Pũhrũ judio masa oparã dipaturi cuiri îhajabiridigure sihubeoñorã. Sihubeo òpa arĩñorã îgure:

—Goãmũ mera diaye wereque mũhũ. Jesure îgu ñeri iigu îgu árĩcũ gũa masia. Eropigu diaye wereque guare, arĩñorã judio masa cuiri îhajabiridigure.

²⁵ Erã eroparĩcũ peegu òpa arĩ yũhripũ îgu:

—Jesure îgu ñeri iigu îgu árĩcũ masibirica yũhũ. Yujuñe ta masia yũhũ. Iribojeguere cuiri îhajabigu árĩmuribũ yũhũ. Dohpaguepure îhaa yũhũ. Iri dihtare masia yũhũ, arĩ yũhripũ cuiri îhajabiridigupũ erãre.

²⁶ —¿Dohpa iiari îgu mure? Mũ cuirire îhajadoregũ dohpa iiari îgu mure? arĩ serêpiñorã erã daja.

²⁷ —Irire ta mure weretuharabugu yũhũ. Yũ Eropa arĩ werequerecũ ta mũa ne peediabeaa yure. ¿Dohpa iidarã yũ dipaturi werecũ peediarĩ mũa? ¿Mũa sã îgu buherã árĩdiari? arĩpu îgu erãre.

²⁸ Îgu eroparĩcũ peerã erã îgure turiñorã.

—Mũhũ Jesu buhegu âhraa. Gũapũ Moise buherã âhraa.

²⁹ Diaye ta Goãmũ Moiserẽ wereniguimuriñumi. Jesure obeodigure gũa masibea, arĩñorã erã cuiri îhajabiridigure.

³⁰ Erã eroparĩcũ yũhripũ îgu:

—¿Ĭgure obeodigure mũa masibiricũ, yure ĩacũ iidigu árĭgu Goãmũ ĩgu obeodigu árĭbiribocuri ĩgu?

³¹ Goãmũ ñeri iigure ĩgu serẽrire peebeamĩ. Iri tamerare mari masia. Ñerire iigure peebiri-queregu ta Goãmũre umupeogure, ĩgu dorerire iigure ĩgu serẽrire peemi Goãmũ.

³² Negohraguere i yeba árĭnũgacũguere, mata masa dehyoagugue ta cuiri ĩhajabigure ne yu-jugũpũre ĩhajacũ iigu marimũripũ.

³³ Eropigu Jesu Goãmũ ĩgu obeodigu árĭbigũ yure ĩacũ iibiriboñumi, arĭpũ ĩgu erãre.

³⁴ Erãpũ õpa arĭ yũhriñorã:

—Mũhũ mata ñegu árĭmũriya. ¿Eropa árĭqueregu ta guare buheri mũhũ? arĭñorã judio masa oparã.

Eropa arĭtuha erã ĩgure cohã wiuñorã.

Jesu yare gamebirã cuiri ĩhajabirã iro dopa ãhrima, arĭ wereñumi Jesu

³⁵ Eropigu cuiri ĩhajabigure erã cohã wiurare Jesu peemi. Eropa peegu cuiri ĩhajabiridigure gua bocajacũ, ĩgure serẽpimi.

—¿Masure Goãmũ ĩgu obeodigure umupeori mũhũ? arĭmi Jesu.

³⁶ —Opũ, ¿noa ãhriri ĩgu? Ĭgure masigu umupeogũra, arĭmi cuiri ĩhajabiridigũpũ Jesure.

³⁷ —Ĭgure ĩhatuhabũ mũhũ. Dohpaguere mũ mera wereniguigu ĩgu ta ãhraa yũhũ, arĭmi Jesu cuiri ĩhajabiridigure.

³⁸ —Opũ, mũre umupeoa yũhũ, arĭmi cuiri ĩhajabiridigũpũ.

Eropa arĩgu ĩgu Jesu pohro mereja ĩgure umupeomi.

³⁹ ĩgu eropa umupeocũ ĩagu ōpa arĩmi Jesu masare:

—Ōarã, ñerã sã erã iirare masicũ iibu aribu yuhũ. Cuiiri ĩhajibirã erã ĩabiro dopa ta yu Pagure masibirã āhrima. Eropa masibirãre yu Pagure masicũ iigu aribu yuhũ. “Gua ōaro masia,” arĩ pepinirã sãre ōaro erã masibirirare masicũ iigu aribu yuhũ, arĩmi Jesu.

⁴⁰ ĩgu eroparĩcũ peerã bajamerãgã fariseo masa ĩgure ōpa arĩma:

—“Cuiiri ĩhajibirã erã ĩhamasibiro dopa ta masibea mũa sã,” ¿arĩri mũhũ guare? arĩma fariseo masa Jesure.

⁴¹ Erã eroparĩcũ Jesu ōpa arĩmi:

—“Cuiiri ĩhajibirã erã ĩha masibiro dopa ta diaye ōaro masibea gua,” mũa arĩcũ dipuwaja mariboya. “Gua ōaro masirã āhraa,” mũa arĩrã āhraa. Eropirã yũre peediabirira dipuwaja mũare dipuwaja āhraa dohpaguere, arĩmi Jesu erãre.

10

Oveja ĩhadibugu queoriñere wereñumi Jesu

¹ Pũhrũ queoriñe mera werenigui queogu buhebu ōpa arĩmi Jesu guare gajirã masa sãre:

—Diaye arĩgu iiaa mũare. Oveja diburi sãriro disiporo ñajabigupũ gajipugue ñajagupũ yajari masũ āhrimi.

² Disiporo ñajagupũ ovejare ĩhadibugu āhrimi.

³ Disiporo coregu disiporo pāgūmi ovejare iħadibugu iġu ñajariborore. Ovejare iħadibugu eracū iġu wereniguirire peerā āħrima iġu oveja. Erāre sihugu, erā waī mera sihubeomi iġu. Eropiġu erāre sārirogue árīrāre sihu wiunigui-mi disiporogue.

⁴ Iġu yarāre árīpehrerāre sihu wiu erāre maħtanuġajami. Ovejapū iġu wereniguirire masirā, iġure nūrusiama.

⁵ Gajigure erā masibigure nūrusiabeama erā. Eropirā gajirā erā wereniguirire peerā, ġui omagā wahama, arīmi Jesu masare.

⁶ Iri iġu werequerecū ta irire peerā masibirima erā.

Jesu ovejare ōaro iħadibugu iro dopa iġu yarāre ōaro iħadibumi

⁷ Eropiġu dipaturi Jesu erāre ġua sāre weremi daja:

—Diaye mūare arīġu iiaa. Ovejare diburi sārīro disiporo iro dopa āħraa yuħu.

⁸ Árīpehrerā yu core arinirā ġuyarire buherā yajari masa iro dopa āħrima. Erā eropa árīquerecū ta oveja iro dopa árīrā yaharāpū gajirāre ne pee wahġābeama.

⁹ Yu ovejare diburi sārīro disiporo iro dopa āħraa. Iri disiporo ñajarā iro dopa ta āħrima yure umupeorā. Eropiġu erāre peamegue wabonirāre taugura. Ovejare cāħmotari sārīro erā cāħmotaro dopa ta yu taunirāre cāħmotaguca. Eropirā erā gamerire oparācoma, arīmi Jesu.

¹⁰ Eropa arītuha ōpa arīnemomi:

—Muare guya buherã ovejare yajari masa iro dopa âhrima. Gajirã yajadiarã wejêdiagârîma. Oveja iro dopa árîrã yaharã árîpehrerînûri Goãmû mera árîcû iigû aribû yûpû. Eropigû yaharã ûmûri nûcû erã ôaro árîcû iibu aribû yûpû.

¹¹ Ovejare ôaro îhadibugû iro dopa árîgû âhraa yûhû. Ovejare ôaro îhadibugû sîribu árîqueregû ta îgû ovejare câhmotaniguigûcumî. Yaharã Goãmû mera erã eropa árîniguiburire sîrigûca.

¹² Îgû mohmeri masûpû ôaro ovejare îhadibugû árîbeamî. Eropirã oveja îgû yarã árîbeamâ. Eropigû nûgû majagû diaye ovejare ñeagû îgû aricû îagû îgû mohmeri masûpû ovejare cóãcã gûi omagã wahamî. Îgû eropa cohâpigâra pûhrû, nûgû majagû diaye îgû ovejare îgû ñeacû îarã ovejapû omasirigã wahamâ.

¹³ Îgû mohmeri masûpû îgû wajatari dihtare gahmemî. Eropigû îgû ovejare ôaro îhadibudiabeamî, arîmî Jesu.

¹⁴ Eropa arîtuha ôpa arînemomî queorîñe mera:

—Ovejare ôaro îhadibugû iro dopa âhraa yûhû. Eropigû yaharãre masia yûhû. Eropirã yaharã sã yûre masima.

¹⁵ Eropa ta yû Pagû sã yûre masimî. Eropigû yû sã yû Pagûre masia. Yaharã Goãmû mera erã árîniguiburire sîrigûca.

¹⁶ Gajirã oveja gajî sâriro majarã iro dopa árîrã gajirã masa sã yaharã árîrãcomâ. Erã sãre aîgûca. Eropirã yû wereniguirire

pee wahgārācoma erā sã. Eropirã yaharã árîpehrerã yuju curu ta árîrācoma. Eropigu yu dihta yaharāre îhadibuguca, arîmi Jesu.

¹⁷ Eropa arîtuha ôpa arînemomi daja:

—Yaharã Goāmũ mera erã árîniguiburire sîriguca yuhũ. Yu sîrira puhru masa muriaguca. Yu eropa iibu árîcũ yu Pagu yure mahimi.

¹⁸ Yu wejêdorebircũ yure wejêmasibiriboñuma erã. Yu gamero mera yure wejêrācoma. Eropigu yaharã Goāmũ mera erã ya árîburire sîriguca. Sîrimasia yuhũ. Eropigu masa muriamasiasia. Yu Pagu yure irire ta iidoremi, arîmi Jesu.

¹⁹ Îgu eroparîcũ peerã judio masa pe curu dũca warima daja. Gajirã gajirope pepi, gajirã sã gajirope pepinirã árîma.

²⁰ —Îgu watîre opami. Eropigu goroweregu āhrimi. ¿Duhpirã îgure dipaturi peeri mua? arîma gajirã bajarã judio masa.

²¹ Gajirāpũ ôpa arîma:

—Watî mera goroweregu árîgu eropa ôaro arî wereniguibiriboñumi. Cui ri îhajabigure îacũ iimasibiriboñumi watîre opagu. Eropa árîgu árîgu îgu watîre opabeami, arîma gajirã judio masa.

Judio masa Jesure gamebiriñuma

²² Gajinu Jerusaléngue bosenu iirã iima dipaturi judio masa. Goāmũ wihire erã Goāmũ ya árîburire erã apiri bosenu árîbũ. Irisubu yura wahgũro árîbũ.

²³ Irinu Salomo waĩcũri taribugue Goãmu wi-higue árĩri taribure Jesu gua mera ihacurigu iimi.

²⁴ Iri taribugue ĩgu árĩcũ ĩarã judio masa ĩgu pohrogue gamenere ĩgure serẽpima daja:

—Yoatariari boje guare õaro werebeaa muhu. Diaye guare õaro were purumujuque. ¿Cristo Goãmu ĩgu obeodigu ta ahriri muhu? arĩma erã ĩgure.

²⁵ Erã eroparĩcũ peegu õpa arĩ yuhrimi Jesu:

—Muare weretuhabu yuhu. Yu eropa werequerecũ ta yure peebeaa mua. Yu Pagu ĩgu dorero dopa ta ĩgu turari mera ii ĩhmurabu muare. Eropa iigu yu Cristo árĩrire ta muare ĩhmugu iirabu.

²⁶ Yu eropa ii ĩhmuquerecũ ta yure peebeaa mua. Muapu yaharã árĩbeaa. Eropirã gajigu yarã oveja iro dopa árĩrã yũpũre peebeaa mua.

²⁷ Oveja erãre ĩhadibugure erã peediro dopa ta yaharã yure peema. Eropigu erãre masia yuhu. Eropirã erã yu mera wahama.

²⁸ Eropigu umuri nucũ Goãmu mera árĩcũ iiaa erãre. Eropirã erãpu peamegue wasome. Eropigu yaharãre yu ĩhadibucũ gajirãpu ne yure emamasibeama erãre.

²⁹ Yu Pagu yaharãre yure odigu yu tauro turami. Eropirã yu Pagu sã yaharãre ĩgu ĩhadibucũ gajirã ĩgu sãre ne emamasibeama.

³⁰ Yuhu, yu Pagu mera yujugu ta ahraa, arĩmi Jesu judio masare.

³¹ ĩgu eroparĩcũ peerã judio masapu ĩgure deaburi utãre dipaturi aĩma daja.

³² Erã eropa iicũ ĩagu Jesu erãre serẽpimi:

—Yũ Pagũ ãgu turari mera baja deyoro moarire ii ãhmurabũ muare. ¿Ñehenore iira dipuwaja utã mera deadiari mua yure? arĩ serẽpimi.

³³ ãgu eroparĩcũ peerã õpa arĩma erã:

—Goãmũ turari mera mũ ii ãhmuri dipuwaja mure utã mera dea wejẽdiabeaa gua. Goãmure mũ ñero wereniguiri dipuwaja mure utã mera dea wejẽdiaa gua. Masũ árĩqueregu ta mũhũ “Goãmũ ãhraa yũhũ,” mũ arĩri dipuwaja mure utã mera dea wejẽdiaa gua, arĩ yũhrima erã.

³⁴ Erã eropa arĩ yũhricũ peegu Jesu erãre weremi:

—Mua sãre “Goãmarã,” arĩ piyumi Goãmũ. Eropa ta arĩ gojañuma ãgu dorerire erã gojarapũgue.

³⁵ Goãmũ yare erã gojarapũ queoro árĩcũ mari masia. “Gũyari ãhraa,” iripũre arĩmasibea mari. Eropigu ãgu yare pepirãre diaye ta ãgu “Goãmarã,” arĩ piyumi.

³⁶ Goãmũ yure beyenijagu i yebaguere obeomi. Eropigu “Yũhũ Goãmũ magũ ãhraa,” yũ arĩra dipuwaja “Goãmure ñero wereniguigu iimi Jesu,” arãa mua yure. ¿Duhpirã yure eropa arĩri mua?

³⁷ Yũ Pagũ ãgu gamero dopa ta ãgu turari mera yũ ii ãhmubiricũ tamerare yũ buherire “Diaye ta ãhraa,” arĩbiriboya mua.

³⁸ Yũ Pagũ ãgu turari mera yũ ii ãhmuquerecũ ta yũpũre umupeodiabiriboca mua. Eropa umupeodiabiriquererã ta ãgu turari mera yũ ii ãhmucũ ãarã yũ iirare “Diaye ta ãhraa,” arĩque mua. Mua eropa arĩrã, yũ Pagũ mera gua yujuro

mera árĩcũ masirãca mua. Eropirã yuhũ, yũ Pagũ mera yujuro mera yũ árĩcũ masirãca mua. Eropirã peerãca mua, arĩmi Jesu erãre.

³⁹ Īgũ eroparĩcũ erã ĩgũre dipaturi ñeadiarima. Erã eropa ñeadiacũ ĩgũ duhri wiria wami.

⁴⁰ Eropa wiriadigũgue ta Ñu masare ĩgũ waĩyemuhtadirogue Jordán waĩcũriya sipũ majague gũa dipaturi wabũ daja. Eroque dujacãbũ.

⁴¹ Eropirã masa bajarã ĩgũre ĩarã erama. Ōpa arĩma erã erã basi:

—Ñu waĩyegũpũ Goãmũ turari mera deyro moarire ii ĩhmubirimi. Eropa ii ĩhmubiriquerecũ ta árĩpehreri Jesure ĩgũ wererapũ diaye ta āhraa, arĩma masa erã basi.

⁴² Eropirã masa erogue bajarã umupeoma Jesure.

11

Lázaro waĩcũgũ sĩria wañumi

¹ Eropi Judea yebague Betania waĩcũri maca majagũ Lázaro waĩcũgũ árĩmi. Iri maca ĩgũ pagũ porã nome María, Marta mera árĩma.

² Maríapũ Jesure poresuri mera sũbo, igo poari mera ĩgũre tucoebodigo árĩmo. Igo tĩgũ Lázaropũ dorecũgũ iipũ.

³ Eropirã erã nome gajirãre Jesure weredorerã obeoñorã.

—Opũ, mũ mahigũ dorecũgũ iimi, arĩ weredorerã obeoñorã Lázaro pagũ porã nome.

⁴ Erã gua pohrogue eraa, iri querere werecũ peegu õpa arĩmi Jesu guare.

—Dohpaguere Lázaro ïgu dorecũri sĩriburi árĩbeaa. Goãmũ turarire masare ïhmuburire dohpaguere ïgu dorecũmi. Eropirã yũ turari opagu árĩcũ sãre masa ïarãcoma, arĩmi Jesu.

⁵ Jesu Martare, igo pagu mago, Lázaro sãre turaro mahĩmi.

⁶ Eropigu Lázaro ïgu dorecũrire peequeregu ta ero Jesupũ penũ dujanimi.

⁷ Penũ puhru Jesu õpa arĩmi guare ïgu buherãre.

—Dipaturi Judea yebague dujaa warã daja, arĩmi guare.

⁸ —Buhegu, cãrugã ta mure judio masa utã mera dea wejẽdiama. ¿Duhpigũ dipaturi dujadiari muhu? arĩbu gua ïgure.

⁹ Gua eroparĩcũ peegu ïgu erã wejẽmasibirirare weregu, werenigui queori mera guare õpa arĩmi:

—Wuaro guñaricũbiricãque. Yujunũre doce horari gohra ãhraa. Abe umũ majagu árĩcũ õaro ïhaa mari. Eropirã umũre curirã ne cohresome mari.

¹⁰ Naitĩaro curirã cohrema. Abe umũ majagu maricũ õaro ïabeama erã, arĩmi Jesu.

¹¹ Eropa arĩgu guare werenemomi.

—Mari mera majagu Lázaro carĩgu iicumi. ïgu eropa carĩquerecũ ta yuhũ ïgure wahgũgu wagura, arĩmi guare.

¹² —Opũ, Lázaro carĩgu árĩgu tarigucumi, arĩbu gua.

¹³ Gwa eropa arĩquerecũ ta Jesupũ “Carĩgu iicumi,” arĩgu, “Sĩria wami,” arĩgu iidigu árĩmi. Ĩgu “Lázaro carĩgu iicumi,” arĩcũ peerã “Lázaro soogu iicumi,” arĩ pepiribũ guapũ.

¹⁴ Gwa eropa arĩ pepicũ masigu Jesu guare diaye weremi.

—Lázaro sĩria wañumi.

¹⁵ Yũ mariro ĩgu sĩricũ òapũricãa. Eropirã mua yũre umupeonemorãca. Ina ta. Mari ĩarã warã ĩgu pohrogue, arĩmi Jesu.

¹⁶ Toma sũhrũadigu erã arĩgupũ òpa arĩmi guare:

—Mari sã Jesu mera warã. Ĩgũre wejẽrã mari sãre wejẽporo, arĩmi Toma.

Jesu “Eropa árĩniguiacãcũ ĩigu masare masugu ãhraa,” arĩñumi

¹⁷ Eropi gwa erogue ejara pũhrũ ero majarã òpa arĩ werema Jesure:

—Wapicũrinũ taria Lázaro mũrũre masa gobegue erã apira pũhrũ, arĩ werema ĩgũre.

¹⁸ Betaniapũ Jerusalén pohrogã ũhre kilómetros yoaro dujabũ.

¹⁹ Eropirã judio masa bajarã Martare, María sãre ñehamere orerã eranirã árĩma Lázaro ĩgu sĩrira pũhrũ.

²⁰ Eropigu Jesu mera gwa ejaboro pohro árĩcũ peego Martapũ guare bocatĩrigo eramo. Igo bocatĩrigo wacũ Mariapũ igo ya wihi dujadigo árĩmo.

²¹ Eropa bocatĩrigo Marta òpa arĩmo Jesure:

—Opũ, yũ tĩgu ĩgu sĩriboro core mũhũ ohõ árĩcũ ĩgu sĩribiriboañumi.

²² Dohpague sãre Goãmure mu serẽcũ ãgu mu serẽro dopa ta iigucumi, arĩmo Marta Jesure.

²³ —Mu tĩgu masagucumi, arĩmi Jesu igore.

²⁴ —I yeba pehrerinũ ãgu masa m̃ariaborore masia yũhũ, arĩmo igo.

²⁵ Igo eroparĩcũ Jesu weremi daja:

—Yũhũ s̃irininĩre masacũ iigu ãhraa. Masare yu mera eropa árĩniguicũ iigu ãhraa. Yũre umupeogu s̃iriqueregu ta eropa árĩniguicãgucumi.

²⁶ Eropirã árĩpehrerã Goãmũ mera árĩniguirã yũre umupeorã peamegue wasome. ¿Ire masiri mũhũ? arĩmi Jesu igore.

²⁷ —Opũ, masia yũhũ. “Cristo Goãmũ magu i yebague arigucumi,” erã arĩdigu mu árĩcũ masia yũhũ, arĩmo Marta Jesure.

Lázaro ãgu masa gobe pohro Jesu oreñumi

²⁸ Marta eropa arĩtuha igo pagu magore Marĩare sihugo wamo.

—Marire buhegu mari ya macare eranijagu iiami. Mũre sihuami, arĩ yayarogã arĩ werepo Marĩare.

²⁹ Igo eroparĩcũ peego Marĩa pobero mera wahgãnũgaja, gua pohrogue arĩmo Jesure ãago arigo.

³⁰ Erã ya macague ejanibiricarabũ dohpa. Marta guare igo bocatĩridirogue árĩnibu gua.

³¹ Judio masa iri wihi Marĩare ñehamere orerã iininã árĩma. Eropirã igo pobero mera wahgã wacũ ãarã erã igore nũrusiagãnirã árĩma. “Igo tĩgu mũrũre erã apira gobegue orego wago iicumo igo,” arĩ pepinirã árĩrima erã. Eropa arĩ pepirã igore nũrusiagãnirã árĩma.

³² Eropigo María gua pohrogue erago, Jesure iha, iġu guburi pohro merejamo.

—Opu, yu tiġu iġu sīriboro core maħu ohō árīcū iġu sīribiriboañumi, arīmo igo iġure.

³³ Eropiġu igo judio masa igo mera arinirā sã erã orecū iagū Jesupu turaro bujawere ñero sīporācūmi.

³⁴ —¿Lázaro mure mure nohogue opari mua? arī serēpimi Jesu.

—Opu, iagū arique, arī sihugāma erã.

³⁵ Erã eroparīcū peegu Jesu oremi.

³⁶ Iġu orecū iha judio masa opa arīma erã basi:

—Lázaro mure mure Jesu burigā mahirañumi, arīma.

³⁷ Gajirāpu opa arīma:

—Cuirī iħajabigūre iacū iigu āħrimi ihī Jesu. ¿Eropiġu Lázaro iġu sīriboro core masumasi-biriboayuri? arīma gajirā.

Lázarore masuñumi Jesu

³⁸ Eropiġu Jesu dipaturi turaro bujaweremi. Eropirā árīpehrerā Lázaro mure masa gobegue ejabu. Utāyegue árīri gobegue iġu dupu muraro erã sī acura gobegue árību. Eropi iri gobegue wuariye utāye mera erã bihara gobegue árību.

³⁹ —Utāyere aī weaque, arīmi Jesu.

Iġu eroparīcū peego Marta sīridiġu mure pagu mago opa arīmo:

—Opu, dohpague wapicūrinu wahaa iġu sīrira puhru. Eropi iġu dupu muraro urī árīca, arīmo Jesure.

⁴⁰ —“Yure umupeogo Goāmu turarire iagoca,” mure arīrabu, arīmi Jesu Martare.

41 Īḡu eropa arīra pūhrū erā utāyere aī weama. Erā eropa aī weara pūhrū Jesu umarogue īha Goāmure ōpa arīmi:

—Ahū, yure mū peetuhabū. Irire mū iicū masiḡu mucubiria mure.

42 Yure mūhū umuri nūcū peeniguia. Irire masia. Eropa masiquereḡu ta yūhū mū obeodigu ārīcū ōre niguirā erā masiburire mure eropa arīḡu iiaa.

43 Eropa arītuha Jesu turaro gaguiniguimi:

—Lázaro, arique, arī gaguiniguimi īḡu.

44 Īḡu eroparīcū sīridiḡu mūrūpū īḡu mojotorire īḡu guburi sāre suhri gasiri mera erā diridiḡu, īḡu dipurure suhri gasiri mera erā omadiḡu masa gobegue wiririmi.

—Īḡure dirirare pāque īḡure, arīmi Jesu

Judio masa oparāpū Jesure ñeadiariñuma

Mt 26.1-5; Mr 14.1-2; Lc 22.1-2

45 Īḡu eropa masucū īarā bajarā judio masa mera majarā María mera ārīnirā Jesure umupeoma.

46 Gajirāpū erā mera majarā fariseo masa pohroque eja, Jesu īḡu iirare wereñorā erāre.

47-48 Eropirā pahia oparā, fariseo masa oparā sā gamenere, erā basi ōpa arī wereniguiñorā.

—Jesu bajasuburi deyoro moarire ii īhmumi. Īḡu eropa iicū, “Irire iibita,” mari arībiricū ārīpehrerā masa īḡure umupeo, īḡu mera wabocomā. Eropirā Roma majarā oparā Goāmū wi-hire cóādorē rā obeorācoma erā yarā surarare. Mari ya yeba sāre emarācoma erā. Mari ya yeba majarā Jesure erā opū erā apicū īarā

Roma majarã oparã guarã ñero iirãcoma marire. ¿Eropa iirã dohpa iirãcuri dohpaguere? arĩ wereniguiñorã erã erã basi.

⁴⁹ Erã eropa arĩquerecũ ta gajigu Caifa waĩcugu iri bojorire pahia opu árĩgu erãre werepu.

—Muapu ne masibea.

⁵⁰ Judio masa árĩpehrerã mari ya árĩburire yujugu masu ĩgu sĩricũ õhaa. ĩgu sĩribiricũ mari árĩpehrerã judio masa pehrea waboca. Irire mua masibea, arĩmi Caifa erãre.

⁵¹ Eropa arĩgu ĩgu gamero eropa arĩbiriñumi. Pahia tauro opu ĩgu árĩcũ judio masa ya árĩburire Jesu ĩgu sĩriborore Goãmupu Caifare eropa arĩ weredoreñumi.

⁵² Jesu ĩgu sĩrigu judio masa ya dihta sĩribiriñumi. Sĩrigu árĩpehrerã Goãmũ porã i yeba árĩpehrero árĩrã sãre erã ya árĩburi sãre sĩriñumi Jesu. Erã yuju curu árĩboro dopa sĩriñumi.

⁵³ Caifa eroparĩcũ peerã erã “¿Jesure dohpa ii wejẽrãcuri mari?” arĩ wereniguirã ĩgure wejẽmorã iĩñorã.

⁵⁴ ĩgure erã wejẽdiacũ masigu Jesu bajarã judio masa watope dipaturi curigu wabirimi. Eropigu masa marirogã Efraín waĩcuri macague guare sihu wami. Guare iri maca sihu dujanimi Jesu.

⁵⁵ Irisubure Pascua bosenu gua judio masa bosenu árĩboro merogã duhyabu. Eropirã bosenu core masa bajarã gaji macari majarã masa Jerusaléngue gamenerema. Pascua majare

erã baboro core Goãmũ ya árĩburire erã basi coemorã ejanirã árĩma.

⁵⁶ Eropirã erã Jesure amarã iĩñorã. Erã eropa amacũ ĩarã Goãmũ wihigue árĩrã õpa arĩ wereniguiñorã:

—¿Bosenũre ĩagu aribiribocuri Jesu mũa pepicũ? arĩ wereniguiñorã erã basi.

⁵⁷ Eropirã pahia oparã, fariseo masa sã õpa arĩ weredoreñorã masare:

—Jesu ĩgu árĩrore mũa masirã wereque guare. ĩgure ñeamorã iiaa gua, arĩñorã oparã masare.

12

María Jesu guburire poresuri mera pipeoñumo

Mt 26.6-13; Mr 14.3-9

¹ Pascua bosenu seis nũri gohra duhyacũ Jesu gua ĩgu buherã mera Betaniague ejabũ. Lázaro Jesu ĩgu masudigu iri maca majagu árĩmi.

² Gua ejara pũhrũ Jesu sã gua ya bari árĩburire iima gajirã. Eropirã Lázaro, Jesu, gua mera mesare doajabũ. Gua eropa doajara pũhrũ Marta barire peomo guare.

³ Eropigo María poresuripure nardo waĩcũri goripure yuju kilo deco aĩgãri, Jesu guburire pipeomo. Pipeotuha igo poari mera tucoemo. Igo eropa pipeora pũhrũ iri wihi õaro poresu sehya wabũ.

⁴ Igo eropa iicũ ĩha gua mera majagu, Jesure ĩhaturirãre wiabu Juda Iscariotepũ õpa arĩmi:

⁵ —¿Duhpigo iri poresuri eropa iisiriri igoa? Irire igo duaboañumo. Irire duago yuju bojori mohmeri wajapure wajataboañumo. Eropigo mojomorocũrãre oboañumo igo, arĩmi ĩgu.

⁶ Judapɛ mojomorocurãre itamudiabiriñumi. Ìgɛ gua ya niyeru dibugɛ árĩqueregɛ ta yajaricugɛ árĩmi. Eropigɛ Ìgɛ gua ya niyeru sãre yujuyerisuburi aĩmɛrimi. Eropigɛ iri niyerure aĩdiagɛ árĩgɛ, eropa arĩñumi Ìgɛ Marĩare.

⁷ Ìgɛ eroparĩcũ peegɛ òpa arĩmi Jesu:

—Eropa arĩbita igore. Igo poresurire yũre igo dũarare yũre pipeoamo yũre erã yaaboro core yũ dũpũre amuyugo. Mojomorocurãpɛ mũa mera eropa árĩniguicãrãcoma. Eropirã mũa gamero erãre omasia mũa.

⁸ Yũpɛ i yebaguere eropa árĩniguicãsome, arĩmi Jesu.

Pahia oparã Lázarore wejẽdiañuma

⁹ Eropirã Jesu Ìgɛ Betaniague árĩcũ peerã judio masa bajarã Ìgũre ìarã arima. Ìgɛ dihtare ìarã aribirima. Lázarosĩridigɛ Jesu Ìgɛ masudigũre Ìgɛ sãre ìarã arirã iima.

¹⁰ Erã ìarã ejarare pahia oparã masirã Lázarore wejẽdiañorã.

¹¹ Lázarosĩridigɛ Jesu Ìgɛ masudigũ árĩcũ ìarã bajarã masa Jesure umupeoma. Ìgɛ eropa masucũ ìarã bajarã judio masa erã pahia erã buheripũre cóãma. Erã eropa cóãcũ ìarã pahia oparãpɛ guataria wa, Lázarosãre wejẽdiañorã.

Jerusaléngue ejañumi Jesu

Mt 21.1-11; Mr 11.1-11; Lc 19.28-40

¹² Pascua bosenu erã iicũ bajarã masa Jerusaléngue ìarã wanirã árĩma. Gajinu Jerusaléngue Jesu Ìgɛ waburire masa peenirã árĩma.

¹³ Eropirã bejepũre aĩgã, ĩgũre bocatĩrirã wama. Eropa bocatĩrirã õpa arĩ gaguiniguima erã.

—Ĩre umupeorã. Ihĩ Goãmũ ĩgũ obeodigũ õaro ariporo. Ihĩ judio masa mari opũ ta ãhrimi, arĩ gaguiniguima erã.

¹⁴ Jesu burrogã ĩgũ bocadigũ weca peyami. ĩgũ eropiigũ Goãmũ yare erã gojarapũ werediro dopa ta iimi. Õpa arĩ gojañumi Goãmũ yare werenyumũhtadigũ.

¹⁵ Jerusalén waĩcũro majarã gũibiricãque mũa. ĩaque. Mũa opũ burrogã weca peyagãrimi, arĩ weremũhtañumi Goãmũ yare erã gojarapũgue.

¹⁶ Irire gũa ĩgũ buherã õaro masinibiribũ. Eropa masibiriquererã ta umarogue Jesu ĩgũ mariara puhũ gũa erã gojara murare guña boca pee masibũ. Õpa arĩ pepibũ: “Goãmũ yare erã gojarapũgue Jesure weremũhtañuma. Eropiro Goãmũ yare erã gojarapũ arĩdiro dopa ta sihajabũ Jesure,” arĩ pepibũ gũa basi.

¹⁷ Lázarore erã apira gobegue árĩgũre Jesu ĩgũ piyucũ ĩgũre ĩgũ masucũ ĩanirãpũ weresirinigu-inirã árĩma masare.

¹⁸ Eropirã Lázarore Jesu ĩgũ masurare erã peenirã árĩrã masa bajarã Jesure bocatĩrirã wama.

¹⁹ Erã Jesure eropa umupeocũ ĩarã fariseo masa erã basi õpa arĩñorã.

—Árĩpehrerã Jesu yarã dihta warã iima dohpaguere. Eropirã mari dohpa iimasibea erãre, arĩñorã fariseo masa erã basi.

*Bajamerãgã Griego masa Jesure
amagãriñuma*

²⁰ Eropi bosenũ Goãmũ wihigue Goãmure umupeorã eranirã mera majarã bajamerãgã griego masa árĩñorã.

²¹ Eropirã erã Felipe pohrogue erañorã. Felipepũ Betsaida waĩcũri maca Galilea yeba árĩri maca majagũ árĩmi. Eropirã ĩgũ pohrogue erarã õpa arĩñorã ĩgure:

—Jesure ĩadiaca gua, arĩñorã erã.

²² Erã eroparĩcũ peegũ Felipe Andreguere weregũ wapũ. Eropirã erã perã Jesure werema.

²³ Erã werera pũhrũ Jesu guare weremi:

—Yũhũ masũ Goãmũ ĩgũ obeodigũ ãhrra. Yũre árĩpehrerã umupeoburisubu árĩro ĩiaa dohpaguere. Dohpaguere yũ sĩriburisubu árĩro ta ĩiaa.

²⁴ Diaye mũare arĩgũ ĩiaa. Oteriyere yebague yaabiricũ, iriyere otebiricũ yujuye ta dujaroca. Eropiro iriyere mari otera pũhrũ bajayeri dũcasiua. Eropa ta yũ sĩrira pũhrũ yũre erã yaara pũhrũ bajarã masare Goãmũ mera eropa árĩniguimorãre ĩigũca yũhũ.

²⁵ I yeba mũa árĩrire wũaro pepiboca mũa. Eropa pepirã Goãmure guñabirã peamegue warãca mũa. I yeba mũa árĩrire eropa pepicãrã, Goãmũ mera eropa árĩniguirãca.

²⁶ Yahare iidiarã, yũ buherire õaro peeque mũa. Mũa eropa ĩirã mũa sã yũ árĩboroguere árĩrãca. Yahare ĩigure yũ Pagupũ umupeogũcumi, arĩmi Jesu guare.

Jesu ĩgũ sĩriburiñere wereñumi

27 Õpa arĩnemomi guare.

—Dohpaguere yũhũ ñero sĩporãcũa. ¿Yũ Pagure dohpa arĩgucuri yũhũ? “¿Ahũ, yũ ñero tariborore tauque,” ¿arĩbocuri yũhũ? Irire arĩbeaa yũhũ. Ñero taribu ta i yebaguere aribũ. Eropiro yũ ñero tariburisubũ dohpaguere ãhraa, arĩ weremi Jesu guare ĩgu buherãre.

28 Eropigũ õpa arĩmi ĩgu Pagure:

—Ahũ, mũ turagũ árĩrire dohpaguere ĩhmuque masare, arĩmi Jesu ĩgu Pagure.

Ĩgu eroparĩcũ ɯmarogue wereniguiro caribũ.

—Turagũ yũ árĩrire masare ĩhmutuhabũ. Dohpaguere eropiigũ dipaturi ĩhmuɣca masare, arĩro caribũ.

29 Eroparĩcũ peerã ero niguirã masa bajarã õpa arĩma:

—Bupu árĩcumi eropa bũsũgũ, arĩma masa.

—Anyu Jesure weregũ iiami, arĩma gajirã masa.

30 Õpa arĩmi Jesupũ:

—ɯmarogue yũre peedorero eropa bũsubiro carabũ. Mũapũre peedorero eropa carabũ.

31 Dohpaguere i yeba majarã erã ñeri iira dipuwaja dipuwajacũrãcoma. I yeba majarã erã opũre watĩre Goãmũ cóãgũcumĩ.

32 Eropigũ crusague yũre erã aĩ wahgũ nugucũ bajarã masare yaharã árĩmorãre iigũca yũhũ, arĩmi Jesu.

33 Eropa arĩgũ crusague ĩgu sĩriborore weregũ iimi Jesu masare.

34 ĩgu eroparĩcũ peerã masapũ ĩgũre õpa arĩma:

—Goãmũ yare erã gojarapũ õpa arãa: “Cristo árĩpehrerĩnũrĩ árĩgũcumĩ,” arĩ gojañuma. ¿İgũ eropa arĩ gojacũ mũre masure Goãmũ ĩgũ obeodigũre dohpa arĩronore mũre wejẽ crusague aĩ wahgũrãcurĩ masa? ¿Goãmũ ĩgũ obeodigũ noa āhrĩrĩ ĩgũ? ¿Cristo árĩbearĩ mũhũ? arĩ serẽpĩma erã Jesure.

³⁵ Erã eroparĩcũ õpa arĩ yũhrĩmĩ Jesu:

—Boyoriñe iro dopa árĩgũ masare Goãmũ yare õaro masicũ iiaa yũhũ. Pũhrũñarĩgã mũa mera árĩsome yũhũ. Mũare yũ buhecũ dohpaguere peeque ñerĩre mũa iĩbirĩburĩre, Goãmũ mera mũa eropa árĩnĩguĩburĩre. Yũ buherĩre peebĩrã naitĩaro curĩrã iro dopa erã waborore masĩ-beama.

³⁶ Eropĩgũ boyoriñe iro dopa ta árĩgũ yũhũ ta āhraa. Eropĩgũ mũare buhegũ Goãmũ yare õaro masicũ iiaa mũare. Dohpaguere yũ waboro core yũre umupeoque. Eropa umupeorã yaharã árĩrãca mũa, arĩmĩ Jesu.

Eropa arĩ weretuha waha wamĩ erãre duhri wahgãgũ.

Judio masa Jesure umupeobĩrĩñuma

³⁷ Bajasuburĩ Goãmũ turarĩ mera erãre Jesu ĩgũ deyoro moarĩre iĩ ĩhmuquerecũ ta judio masa bajarã ĩgũre ne peediabĩrima.

³⁸ Goãmũ yare erã gojarapũ Isaia mũrũ ĩgũ gojadiro dopa ta eropa iĩrã iima erã. Õpa arĩ gojañumi Isaia:

Goãmũ, mũ buherĩre gũa werecũ masa peediabeama. Mũ turarĩre erãre mũhũ iĩ ĩhmuquerecũ ta irĩre “Diaye árĩbeaa,”

arĩma erã, arĩ gojañumi Isaia Goãmũ yare gojarapũgue.

39 Erã eropa peediabiricũ ãagũ Goãmũ erãre masibiricũ iĩñumi. Iri sãre Isaia õpa arĩ gojañumi daja:

40 Cuiiri ãhajibirã iro dopa árĩcũ iidi árĩmi Goãmũ erãre. Eropigũ ãgũ yare masibiricũ iidi árĩmi erãre. Eropirã ãgũ turarire erã ãaquererã ta erã ãarare masibirinirã árĩma erã. Eropirã ãgũ buherire peequererã ta irire masibirinirã árĩma erã. Goãmũ yare masirã erã ñerire cóãdoreboñuma. Eropigũ erãre taubonũmi ãgũ, arĩ gojañumi Isaia Goãmũ yare erã gojarapũgue.

41 Isaia Cristo turarire masiyudigũ eropa arĩ gojamãhtañumi.

42 Gajirã Jesure erã umupeobiriquerecũ ta judio masa sã oparã mera majarã sã bajarã Jesure umupeonirã árĩma. Eropa erã umupeoquererã ta erã fariseo masare gũirã gajirã masare Jesure erã umupeorire werebirinirã árĩma. Irire erã werecũ peerã gua judio masa buheri wihigue erãre ñajadorebiriboñuma fariseo masapũ.

43 Goãmũre mucubiricũ iidiaquererã ta erã tauro masapũre mucubiricũ iidianirã árĩma erã. Eropirã erã Jesure ne umupeorã “Jesu yarã ãhraa,” arĩ gajirãre werediabirinirã árĩma.

Jesu wererire erã peediabiriri dipuwaja masa dipuwajacũrãcoma, arĩ wereñumi Jesu

44 Masa bajarã gua pohro gamenerenirãre Jesu turaro busuro mera weremi:

—Yüre umupeogu yu dihtare umupeobeami. Yüre obeodigu säre umupeomi ñgu.

⁴⁵ Eropirã yüre masirã yüre obeodigu säre masima.

⁴⁶ Yuhu boyoriñe iro dopa ta árĩgu yuhu Goãmu yare buhegu ahraa i yebaguere. Eropigu Goãmu yare muare masicũ iiaa. Yüre umupeogu naiñaro wagu iro dopa ñerire iiniguisome. Yüre umupeogu diaye pepigucumi.

⁴⁷ Gajirã yu wererire peequererã ta irire yuhribeama. Erã eropa yuhribiriquerecũ ta, erã yuhribirira dipuwaja moasome yupu dohpa. I yebaguere dipuwaja moagu arigu aribiribu yuhu. I yeba majarãre peamegue wabonirãre taugu arigu aribu yuhu.

⁴⁸ Yüre gamebigure yu wereri säre gamebigure dipuwaja moari árĩroca. Ñgu yüre peebirira dipuwaja i umu pehrecũ dipuwajacugucumi.

⁴⁹ Yuhu yu gamero werebeaa. Yu Pagu yüre obeodigupu yüre weredoremi. Eropiro yu wereripu ñgu ya wereniguiiri ãhraa.

⁵⁰ Ñgu ya wereniguirire peerã Goãmu mera eropa árĩniguirãca mua. Eropigu yu Pagu ñgu weredoreldiro dopa ta werea muare, arĩmi Jesu guare.

13

Jesu ñgu buherãre guburire coeñumi

¹⁻³ Eropi Pascua bosenu coregã árĩbu. Iri ñamire Jesu gua ñgu buherã mera iri bosenu babu arĩmi. Eropigu i yebare ñgu wiriaborore

ĩḡu Pagu pohro waburire merogã dahyacũ masidigũ árĩmi Jesu.

Gua barisubu Judare watĩ doretuhadigũ árĩmi ĩḡu pepirigue. Eropigũ ĩḡure Simo Iscariote magure Jesure ĩhaturirãre iri ñamire ĩḡu wiaburire doretuhadigũ árĩmi. Jesu ĩḡu yarãre i yeba árĩrãre burigã mahidigũ árĩmi. Eropigũ ĩḡu mahirare ĩhmubu gua guburire coemi. ĩḡu Goãmu pohrogue ĩḡu arirare, pũhrũ ĩḡu umarogue ĩḡu mariaburi sãre masidigũ árĩmi. ĩḡu Pagu Goãmu ĩḡure árĩpehrerã weca opu ĩḡu apira sãre masidigũ árĩmi.

⁴ Eropa masiqueregu wahgãnugaja, ĩḡu suhriro weca majañere tuwea suhriro gasiro mera ĩḡu paru yũjure dirimi.

⁵ Dirituha soropa mera decore pisã, guare ĩḡu buherãre gua guburire coenugami. Guare coetuha ĩḡu dirira gasiro mera tucoemi gua guburire.

⁶ Gajirã buherãre coegã, Simo Pedroguere ejami. ĩḡu guburire ĩḡu coeboro core, Pedropũ ĩḡure õpa arĩmi:

—Opu, ¿yũ guburire coebu iiri mũhu? arĩmi Jesure Pedro.

⁷ —Dohparagã yũhu mũre iiburire masibeaa mũhu. Eropa masibiqueregu ta pũhrũ masigũca, arĩmi Jesu ĩḡure.

⁸ —Yũ guburire ne coesome mũhu, arĩmi Pedro.

—Mũre yũ coebiricũ yahagu árĩsome mũhu, arĩmi Jesu.

⁹ —Opu, yu guburi dihtare coebiricãque. Yu guburire, yu mojotorire, yu dipuru sãre coeque, arĩmi Pedro.

¹⁰ Īgu eroparĩcũ Jesu õpa arĩmi:

—Yujugu masu guhagu ĩgu dupure õaro tu-coepehomi. Eropiro ĩgure dipaturi tucema masiya mara. Īgu guburi dihtare coero gahmea. Árĩpehrerã mua ñeri iirare coenirã mua árĩquerecũ ta yujugu mua mera majagu ĩgu ñerire coeya marigu āhrimi, arĩmi Jesu.

¹¹ Jesu ĩgure ĩhaturirãre wiabure masituhãnumi. Eropa masigu “Yujugu mua mera majagu ĩgu ñerire coeya marigu āhrimi,” arĩnumi ĩgu.

¹² Gua guburire coetuha, suhrirore sañatuha, doajami daja ĩgu doadiro ta. Tuhaja õpa arĩmi guare:

—¿Dohparagã yuhu muare iirare masiri mua?

¹³ Mua yure “Buhegu,” arĩ piyurã, “Opu,” arĩ piyurã diaye ta arĩrã iiaa yure. Muare buhegu, mua opu diaye ta āhraa yuhu.

¹⁴ Eropirã yuhu muare buhegu, mua opu árĩqueregu ta mua guburire yu coecũ mua sã mua mera majarãre guburire coeque.

¹⁵ Dohparagã mua iiburire muare ĩhmuabu. Mua mera majarãre mua itamuburire muare ĩhmuabu. Muare yu iidiro dopa ta mua sã iique.

¹⁶ Diaye muare arĩgu ta iiaa. Mua yu pohro majarã dopa arĩrã yu tauro árĩbeaa. Muare buhedore yu obeorã āhraa mua. Eropirã yu tauro árĩbeaa mua. Eropa iigu ta “Yu iidiro dopa ta iique,” arãbu yuhu muare.

¹⁷ Ire mũa masirã, yũ dorerire iirã, mucubirirã árĩrãca mũa.

¹⁸ “Mũare árĩpehrerãre eropa arĩbeaa. Yũ beyenirãre masia yũhũ. Goãmũ yare erã go-jarapũ arĩdiro dopa ta eropa waroca. “Yũ mera bagũ ta yũre wejẽdiami,” arĩ gojañuma Goãmũ yare erã gojarapũgue.

¹⁹ Ĩgũ yũre eropa wiaboro core ire wereyugũ iiaa mũare. Yũre ĩgũ eropa iira pũhrũ “Jesu ta Cristo Goãmũ ĩgũ obeodigũ àhrimi,” mũa arĩburire ire mũare wereyugũ iiaa yũhũ.

²⁰ Diaye ta mũare arĩgũ iiaa. Yũ obeonirãre gamegũ yũ sãre gahmemi ĩgũ. Eropigũ yũre gamegũ yũre obeodigũ sãre gahmemi ĩgũ, arĩmi Jesu guare ĩgũ buherãre.

Juda Jesure ĩhaturirãre ĩgũ wiaborore wereñumi Jesu

Mt 26.20-25; Mr 14.17-21; Lc 22.21-23

²¹ Eropa arĩ weretuha Jesu turaro bũjaweremi. Eropa bũjaweregũ õpa arĩ weremi ĩgũ guare.

—Diaye mũare arĩgũ iiaa. Yujugũ mũa mera majagũ yũre ĩhaturirãre wiagucumi, arĩmi Jesu.

²² Ĩgũ eroparĩcũ peerã Jesure wiabure masibirã, gũa game ĩhamehtubũ.

²³ Yũhũ ĩgũ buherã mera majagũ Jesu ĩgũ mahigupũ ĩgũ pohro doabũ.

²⁴ Eropigũ Simo Pedro yũre ĩgũ mojoto mera sĩpu serẽpidoremi Jesure ĩgũre wiabure:

²⁵ Eropigũ yũpũ Jesu pohro doadigũ serẽpiñabũ ĩgũre:

—Opũ, ¿nĩhire arĩgũ iiri mũhũ? arĩbũ yũhũ.

²⁶ —Iru panrure mohwa aĩ, yuhũ yoso ogũ ĩgu ta aĩrimi yũre wiabu, arĩmi Jesu.

Eropa arĩtuha iriru panrure ĩgu mohwarañere yosotuha Judare Simo Iscariote magũre omi.

²⁷ Eropigu panre ĩgu ora pũhrũ watĩpũ Judare ñero iidoredigu arĩmi. Eropigu Jesu ĩgũre õpa arĩmi:

—Mũ iiburire yojaro mera ii purumujuque mũhũ, arĩmi Jesu Judare.

²⁸ ĩgu eroparĩcũ peerã gua mesague doanirã Jesu Judare ĩgu arĩrare masibiribũ.

²⁹ Yujurãyeri gua õpa arĩ pepiribũ: “Juda gua niyerure dibugũ aĩrimi. Eropigu bosenu gua baburire asũdoregu obeoami Jesu Judare. Mojomorocũrãre niyerure odoregu iiami Jesu,” arĩ pepiribũ gua yujurãyeri.

³⁰ Eropigu Juda iri panre ñeatuha wiria wami. ĩgu wiriarasubure ñami arĩbũ.

Mama doreriñere wereñumi Jesu ĩgu buherãre

³¹ ĩgu wiriara pũhrũ guare õpa arĩmi Jesu:

—Dohpague tamerare yuhũ masũ Goãmu ĩgu obeodigu yũ turagu arĩrire ĩhmugũcumi Goãmu masare. Eropigu Goãmu ĩgu turagu arĩrire ĩhmugũca yũpũ.

³² Eropigu Goãmu turarire yũ ĩhmucũ ĩgu yũ turari sãre dohparagã ĩhmu purumujugũcumi.

³³ Yũ porã, yũre peeque. Bajamenũrigã mũa mera arĩnigũca. Yũre amarãca mũa. Eropigu judio masare yũ arĩdiro dopa ta mũa sãre arãa. “Yũ waborore mũapũ wamasibeaa,” erãre yũ arĩdiro dopa ta mũa sãre werea.

³⁴ Mama doreriñere muare weregura. Maa mera majaräre mahique maa. Muare yu mahidiro dopa ta maa mera majaräre mahi umupeoque.

³⁵ Eropirã maa mera majaräre maa mahicũ ñha gajirã yaharã maa árĩcũ ñha masirãcoma, arĩmi Jesu.

“Jesure masibea,” Pedro ñgu arĩburire wereñumi Jesu

Mt 26.31-35; Mr 14.27-31; Lc 22.31-34

³⁶ Ñgu eroparĩcũ Simo Pedro Jesure serẽpimi:

—Opũ, ¿nohogue wagucuri mũhũ? arĩmi Pedro. Ñgu eroparĩcũ Jesu yũhrimi:

—Yu waboroguere dohpaguere yu mera wamasibea mũhũ. Dohpaguere wamasibiri-queregu ta pũhrũ yu pohro wagũca, arĩmi Jesu Pedrore.

³⁷ Pedro arĩmi:

—Opũ, ¿duhpigũ dohpaguere mũ mera wamasibiribocuri yũhũ? Yũre erã wejẽdiaquerecũ yũhũ mũre duhusome. Itamugũca, arĩmi Pedro Jesure.

³⁸ —¿Mũ eropa arĩgu diaye ta yũre itamugucuri? Diaye mũre weregu iiaa. “Jesure masibea,” arĩguca mũhũ gajiräre. Æhresubu eropa arĩguca cãreña ñgu wereboro core, arĩmi Jesu Pedrore.

14

Jesu Goãmũ pohroque wari maha iro dopa ãhraa yũhũ, arĩ wereñumi

¹ Pũhrũ Jesu guare õpa arĩ weremi:

—Ne bujawere wuaro guñaricubiricãque. Goãmure “Diaye ta iigu ãhrimi,” arĩ umupeoque. Eropirã yu sãre eropa umupeoque.

² Yu Pagu ĩgu árĩroguere baja wiri ãhraa. Mũa árĩborore amuyugu wagura. Iri diaye ta ãhraa. Eropigu mũare irire werea.

³ Eropigu mũa árĩborore amutuha, dujarigura yuhu. Eropigu yu pohrogue mũa árĩmorãre aĩgu arigura yuhu daja.

⁴ Eropirã yu waburi mare masia mũa, arĩmi Jesu guare ĩgu buherãre.

⁵ —Opu, mu waborore masibea gũa. ¿Eropirã dohpa ii mu waburi mare masirãcuri gũa? arĩ serẽpimi Toma Jesure.

⁶ ĩgu eropa arĩ serẽpicũ Jesupu yuhrimi:

—Goãmu pohrogue wari maha iro dopa árĩgu tiiaa yuhu. Eropigu diaye árĩrire weregu árĩcãgu tiiaa yuhu. Eropigu umaroguere ojo-cariniguicũ iigu árĩgu tiiaa yuhu. Eropirã yure umupeorã dihta yu Pagu pohrogue warãcoma.

⁷ Nere yure masirã árĩrã, yu Pagu sãre masiboaya mũa. Dohpaguere ĩgure ĩhaa mũa. Eropirã ĩgure masituhabu mũa, arĩmi Jesu.

⁸ ĩgu eroparĩcũ Felipe õpa arĩmi:

—Opu, mari Pagure ĩhmuque guare. Iripẽta gahmea gũa, arĩmi ĩgu.

⁹ ĩgu eroparĩcũ Jesu weremi:

—Felipe, ¿yoari boje yu mera árĩqueregu ta, mu masinibeari yure? Yure ĩagu yu Pagu sãre ĩatuhami. “Eropigu mari Pagure ĩhmuque guare,” ¿duhpigu eropa arĩri muhu yure?

¹⁰ Yũ Pagũ mera yujugũ ta ãhraa yũhũ. Irire “Diaye árĩbeaa,” ¿arĩgũ meje iiri mũhũ? Mũare weregũ yũ gamero weregũ iibeaa. Yũ Pagũ werebasagũ iiaa. Eropigũ ĩgũ yũ mera árĩgũ ĩgũ turari mera ii ĩhmumi.

¹¹ Yũhũ, yũ Pagũ mera yujugũ ta ãhraa. Yũ eroparĩcũ irire “Diaye ta ãhraa,” arĩ pepique mũa. Irire “Diaye ta árĩbeaa,” arĩdiarã, Goãmũ turari mera deyoro moarire yũ ii ĩhmurire ĩaque. Eropa ĩara pũhrũ yũ Pagũ mera yũ yujugũ ta árĩrĩre “Diaye ta ãhraa,” arĩ pepique mũa.

¹² Diaye mũaare arĩgũ iiaa. Yũre umupeogu yũ iidiro dopa ta iigũcumi. Eropigũ ĩgũpũ yũ tauro iigũcumi. Yũ Pagũ pohrogue wabu iiaa dohpaguere. Eropigũ yũre umupeogu yũ tauro Goãmũ turari mera ii ĩhmugũcumi.

¹³ Eropigũ yũre umupeorãre erã yũ waĩ mera serẽropẽ ta iigũra. Eropa iigũ yũ Pagũ ĩgũ turarĩre ii ĩhmugũca.

¹⁴ Yũre umupeorã mũa arĩcũ mũa serẽropẽ ta iigũra, arĩmi Jesu.

Espíritu Santore mũaare obeogũra, arĩ wereñumi Jesu

¹⁵ Eropa arĩtuha guare õpa arĩnemomi:

—Yũre mũa mahirã, yũ dorerire iipehorãca.

¹⁶ Yũ Pagũ serẽgũra. Yũ Eropa serẽcũ yũ Pagũpũ gajigũre mũaare itamubure mũaare obeogũcumi. Eropigũ ĩgũ mũaare itamubupũ ɯturĩ nũcũ mũa mera árĩgũcumi.

17 Īḡu diaye majare wereḡu Espíritu Santo āhrimi. I yeba majarāpu Espíritu Santore masibeama. Eropirā ĭḡure opamasibeama. Īḡu ta m̄ua mera árĭḡucumi. Eropirā m̄ua ĭḡure oparāca. Eropirā ĭḡure masia m̄ua.

18 M̄uare cóās̄ome yuh̄u. M̄ua mera árĭbu dujariḡuca yuh̄u daja.

19 Merogā duhyaa yu waboro. Yu wara puh̄ru i yeba majarā yure umupeobirininrā yure dipaturi ĭasome. M̄uapu yure ĭarāca. Yu ojocaricũ m̄ua s̄a um̄uri n̄uc̄u Goām̄u mera ojocarirāca.

20 Irin̄u yu dujariburin̄ure yuh̄u, yu Paḡu mera yujuḡu ta yu árĭcũ masirāca m̄ua. Eropirā yu mera m̄ua árĭcũ m̄ua mera yu árĭcũ s̄are masirāca m̄ua.

21 Yu dorerire iiḡu yure mahiḡu ta āhrimi. Eropiḡu yure mahiḡure yu Paḡupu mahiḡucumi. Eropiḡu yu s̄a ĭḡure mahiḡuca. Eropiḡu ĭḡure yure ōaro masicũ iiḡuca, arĭmi Jesu ḡuare ĭḡu buherāre.

22 Ḡua mera majaḡu gajiḡu Juda waĩcuḡu árĭmi Iscariote árĭbiḡu. Ōpa arĭmi ĭḡu Jesure.

—Op̄u, ¿dohpa iiḡucuri m̄uh̄u ḡuare eropa arĭḡu? ¿I yeba majarāre m̄ure masicũ iibiḡu dohpa iiḡucuri m̄uh̄u ḡua dihtare m̄ure masicũ iiḡu? arĭ serēpimi Juda.

23 Īḡu eroparĭcũ Jesu yuhrimi:

—Yure mahirā yu dorerire ōaro iima. Erā eropa iicũ yu Paḡupu erāre mahiḡucumi. Eropirā erā mera árĭrā árĭrāca ḡua.

24 Yure mahibiḡu yu dorerire iibeami. Eropero yu wereri m̄ua peerapu yu wereniḡuri árĭbeaa.

Yüre obeodigu ya wereniguiripu āhraa. Īgu yu Pagu ta āhrimi.

²⁵ Mũa mera árĩnigu ire mũare wereniguigu iiaa.

²⁶ Pũhrũ yu serēcũ yu Pagu Espĩritu Santore obeogucumi mũare. Eropigu Espĩritu Santopũ mũare itamubu árĩgu, mũare buhepehogucumi ĩgu. Eropigu mũare yu wererare guñacũ iigucumi ĩgu.

²⁷ Mũaare õaro árĩcũ iiguca yũhũ. Yũhũ õaro árĩdiro dopa ta õaro árĩcũ iiguca mũare. I yeba majarã erã iidiro dopa iisome yũhũ. Yu tamera diaye õaro árĩcũ iiguca mũare. Bujawere wũaro guñaricũbiricãque mũa. Eropirã gũibiricãque mũa.

²⁸ “Yũhũ waguca. Eropigu mũa mera árĩbu dujariguca daja,” mũare yu eropa arĩ werecũ peetuhabu mũa. Irire masirã árĩrã mucubiriboaya mũa. Yüre mũa diaye mahinirã árĩrã mucubiriboaya mũa. Yu Pagupũ yu tauro turami. Eropirã ĩgu pohrogue yu waborore mũa masira pũhrũ yüre mahirã mucubiriboaya mũa.

²⁹ Yüre mũa umupeoburire yu waborore wereyugu iiaa mũare.

³⁰ “I yeba majarã opũ watĩ doregu iimi dohpaguere. Eropigu ĩgu eropa dorecũ yũhũ mũa mera wereniguituboro merogã dũhyaa. Īgupũ yüre tarinũgamasibeamĩ.

³¹ Yüre yu Pagu ĩgu dorero dopa ta iiaa yũhũ. Eropa ta iiaa yũhũ yu Pagure yu mahirire i yeba majarã erã masiburire.

“Wahgãnũgajaque. Ina warã, arĩmi Jesu guare ĩgu buherãre.

15

Jesu iguiru iro dopa āhraa, arī wereñumi

¹ Eropigu werenigui queori mera buhegu guare ōpa arīmi Jesu:

—Yuhū iguiru diaye majaru iro dopa árīgu āhraa. Yū Pagupū iguirure īhadibugū iro dopa árīgu āhrimi.

² Iguirure iri dūpuri gamesuriro dopa ta mua yaharā yū mera āhraa. Dūca marirī dūpurire iguirure īhadibugū īgu peha cóāro dopa ta yū Pagū īgu gamerire iibirāre cohāmi. Dūcacūri dūpurire iguirure īhadibugū īgu amuro dopa ta yū Pagū īgu gamerire iirāre itamugucumi īgu “Yū gamerire iinemoporo,” arīgu.

³ Yū wererire peerā, “Diaye ta āhraa,” arāa mua. Eropigu yū Pagū mua ñeri iirare cóātuhami.

⁴ Yūre gamesuriro dopa ta yū mera majarā árīque mua. Eropigu mua mera árīgūca. Igu-iru dūpuri iguiru mera gamesuribiro árīro iri dūpuripū dūca mara. Eropa ta yū mera majarā ōaro árībirā sã yū Pagū gamerire iimasibea mua.

⁵ Iguirure iri dūpuri gamesuriro dopa ta mua yaharā yū mera āhraa. Iri dūpuri iguirure ōaro gamesuriro árīro dūcacua. Mua sã yūre ōaro gamesurirā yū Pagū gamerire iiaa. Yūre gamesurirā árībirā īgu gamerire iimasibea mua.

⁶ Ñeri dūpurire turira dūpure īgu cóāboro dopa ta yū mera majarā árībirāre yū Pagū cóāgucumi. Iri dūpuri ñaicū īha iguirure īhadibugū iri dūpurire aĩ gameneo peamegue

soecãgucumi. Eropa ta iigucumi Goãmũ yũ mera majarã árĩbirãre.

⁷ “Yũ mera majarã árĩrã yũ buherire cãdijibiriboca mũa. Eropa cãdijibirã mũa gameropẽ ta yũre serẽque. Eropigu mũa serẽropẽ ta ogura.

⁸ Yũ Pagũ gamerire mũa iirã árĩcũ ãarã, “Oã Jesu yarã ãhrima,” arĩ masirãcoma gajirã masa. Eropirã mũare ãarã yũ Pagure umupeorãcoma.

⁹ Yũ Pagũ ãgu yũre mahidiro dopa ta yũ sã mũare mahia. Eropirã yũ mahiri mera árĩque mũa.

¹⁰ Yũ Pagũ ãgu dorerire iiaa yũhũ. Eropigu ãgu mahigu árĩniguia yũhũ. Eropa ta mũa sã yũ dorerire iirã yũ mahirã árĩniguicãrãca mũa.

¹¹ “Ire mũare wereabu yũ mera mũa ãaro mucubiriborore. Eropirã turaro mucubirirãca mũa.

¹² Õpa dorea mũare: Mũare yũ mahidiro dopa ta mũa mera majarãre mũa sã mahique.

¹³ Yujugu masũ ãgu mera majagu yañe árĩborañe sĩrigũ ãgu mera majagure burigã mahiami gajirã mahidiro tauro.

¹⁴ Eropirã yũ dorerire iirã yũ mera majarã ãhraa mũa.

¹⁵ Diaye ta mũa yũ mera majarã gohra ãhraa. Mũa eropa árĩrã árĩcũ árĩpehrerire yũ iirare werea mũare. Pohro majagu ãgu opu iiburire masibeamĩ ãgu. Eropigu “Yũ pohro majarã bu árĩrã ãhraa mũa,” arĩbeaa mũare. Yũ Pagũ ãgu yũre wererare mũare werepehoabu. Eropa weregu “Yũ mera majarã ãhraa mũa,” mũare arãa dohpaguere.

16 Mũapũ yũre beyebiribũ. Yũpũ mũare beyebũ yũ Pagũ gamerire mũa iimorãre. Mũa eropa iicũ mũa eropa iiri ne yuju diaye gohra árĩsome. Mũa eropa iicũ yũre mũa umupeocũ yũ Pagũ mũa serẽropẽ ta mũare ogũcumĩ.

17 Ire mũare dorea yũhũ: Mũa basi game mahi umupeoque, arĩmi Jesu.

Jesure ĩgu yarã sãre i yeba majarã ĩhaturirire wereñumi Jesu

18 Eropigũ guare werenemomi daja:

—I yeba majarã mũare erã ĩhaturicũ ĩarã ire guñaque mũa: “Guare eropa ĩhaturiboro core Jesupũre ĩhaturinũgatuhamã erã,” arĩ guñaque.

19 I yeba majarã gohra mũa árĩcũ, erã mera majarãre erã mahidiro dopa ta mũa sãre mahi-boañuma erã. I yeba majarã mera mũa árĩnicũ mũare beyebũ. Eropirã dohpaguere i yeba majarã gohra árĩbeaa mũa. Mũa eropa árĩbircũ ĩarã i yeba majarã mũare ĩhaturima.

20 Mũa yaharã árĩrã “Yũ tauro árĩbeaa,” mũare yũ arĩrare guñaque mũa. Eropa yũ mera majarã árĩrã yũ ñero tariboro dopa ta ñero tarirãca mũa sã. Yũre ñero iinirã ta mũa sãre ñero iirãcoma. Yũ buherire yũhrinirã ta mũa buheri sãre yũhrirãcoma.

21 I yeba majarã yũre obeodigure masi-beama. Eropirã yũre umupeorã mũa árĩcũ ñero iirãcoma erã mũare.

22 “Erãre yũ buhegu aribircũ erã yũre gamebirira dipuwaja mariboaya. Dohpaguere erãre yũ buhera pũhrũ “Ñeri dipuwaja mara guare,” arĩmasibeama erã.

²³ Yure ìhaturigũ yũ Pagũ sãre ìhaturimi.

²⁴ Goãmũ turari mera gajirã erã ne iibirirare ii ìhmubũ. Eropiro erãre irire yũ ii ìhmubiricũ erã peebirira dipuwaja mariboaya. Goãmũ turari mera yũ ii ìhmurare erã ìara pũhrũ yure yũ Pagũ sãre ìhaturima erã.

²⁵ Eropa ìhaturirã Goãmũ yare erã gojarapũ matague ta erã arĩ gojadiro dopa ta iirã iima erã. Òpa arĩ gojañuma: “Erãre yũ ñero iibiriquerecũ ta yure ìhaturima erã,” arĩ gojañuma matague ta Goãmũ yare erã gojarapũgue, arĩmi Jesu.

²⁶ Eropigũ werenemomi daja:

—Yũ pũhrũgue mũare itamubu, yũ Pagũ mera árĩgũ mũare yũ obeobu Espíritu Santo ta ãhrimi. Ìgũ diaye majare weregũ ta ãhrimi. Eropigũ ìgũ arigũ yũ árĩricũrire weregũcumĩ mũare.

²⁷ Mũare yũ buhenũgacũgue mua sã yũ mera umuri nũcũ árĩbũ. Mua sã yũ árĩricũrire wererãca, arĩ weremi Jesu gũare.

16

¹ Eropa arĩtuha gũare òpa arĩ werenemomi:

—Pũhrũ yũ buherire yũ sãre mua cóãbiriburire òpa weregũra mũare.

² Mari buheri wirigue mua ñajadiacũ ñajadoresome mũare yaharã mua árĩri dipuwaja. Eropirã mũare gajisubu wejẽ “Goãmũ gamerire iirã iiaa,” arĩ pepirãcoma gajirã.

³ Yũ Pagũre, yũ sãre erã masibeama. Eropa masibirã mũare ñero iirãcoma erã.

⁴ Eropirã mũare erã ñero erã iicũ ìarã, “Èrã òpa iiboro core ta Jesu gũare weremũhtayutuhami,” arĩ guñarãca mua.

Mua eropa arĩ guñaburire dohpaguere ire weremũhtagu iiaa mũare, arĩ weremi Jesu.

Espíritu Santo ñgu iiburire wereñumi Jesu

Eropa arĩtuha õpa arĩ werenemomi:

—Neguere mua mera árĩgu ire mũare werebiribũ.

⁵ Dohpaguepure yũre obeodigu pohrogue wagũca. “¿Nohogue wagũcuri mũhũ?” arĩ ne yujugu yũre serẽpibeaa mua yũre.

⁶ Eropa serẽpibiriquererã ta yũ waborore mũare werecũ mua ñero sĩporãcua.

⁷ Mua ñero sĩporãcũquerecũ mũare õpa diaye ta werea: Yũ wara pũhrũ mũare õacãroca. Yũ umarogue wabiricũ mũare itamubupũ aribiribocumi. Eropa wagu eja mũare ñgũre obeogũca yũhũ.

⁸ Yũ eropa obeocũ ñgu arigũcumi. Eropa eragu i yeba majarãre ñerire iirã erã árĩcũ masicũ iigũcumi ñgu. Eropigu õaro árĩricũburire buhegũcumi ñgu. Eropigu Goãmũ ñgu dipuwaja moaborore weregũcumi masare itamubupũ.

⁹ Yũre umupeobirã ãhrima i yeba majarã. Eropigu itamubupũ masa erã ñero iiricũrĩre erãre masicũ iigũcumi.

¹⁰ Yũ Pagũ pohrogue wagũca. Yũ eropa wara pũhrũ masa yũre ñanisome. Eropigu itamubupũ arĩgu õaro árĩricũrĩ sãre buhegũcumi.

¹¹ I yeba majarã opũre watĩre Goãmũ dipuwaja moadoretuhami. Eropigu Goãmũ masare ñgu dipuwaja moaburi sãre weregũcumi itamubupũ.

12 “Wuaro āhraa muare yu wereburi. Yu eropa werenemodiaquerecũ ta ire yu werecũ dohparagã masisome mua.

13 Yu eropa werenemobiricũ Espíritu Santopu irire werenemogu arigucumi. Igu igu gamero muare weresome. Yu Pagu igu weredorerare muare weregucumi. Eropigu muare diaye majare werepehogucumi. Eropiro puhrugue waburire muare masicũ iigucumi igu.

14 Eropigu igu yare muare weregucumi. Eropa weregu yare umupeocũ iigucumi muare.

15 Árīpehreri yu Pagu ya sã yaha āhraa. Eropigu “Espíritu Santo yahare weregucumi,” arābu muare, arī weremi Jesu.

Bujawererã árīquererã ta puhru mucubirirāca mua, arī wereñumi Jesu

16 Eropa arītuha ōpa arī werenemomi guare daja:

—Bajamenuri yure ĩasome mua. Eropirã puhrugã ta daja mua yure ĩarāca, arīmi Jesu.

17 Igu eroparīcũ peerã, guapu bajamerāgã ōpa arī wereniguibu gua basi:

—“Bajamenuri yure ĩasome mua. Eropirã puhrugã ta daja mua yure ĩarāca,” arīgu ¿dohpa arīgu eropa arāri marire? Eropigu “Yu Pagu pohrogue waguca,” ¿dohpa arīronore eropa arāri igu?

18 “Bajamenuri puhru,” arīgu ¿dohpa arīgu eropa arāri igu? Igu wererare ōaro pee masi-beaa mari, arību gua basi.

19 Gua eropa arī wereniguicũ Jesu ĩgure gua serēpidiarire masigu guare ōpa arī weremi:

—“Bajamenuri yure ñasome mua. ¿Eropirã puhrugã ta yure ñarãca daja,” yu arĩrare serẽpidiari mua? ¿Irire yu arĩrare masibeari mua?

²⁰ Diaye muare arĩgu iiaa: Yuhu sĩricũ ñarã mua orerãca. Eropirã burigã bujawererãca. Yure umupeobirininĩrũ mucubirirãcoma. Muarũ bujawerenirã arĩquererã puhru mucubirirãca mua.

²¹ Ōpa ãhraa iri: Nomeo niji wahgũgo igo ñero tariburisubu ãhraa. Eropigo igo turaro bujaweremo. Eropa bujawerequerego, igo magugã dehyoacũ ñago mucubirimo. Eropigo igore pũrirare guñabeamo igo pare.

²² Eropa ta mua dohpaguere bujawererãca. Puhru mua yure ñarãca daja. Eropirã mua turaro mucubirirãca. Mua Eropa mucubiririre gajirã muare bujawerecũ iimasisome.

²³ “Irinu yure mua ñarinure yure serẽpisome mua. Yu Paguru mua serẽrire ogucumi. Diaye ta muare arĩgu iiaa. Yure mua umupeocũ ñagu yu Pagure yu waĩ mera mua serẽrire ĩgu muare ogucumi.

²⁴ Yu ōpa waboro core mua yure waĩpeo Goãmure serẽnibiribu mua. Dohpaguere yure waĩpeo Goãmure serẽque. Mua Eropa serẽcũ muare ĩgu ogucumi mua turaro mucubiriburire, arĩmi Jesu guare.

Ñerãre Jesu ĩgu tarinugarire wereñumi ĩgu buherãre

²⁵ Eropa arĩtuha ōpa arĩnemomi:

—Werenigui queori mera muare weremurabu. Eropa werequeregu ta puhru muare werenigui queori mera weresome pare yuhu. Yu Pagupure mua oaro peeboro dopa weregura muare.

26 Irinure mua ya ariburire muare serēbasasome yuhu. Yure umupeorã yaha waĩ mera mua basi igure serērãca.

27 Mua yure mahirã ahraa. Eopirã yu Pagu pohrogue yu aridigu arĩcũ “Diaye ta ahraa,” arãa mua. Eropa arĩrã mua arĩcũ ñagu, yure mahirã mua arĩcũ ñagu yu Pagu sã muare mahimi. Ñgu eropa mahicũ mua ñgure serērãca.

28 Yu Pagu pohro arĩdigu arĩgu i yebaguere aribu yuhu. Eopigu dohpaguere i yebague arĩdigu arĩgu yu Pagu pohrogue dujaguca daja, arĩmi Jesu.

29 Ñgu eroparĩcũ gua ñgu buherã opa arĩbu:

—Dohpague tamerare werenigui queori mariro wereniguigu oaro diaye wereniguigu iiaa muhu guare.

30 Muhu oaro masipehogu mu arĩcũ gua dohpague ta oaro masia. Eopirã gajirã mure buhemasibeamã. Eopirã irire gua dohpaguere oaro masia. Gua irire oaro masirã arĩrã Goãmu pohrogue mu aridigu arĩcũ “Diaye ta ahraa,” arãa, arĩbu gua Jesure.

31 Gua eroparĩcũ Jesu yuhrimi guare:

—Dohpaguere “Diaye ta ahraa,” ¿arĩri mua pare?

32 Puhruñari mua ya wirigue wasirirã yure cóãrãca mua. Mua eropa cóãquerecũ ta yu

Pagupɔ yɔ mera áhrimi. Eropigu yuhɔ yujugu ta árĩbeaa.

³³ Ire muare wereyubu yure mua guñaturari mera mua òaro árĩboro dopa. I yeba árĩrisubu Goãmure gamebirã pohrogue mua árĩcũ muare ñero iirãcoma erã. Erã eropa iiquerecũ ta guñaturaque mua. I yeba majarã erã ñero iirare tarinugagu áhraa yuhɔ. Eropirã yure guñatura mucubirique mua, arĩmi guare igu buherãre.

17

Jesu igu buherã ya árĩburire igu Pagure Goãmure serēbasañumi

¹ Eropa arĩ weretuha Jesu ɔmarogue ìhamuju òpa arĩ wereniguimi Goãmure igu Pagure:

—Ahɔ, dohpaguere mu werediro dopa ta yure erã ñero iiburisubu ejanijaro iiaa. Yure mu magure erã masare umupeocũ iique. Mu eropa iicũ masare mure umupeocũ iigura yɔ sã.

² Árĩpehrerã tauro opɔ apibɔ muhɔ yure. Eropigu mu yure onirãre mu mera eropa árĩniguicũ iiguca muhɔ.

³ Mu dihta Goãmu gohra áhraa. Yuhɔ Jesu-cristo mu obeodigu áhraa. Eropirã árĩpehrerã mure masirã, yɔ sãre masirã mari mera ɔmaroguere eropa árĩniguicãrãcoma, arĩmi.

⁴ Eropa arĩgu ta òpa arĩnemomi Goãmure:

—I yebaguere mu iidorerare iipehoabu yuhɔ. Eropa iigu masare mu turagu árĩrire ìhmuabu yuhɔ.

⁵ I yeba árĩboro core m̃u mera yu árĩcũ òaro turari opabũ. Eropigu dohpaguere m̃u árĩroque irire yu òaro turagu árĩrire ìhmuque.

⁶ “I yeba árĩrãre yure m̃u onirãre mure masicũ iiabũ. M̃u onirã m̃u yarã àhrama. Eropigu erãre ohabũ m̃uhũ yure. Eropirã m̃u dorerire iama erã.

⁷⁻⁸ Yure m̃u wererare erãre buheabũ. Yu buhecũ peerã yu buherire gahmeama erã. Eropirã diaye ta m̃u pohro aridigu yu árĩcũ masima erã. Eropirã m̃u obeodigu yu árĩcũ sãre “Diaye ta àhraa,” arĩ pepima erã.

⁹ “Erã ya árĩburi mure serẽgu iiaa. Gajirã ya árĩburipure serẽgu iibeaa yuhũ. Yure m̃u onirã m̃u yarã àhrama. Eropigu erã ya árĩburire serẽgu iiaa mure.

¹⁰ Erã árĩpehrerã m̃u yarã àhrama. Eropirã m̃u yarãpũ yaharã àhrama. Yure umupeorã yu turagu árĩrire ìhmuma erã masare.

¹¹ “Dohpaguere i yebaguere dujasome yuhũ. M̃u pohro wabu iiaa. Yu eropa waquerecũ ta dohpaguere yure m̃u onirã i yebaguere dujama. Ahũ, m̃uhũ òagu àhraa. Yure m̃u onirãre m̃u turari mera ìhadibuque. M̃u eropa dibucũ mari yujugu ta árĩdiro dopa ta yuju curu ta árĩrãcoma erã sã.

¹² Erã mera árĩgu m̃u turari mera erãre òaro ìhadibuabũ. Yujugu tamera peamegue wagucumi m̃u yare erã gojarapũ werediro dopa ta.

¹³ “Dohpaguere m̃u pohroque wabu iiaa. Eropigu i yeba i árĩpehrerire m̃u yarãre werea yu mera erã òaro mucubiriborore.

¹⁴ M̃ yare wereabu erāre. Erā yu iro dopa ta i yeba árīwajamorā árībeama. Eropirā i yeba majarāp̃u erāre ihaturima.

¹⁵ “I yeba árīrāre, yaharāre añaque,” arībeaa. Eropa arībiriq̃uereg̃u erāre ôaro íhadibuque watī ñerire iidoreri erāgue arīg̃u.

¹⁶ I yeba majag̃u árībeaa. Erā sã yu iro dopa ta i yeba árīwajamorā árībeama.

¹⁷ Yaharāre m̃ buheri mera ôarā árīcũ iique erāre. M̃ wererip̃u diaye ta āhraa.

¹⁸ I yebaguere yure m̃ obeodiro dopa ta yup̃u yaharāre m̃ yare buhedoreg̃u obeoa.

¹⁹ M̃ gamerire iibu árīg̃u, s̃ribu árīg̃u erā ya árīburire s̃ribu āhraa. Eropa s̃ribu āhraa yuh̃u yaharā sã m̃ gamerire diaye erā ôaro iiburire.

²⁰ “Yaharāre dohpague árīrā dihtare itamuque,” arī serēbeaa yuh̃u. Yaharā gajirāre erā buhera puh̃ru gajirā sã yure umupeorācoma. “Erā sãre itamuque,” arāa yuh̃u.

²¹ Yaharā árīpehrerā erā yuju curu árīboro dopa itamuque. Yuh̃u m̃ mera yujug̃u ta āhraa. Mari yujug̃u árīdiro dopa ta erā mari mera yuju curu ta árīporo. Yujuro mera ta árīporo m̃ obeodig̃u yu árīrire árīpehrerā masa “Diaye ta āhraa,” erā arīburire.

²² Yure m̃ ora turarire yaharāre ohab̃u. Iri turarire oparā yujug̃u ta mari árīdiro dopa ta erā sã yuju curu ta árīrācoma.

²³ Yuh̃u erā mera āhraa. Eropig̃u m̃uh̃u yu mera āhraa. Mari eropa árīrā árīcũ mari yarā diaye ta ôaro yuju curu ta árīrācoma. Yuju curu erā árīcũ íarā m̃ obeodig̃u yu árīrire i yeba majarā masirācoma. Eropirā yure m̃ mahidiro

dopa ta yaharã sãre m̃ mahirire masirãcoma m̃asa.

²⁴ “Ah̃, i yeba árĩboro core yure mahib̃ m̃uh̃. Eropa mahig̃ ỹ turag̃ árĩrire ìhmub̃ m̃uh̃. Eropig̃ yure m̃ onirã ỹ mera erã árĩcũ gahmea ỹ turag̃ árĩrire erã masiboro dopa.

²⁵ Ah̃, m̃uh̃ òag̃ ãhraa. I yeba majarã ñerã m̃ure masibeama. Ỹp̃ m̃ure masia. Eropirã ỹuh̃ m̃ obeodig̃ árĩcũ masima yaharãp̃.

²⁶ M̃ure erãre masicũ iiab̃. P̃h̃r̃ sãre m̃ure erãre masicũ iig̃uca yure m̃ mahidiro dopa ta gajirãre erã mahiburire. Eropig̃ yaharã mera árĩg̃uca, arĩmi Jesu mari Pagure.

18

Jesure peresu iĩñuma

Mt 26.47-56; Mr 14.43-50; Lc 22.47-53

¹ Ìg̃u eropa arĩra p̃h̃r̃ Jesu gua sã ìg̃u buherã Cedrón waĩc̃uriyare taribuja, Olivo waĩc̃uri gorogue ejab̃.

² Bajasuburi iri gorogue Jesu mera gua gamenerem̃rib̃. Eropig̃ Juda Jesure ìhaturirãre wiabu iri gorore masími.

³ Eropa masig̃ pe curu surara mera aridi árĩmi ìg̃u. Yuju curu surara gohra árĩma. Gaji curu surara Goãm̃ wihire corerã árĩma. Pahia oparã, fariseo masa erã obeonirã árĩma surara. Eropa arirã sihãri dipurure, eropárĩcũ yuc̃u mojócoma erã.

⁴ Iri gorogue gua pohrogue erã erara p̃h̃r̃ Jesu ìg̃u ñero tariborore masig̃, erãre bocatĩri serēpimi:

—¿Noare amarã iiri m̃ua? arĩmi Jesu.

⁵ —Jesu Nazare majagure ahmaa, arĩ yuhrima erã.

—Īgu ta āhraa yuhũ, arĩmi Jesu.

Judapũ Jesure ñeadoregũ erã mera árĩmi.

⁶ Eropirã Jesu “Īgu ta āhraa yuhũ,” ĩgu arĩcũ erãpũ Ʃca wa yebague dusirimaagã mehmereja wama.

⁷ Erã eropa wacũ ĩagu dipaturi serẽpimi Jesu:

—¿Noare amarã iiri mũa? arĩmi.

—Jesu Nazare majagure amarã iiaa gua, arĩ yuhrima erã daja.

⁸ —Īgu ta āhraa, arĩrabugũ yuhũ mũaare. Eropirã yure ñearã oãre yũ mera majarãre peresu iibiricãque, arĩmi Jesu.

⁹ Eropa guare mahigu ne yujugure dederecũ iibirimi. Eropa iigu ero core Goãmure ĩgu arĩdiro dopa ta iigu iimi ĩgu. “Yure mũ onirãre ne yujugure dedeobiribũ,” ĩgu arĩdiro dopa ta iigu iimi Jesu.

¹⁰ Eropi Simo Pedro matamijire opagu irimi-jire tuãwea aĩ, pahia opũ pohro majure Malco waĩcugure ĩgu gamirore pacoro medijucãmi. Diayepũ maja gamirore pacoro medijucãmi

¹¹ Īgu eropa pacorocũ ĩagu Jesu õpa arĩmi:

—Mũ matamijire dibuque. Yũ Pagũ ĩgu yure ñero taridorero dopa ta ñero tarigura, arĩmi Jesu Pedore.

Pahia tauro opũ pohrogue Jesure aĩgãñuma erã

Mt 26.57-58; Mr 14.53-54; Lc 22.54

¹² Īgu eropa arĩtuhacũ ta surara, erã opũ mera, Goãmũ wihire corerã surara sã Jesure ñeha ĩgure dirima.

13 Dirituha Ana waĩcugu pohrogue aĩgãmũhtama erã. Anapu Caifa mũñecu árĩmi. Caifapu iri bojorire pahia tauro opu árĩmi.

14 “Judio masa ya árĩburire yujugu masu sĩricũ õhaa,” arĩdigu árĩmi ĩgu Caifapu.

—*Jesure masibea, arĩñumi Pedro*

Mt 26.69-70; Mr 14.66-68; Lc 22.55-57

15 Eropigu yuhu Simo Pedro mera Jesure yoañarirogue nũrũsiabu. Yupu pahia opu ĩgu ĩha masigu árĩbu. Eropigu Jesu puhru, opu árĩri wihi árĩri sãriro pohecague ñajaa wabu.

16 Pedropu disiporo dujanugajami. Eropigu maji wiriri disiporo coregore serẽbasabu Pedrore aĩ ñajabu. Yu eropa serẽpiñacũ igo Pedrore ñajaridoremo. Igo ñajaridorera puhru yuhu Pedrore aĩ ñajaa wabu.

17 Yu eropa aĩ ñajajacũ ĩago disiporo coregopu Pedrore serẽpimo:

—¿Jesu buherã mera majagu árĩbeari mũhu? arĩmo igo Pedrore.

—Árĩbeaa yuhu, arĩ yuhrimi Pedropu.

18 Ero core ero majarã pohro majarã, surara mera erã sõhmaburi peamere dihunirã árĩma. Yũsaa árĩbu. Eropirã erã iri peame turo sõhma niguima. Erã sõhmacũ ĩagu Pedro sã sõhmagu wami.

Pahia tauro opu Jesure serẽpi ĩañumi

Mt 26.59-66; Mr 14.55-64; Lc 22.66-71

19 Eropi pahia tauro opu árĩgu Jesu ĩgu buherire, gu ĩgu buherã sãre serẽpi ĩapu Jesure.

20 ĩgu eropa arĩ serẽpicũ Jesupu yuhripu ĩgure:

—Árĩpehreräre buhegu erã core niguibũ. Eropa buhegu mari buheri wiri Goãmu wihi sãre masa gamenererogue eropa buhe niguicãbũ. Duhrinijagu ne buhebirabũ yũhũ.

²¹ ¿Duhpigũ yũre serẽpiri mũhũ? Serẽpidiagu yũre peeniräre serẽpique. Yũ wererare erã masima, arĩ yũhripũ Jesu.

²² Ĩgu eroparĩcũ surarapũ ero niguidigu ĩgu mojoto mera Jesure papũ.

—Eropa arĩbiricãque pahia tauro opũre, arĩpũ surara Jesure.

²³ Ĩgu eroparĩcũ Jesu õpa arĩpũ:

—Ñero arĩ yũ wereniguirare wereque yũre. ¿Diaye majare yũ mũare werequerecũ duhpigu pari mũhũ yũre? arĩpũ Jesu surarare.

²⁴ Pũhrũ Ana Jesure erã diridigure Caifa pahia tauro opũ pohrogue obeopũ.

—*Jesure masibea, dipaturi arĩñumi Pedro*

Mt 26.71-75; Mr 14.69-72; Lc 22.58-62

²⁵ Eropi Simo Pedro peame tũro sũhma niguigu iimi. Eropa ĩgu sũhma niguicũ ĩarã ero majarã ĩgũre serẽpima.

—¿Mũ sã Jesu buherã mera majagu árĩbeari? arĩ serẽpima erã Pedore.

—Árĩbeaa yũhũ, arĩ yũhrimi Pedro.

²⁶ Eropigu pahia tauro opũ pohro majagupũ Pedro ĩgu gamiro pacorodigu acaweregupũ Pedore serẽpimi:

—¿Jesure erã ñearasubu yũ árĩcũ mũ sã erã mera árĩsabũ? arĩ serẽpimi ĩgu Pedore.

²⁷ —Yũhũ ĩgu mera árĩbirabũ, arĩ yũhrimi Pedro. Ĩgu eroparĩcũ ta cãreña weregu carimi.

Jesure Pilato serēpiñumi

Mt 27.1-2, 11-14; Mr 15.1-5; Lc 23.1-5

²⁸ Ñamiñarigã árĩcũ Caifa ya wihigue árĩnirã Jesure aĩ wiria, iri maca majarã opu Pilato ya wihigue aĩgã wama erã. Eropa waquerrerã ĩgu ya wihiguere ñajabirima. Pascua árĩcũ erã bamorã árĩrã ōpa arĩma: “Judio masu árĩbeamu Pilato. Eropirã mari i wihigue judio masu árĩbigu árĩri wihire ñajarã, mari dorerire tarinugarãca. Eropirã mari ñajacũ ĩarã ñerã dopa ĩabocoma marire. Eropirã marire bosenu barire marire badorebiribocoma,” arĩma. Eropa arĩrã opu ya wihire ñajabirima Jesure aĩgãnirãpu.

²⁹ Erã ñajabiricũ ĩagu Pilato erã pohroque wihi disiporogue wiriranugaja, erãre serēpimi:

—¿Nehenore ĩre weresãdiari mua? arĩ serēpimi Pilato erãre.

³⁰ —Ihĩ ōagu ĩgu árĩcũ mure ĩgure obiriboaya. Ñegu āhrimi ĩgu, arĩ yuhrima erã.

³¹ Erã eroparĩcũ Pilato ōpa arĩmi:

—Mua basi ĩgure aĩaque. Eropirã mua ya doreri arĩro dopa ta ĩgure dipuwaja moaque, arĩmi Pilato erãre.

—Gua judio masapu masure wejēdoremasibea, arĩma erã Pilatore. Eropa arĩrã Jesure wejēdoremorã iima.

³² Erã eropa wejēdorecũ Jesupu crusague ĩgu sĩriborore ero core ĩgu werediro dopa ta eropa wabu.

³³ Erã eropa arĩra puhru Pilatopu wihigue maji ñaja, Jesure sihubeo ĩgure serēpipu:

—¿Judio masa erã opu ta āhriri muhu? arĩ serēpipu.

34 Jesu yuhripu ñgure.

—¿Mũ guñaro yũre eropa arĩ serẽpiri mũhu? ¿O gajirã mũre erã wererare peenijagu yũre serẽpigũ iiri mũhu? arĩpu Jesu Pilatore.

35 —Judio masũ árĩbeaa yũhũ. Mũ ya yeba majarã, pahia oparã sã, mũre wiama yũre. ¿Ñehenore ñero iiri mũhu erã eropa mũre dipuwaja moadiacũ? arĩpu Pilato.

36 —Yũ opũ árĩri i yeba maja árĩbeaa. Yũhũ i yeba majarã opũ árĩcũ, yaharã yũre ita-muboñuma judio masare ñeadorebirã. Yũ opũ árĩri i yeba maja árĩbeaa, arĩpu Jesu Pilatore.

37 —¿Eropigu opũ ãhraa arĩri mũhu eropa arĩgu? arĩpu Pilato.

—Mũ arĩro dopa ta opũ ta ãhraa. Masa opũ árĩbu masa dehyoabu yũhũ. Eropigu i yebague arĩgu erã opũ árĩbu arĩbũ. Diaye majare weregu arĩbũ. Árĩpehrerã diaye árĩrire peediarã yũ wererire peema, arĩpu Jesu.

38 —¿Ñeheno ãhriri diaye árĩri? arĩpu Pilato.

Judio masa Jesure wejẽdoreñuma

Mt 27.15-31; Mr 15.6-20; Lc 23.13-25

Eropa arĩtuha Pilato judio masa pohro maji dujaa wa erãre weremi:

—Ĩre ne gajino dipuwaja mara.

39 Bojori nũcũ Pascuanũ árĩcũ yujugu peresu árĩgure mũa wiudorea. ¿Eropigu ĩre Jesure ta mũa opũ árĩbupũre mũare wiubasacuri yũhũ? arĩmi Pilato judio masare.

40 Ĩgu eroparĩcũ peerã erã judio masa õpa arĩ gaguĩnguima:

—Īgure wiubiricãque. Barrabápure guare wiubasaque, arĩ gaguiniguima judio masa Pilatore. Barrabápũ yajaricũgũ árĩdigũ árĩpũ.

19

¹ Erã eropa arĩ gaguiniguira pũhrũ Pilato Jesure tãradorepũ. Eropirã ĩgũ yarã surarapũ ĩgure tãrañorã.

² Tãratuha pora bero iituha, Jesure ĩgũ dipuru weca duhpeoñorã. Duhpeotuha, oparã ya suhrirore ĩgure sãñorã.

³ Eropirã ĩgũ pohro nũgaja õpa arĩñorã erã õpa arĩ wereyarã:

—Õaro árĩporo. Judio masa opũ õaro árĩporo, arĩ wereya erã mojotori mera ĩgure pañorã.

⁴ Eropigũ Pilato dipaturi waha, judio masare weremi:

—Peeque mũa. Īre ñeri dipuwaja mara. Eropigũ irire mũa masiburire ĩgure mũa pohro aĩgãribu iiaa, arĩmi Pilato.

⁵ ĩgũ eropa arĩra pũhrũ Jesu pora berore peyadigũ, oparã ya suhrironore sañadigũ wi-higue árĩdigũ wiririmi. ĩgũ wiriricũ Pilato õpa arĩmi:

—Īaque. Ihĩ ta ãhrimi ĩgũ, arĩmi Pilato.

⁶ ĩgũ eropa arĩtuhacũ peerã pahia oparã, surara Goãmũ wihi ĩhadibu corerã sã Jesure ĩarã gaguiniguima:

—Crusague wejẽque ĩgure. Crusague pabia wejẽque ĩgure, arĩ gaguiniguima erã.

—Īgure ne ñeri dipuwaja mara. Eropirã mua basi ta ĩgure aĩgãque. Eropirã mua basi ta ĩgure crusague pabia wejẽque, arĩmi Pilato erãre.

⁷ —Īgu, ĩgu basi “Goãmu magu ãhraa,” arĩmurami. Īgu eropa arĩra waja gua doreripu ĩgure wejẽdorea, arĩma erã Pilatore.

⁸ Erã eroparĩcũ peegu ucataria Pilatopu.

⁹ Eropigu dipaturi ĩgu wihigue Jesure aĩ ma-jiñajagu Jesure serẽpipu daja:

—¿Nohogue majagu ãhriri muhu? arĩpu Pilato Jesure.

Īgu eropa arĩ serẽpiquerecũ ta Jesu ĩgure ne yuhribiripu:

¹⁰ Īgu yuhribiricũ ĩagu Pilato ĩgure serẽpinemopu:

—¿Yure yuhribeari muhu? Yuhu mure peresu árĩgure wiumasia. Eropigu mure crusague pabia wejẽdoremasia yuhu. ¿Irire masibeari muhu? arĩpu Pilato Jesure.

¹¹ Īgu eroparĩcũ Jesu yuhripu daja:

—Goãmu mure dorebiricũ ne iimasibiriboaya muhu. Eropigu yure ĩhaturirãre wiadigupu mu tauro ñero dipuwajacugucumi, arĩpu Jesu Pilatore.

¹² Īgu eroparĩcũ peegu Pilatopu ĩgure wiudiaripu. Īgu eropa wiudiaquerecũ ta dipaturi judio masapu gaguiniguima:

—Jesu “Opu ãhraa,” arĩgu mari tauro opu árĩgure Roma majagure ĩhaturigu iimi ĩgu. Eropigu ĩgure wiugu mu sã mari tauro opu árĩgure ĩhaturigu ãhraa, arĩ gaguiniguima judio masa Pilatore.

¹³ Erã eroparĩcũ peegu Jesure wihigue árĩgure aĩ wiriri, ĩgu dipuwaja moadoregu ĩgu doari pẽro doajami Pilatopũ. ĩgu dipuwaja moadorero judio masa ya mera gabata waĩcũro empedrado waĩcũbũ.

¹⁴ Irinũ Pascuanũ bosenu árĩcũ gua baburi gua amurinũ árĩbũ. Irisubu goeri boje core árĩbũ. Doajatuha Pilato masare õpa arĩ weremi:

—Ihĩ ta āhrimi mũa opũ, arĩmi ĩgu.

¹⁵ ĩgu eroparĩcũ peerã judio masa gaguinigu-ima daja:

—Sĩriporo ĩgu. Sĩriporo ĩgu. Crusague pabia wejẽque ĩgure, arĩ gaguiniguima erã.

—¿Mũa opũ árĩquerecũ ta ĩgure crusague pabia wejẽdiari mũa? arĩmi Pilato erãre.

Ĩgu eroparĩcũ õpa arĩ yũhrima pahia oparã:

—Mari árĩpehrerã tauro opũ Roma majagu āhrimi. Gajigu opũ marimi marire, arĩ yũhrima pahia oparã.

¹⁶ Erã eropa arĩ wereniguira puhũ Pilato Jesure crusague pabia wejẽdoregu wiami erãre pare.

Jesure pabia wejẽñuma erã

Mt 27.32-44; Mr 15.21-32; Lc 23.26-43

Eropirã surara Jesure aĩ wiriama.

¹⁷ Erã aĩ wiriacũ Jesupũ crusare ĩgu basi aĩ coã, dipu pero waĩcũroque ejami. Gua judio masa ya mera Gólgota waĩcũbũ.

¹⁸ Eroque eja erã Jesure crusague pabiama. Eropirã gajirã perã sãre yujugu ĩgu diayepũ, gajigure ĩgu copũ pabiama erã. Eropigu Jesu erã deco árĩmi.

¹⁹ Pilato taboamijire goja, crusague Jesu weca pabia tuudorepũ ĩgu gojaramijire. Őpa arĩ gojara árĩbũ: “Ihĩ Jesu Nazare majagũ, judio masa tauro opũ āhrimi,” arĩ gojara árĩbũ irimijire.

²⁰ Irimijire gojagũ judio masa ya mera, Roma majarã ya mera, Griego ya mera gojara árĩbũ. Eropiro Jesure crusague erã pabianugudiro maca pohrogã árĩbũ. Eropirã bajarã judio masa Pilato ĩgu gojarare ĩha buhema.

²¹ Eropirã pahia oparã iri buhetuhaja ōpa arĩrã wañorã Pilatore:

—“Ihĩ judio masa opũ āhrimi,” arĩ gojabita. Gũa opũ árĩbeamĩ ĩgu. Eropigũ ōpa arĩ goja amuque mũhũ. Ihĩ “Judio masa opũ āhraa,” arĩ yujugũ ta ĩgu basi ta eropa arĩ pepigũ āhrimi, arĩ goja amuque, arĩñorã pahia oparã.

²² Pilatopũ yuhripũ erãre:

—Yũ gojarare ne yũ goja amusome, arĩpũ Pilato erãre.

²³ Jesure erã pabiara pũhrũ wapicũrã surarapũ Jesu suhri mũrare erã basi game gueremorã iima. Erã eropa guerediaquerecũ ta ĩgu suhriro yoari suhriro dohori marĩri suhriro árĩbũ. Iri suhriro suara suhriro árĩbũ.

²⁴ Iri suhriro eropa árĩcũ ĩarã ōpa arĩma erã basi:

—Iñe suhrirore yeguesiribiricãrã. Yujugũ dihta aĩporo. Eropirã iñe suhriro aĩbure masimorã deabirarã mari, arĩma erã basi.

Eropa deabirarã Goãmũ yare erã gojarapũ erã gojadiro dopa ta eropa iirã iima erã. “Yũ suhrirore erã basi guerema. Eropirã yaha suhrirore aĩbure masidiarã deabirama erã,” arĩ

gojañuma Goãmũ yare erã gojarapũgue. Erã gojadiro dopa ta eropa iima erã.

²⁵ Jesu pago, Jesu buamo María Cleofa marapo, María Magdalena mera Jesu crusa pohrogã ãha niguima.

²⁶ Eropigu ãgu pago, yũhũ ãgu mahigu sã ãgu pohrogã gua niguicũ ãagu ãgu pagore yure weremi:

—Dohpaguere ihĩ mũ magũ árĩbu ãhrimi, arĩmi Jesu ãgu pagore.

²⁷ Eropa arĩtuha yure õpa arĩ weremi ãgu:

—Dohpaguere igo mũ pago árĩbo ãhrimo, arĩmi Jesu yure.

Ãgu eropa arĩra pũhrũ Jesu pagore yaha wi-higue aĩ opamũribũ.

Jesu sĩria wañumi

Mt 27.45-56; Mr 15.33-41; Lc 23.44-49

²⁸ ãgu eropa arĩ werera pũhrũ árĩpehreri Goãmũ ãgure mohmedoregu ãgu apirare iipehogũ árĩgu masipũ Jesu. Eropa masigu Goãmũ yare erã gojarapũ iribojegue erã arĩ wereyudiro dopa ta õpa arĩmi Jesu:

—Ñemesibuca yure, arĩmi Jesu.

²⁹ Ero vino sũiri deco dicũri sorobu ero doabũ. Eropirã ero árĩrã Jesu eroparĩcũ pee mimi aĩri yũsure deco mera erã yosora yũsure yucũgu hisopo waĩcũdigũ ojogoro dirituma. Eropirã aĩ muju Jesu disiro sĩtuma.

³⁰ Iri decore Jesu mimituha õpa arĩmi:

—Iripẽta árĩca, arĩgu ta ãgu dipurure muhmu-siudija sĩria wami.

*Yujugu surara Jesu patore gubuye gohra
ñoseñumi ñoserimiji mera*

³¹ Irinu Pascua bosenu core árĩbu. Iri bosenu gua baburire gua amurinu árĩbu. Eropirã gajinu Sabado árĩcũ iri õari bosenu árĩcũ crusarigue sīrinirãre judio masa apidiabirima. Irinu ta bosenu gua judio masa bosenu wuari bosenu árĩro iibu. Eropirã erã sīrinirã mura irinu crusarigue árĩcũ gamebirima. Eropirã pabianirã murare erã ñigagu gõarire panuadorerã judio masa serẽñorã Pilatore erãre sīri purumujudorerã. Erã eropa iira pũhrũ erã dupũ murare aĩdijumorã iima.

³² Erã eropa dorecũ surarapũ crusari pohroque eja, yajaricũgure copũ árĩgu ñigagũre panuama: Gajipũ árĩgu sãre eropa ta iima erã.

³³ Eropa iiquererã Jesu ñigagũre panuabonirã ĩgu pohro eja ĩgu sīridigu árĩcũ ĩha panuabirima.

³⁴ Eropa panuabirã yujugu surara ĩgu patore gohra gubuye ĩgũre ñosemi. ĩgu eropa ñosecũ mata ĩgu di, deco mera wiribu.

³⁵ ĩgu eropa wacũ ĩabu yũhũ. Yũhũ ipũre gojagu diaye muare werea. Diaye yũ wereri árĩcũ masia yũhũ. Muare irire werea mua sã Jesure mua umupeoburire.

³⁶ Goãmu yare erã gojarapũ werediro dopa ta eropa wabũ. “Ĩgu gõare ne yuju gõare panuabirima,” erã arĩ gojadiro dopa ta Jesu ñigagu gõare ne yuju gõa panuabirima.

³⁷ Eropiro gajipũ sã Goãmu yare erã õpa arĩ gojayudiro dopa ta wabũ: “Ĩgũre erã ñosedigu

murure iārācoma erā,” erā arī gojadiro dopa ta gua Jesure erā ñosedigu murure iabũ.

*Jesu dũpũre masa gobegue yaañuma
Mt 27.57-61; Mr 15.42-47; Lc 23.50-56*

³⁸ Īgu sīrira pũhrũ José Arimatea majagu Jesu dũpũ murarore aĩ dijubu Pilatore serēgu ejapũ. Josėpũ gajirā judio masare gũigu, Jesure umupeogu ĩgu árĩrire werebiridigu árĩmi. Eropigu ĩgu dũpũ murarore ĩgu serēra pũhrũ Pilatopũ ĩgu dũpũre aĩdorepũ. Īgu aĩdorecũ José crusa pohro eraa Jesu dũpũ murarore aĩgā wami.

³⁹ Nicodemo sã ĩgu poresurire mohmorerare treinta kilo nũcũrire aĩgārimi Jesu dũpũ ĩgu amuburire. Yucũgu di pohga, mirra waĩcũri poresuri, yucũgu pohga mera árĩyoro ĩgu mohmorerã. Īgu Jesu mera ñami weretamudigu árĩmi.

⁴⁰ Eropirã erã perã Jesu dũpũ murarore aĩma. Judio masa sīrinirãre yaaro dopa ta ĩgu dũpũ murarore poresuri sũra pũhrũ suhri gasiri mera omama.

⁴¹ Crusague Jesure erã pabia wejėdiro pohro pohe árĩbũ. Iri pohegue masa gobe Ƴtãyegue erã seara gobe árĩbũ. Iri gobere ne yujugu sīridigũre cóanibirima dohpa.

⁴² Pascuanũ bosenu maja gua judio masa baburire amurinũ árĩbũ. Eropirã iri gobe pohrogã crusa árĩcũ ero apima erã Jesu dũpũ murarore.

20

*Jesu masa m̃ariañumi**Mt 28.1-10; Mr 16.1-8; Lc 24.1-12*

¹ Domingo ñamiñarigã árĩcũ, boyoboro coregã María Magdalena Jesu masa gobegue ejapo. Eroque ejago iri gobere erã biharayere gajipũ tunuguraye árĩcũ ñapo igo.

² Eropa ñadigo árĩgo gua pohroque omagãrimo igo. Simo Pedro mera perã árĩbũ gua. Eraa õpa arĩ weremo guare igo.

—Mari Opũ dupũ m̃urarore aĩcãñirã ãhrama. Eropirã ñgure erã apidiore mari masibea, arĩmo igo guare.

³ Igo eroparĩcũ peerã, yũhũ Pedro mera gua perã masa gobegue ñarã wabũ gua.

⁴ Eropa ñarã warã gua perã omagãabũ. Eropa omarã, yũhũ Pedore omatarigãgu masa gobegue ejam̃htabũ.

⁵ Eroque ejagu muhmumereja ñha acubũ iri gobere. Eropa ñha acugũ ñgure erã omara gasiro seyarore ñabũ. Eropigu iri gobere ñajabiribũ.

⁶ Yũ eropa ñara pũhrũque Simo Pedro sã eramĩ. Eraa masa gobegue ñajaa, ñgu dupũ m̃urarore erã omara suhri gasirire ñami ñgu.

⁷ Eropigu Jesu dipurure erã omara gasiro sãre ñami daja. Iri gasiro boje oyaro, yeguera gasiro árĩbũ.

⁸ Eropigu yũ sã masa gobegue ñajabũ. Jesu ñgu maricũ ñagu “Diaye ta Jesu masa m̃ariañumi,” arĩ pepibũ yũhũ.

⁹ Iri gobegue gua waboro core Goãmũ yare erã gojarapũ Cristo s̃riburire erã wererare õaro

gua masinibiribu. Dohpaguepure iri gobere yu
iara puhru, “Diaye ta Jesu masa muriañumi,” arĩ
pepibu yuhu.

¹⁰ Eropa ĩatuhajarã gua wihigue dujaa wabu.

Jesu María Magdalenare dehyoañumi

Mr 16.9-11

¹¹ Eropi masa gobe disiporo María niguigo ore
niguipo. Eropa orequerego ta muhmumereja igo
ĩhame acupo masa gobere.

¹² Eropa ĩhame acugo perã anyuare boreri
suhricurãre Jesu ĩgu oyadiro murarogue erã
doacũ ĩapo igo. Yujugu ĩgu dipuru oyadiro
doapu. Gajigu ĩgu guburi oyadiro doapu.

¹³ Erãre igo ĩacũ erãpu igore serẽpiñorã:

—Nomeo, ¿dohpa árĩronore orego iiri muhu?
arĩñorã erã.

—Yu Opu dupu murarore aĩcãñirã ãhrama.
Eropigo erã apidiore masibea yuhu, arĩpo igo.

¹⁴ Eropa arĩtuha, majinugaja nijago Jesure ero
niguigure ĩapo igo. Eropa ĩaquerego ta Jesure
ĩha masibiripo igo.

¹⁵ —Nomeo, ¿dohpa árĩrono orego iiri muhu?
¿Noare amago iiri muhu? arĩpu Jesu igore.

“Ihĩ i pohere ĩhadibugu ãhrimi,” arĩ pepiripo
igo Jesure. Eropa arĩ pepigo õpa arĩpo igo:

—Muhu ĩgu dupu murarore aĩdigu árĩgu
wereque mu apidiore yure. Mu werera puhru
aĩgora ĩgu dupu murarore, arĩpo igo ĩgure.

¹⁶ Igo Eropa arĩra puhru Jesu õpa arĩpu:

—María, arĩpu.

Ĩgu Eropa piyucũ peego, majiñabeo igo Hebreo
ya mera õpa arĩpo:

—Rabuni, arĩpo igo Jesure. Rabuni, erã ya mera arĩrã “Buhegu,” arĩma.

¹⁷ Jesu arĩpũ:

—Yũ Pagũ pohrogue mũrianibea dohpa yũhũ. Yũ eropa mũrianibiricũ yũre moh-piñabiricãque. Eropigo gajirã yaharã pohrogue waque. Erã pohrogue ejago õpa arĩ wereque: “Jesu õpa arĩdoremi mũare: ‘Yũ Pagũ pohrogue wabu iiaa. Mũa Pagũ sã àhrimi ìgu. Goãmũ pohrogue wabu iiaa. Mũa yagũ Goãmũ sã àhrimi ìgu,’ arãmi Jesu,” arĩ wereque erãre, arĩpũ Jesu Maríare.

¹⁸ Ìgu eropa arĩra pũhrũ María Magdalena guare Jesu buherã pohrogue eraa weremo guare:

—Mari Opũre ìabũ yũhũ, arĩ Jesu igore guare weredorerare weremo igo.

Jesu ìgu buherãre dehyoanũmi

Mt 28.16-20; Mr 16.14-18; Lc 24.36-49

¹⁹ Irinũ soorinũ ñamicague gua Jesu buherã gua acawererãre judio masare güirã, gua ya wihigue biha ñaja doabũ gua. Gua eropa doacũ Jesu gua watope dehyoanũgaja õpa arĩmi:

—¿Àhriri mũa? arĩmi.

²⁰ Eropa arĩtuha ìgu mojtore, ìgu patore sãre guare ìhmúmi. Eropirã gua ìgure gua opure masa muriadigure ìarã mucubiribũ.

²¹ Dipaturi Jesu guare õpa arĩmi daja:

—Õaro árĩque mũa. Yũ Pagũ ìgu yũre obeodiro dopa ta yũ sã mũare obeoa, arĩmi guare.

²² Eropa arĩtuhaja guare ĩgu purisãmi. Eropa purisãgu Espĩritu Santore gua ñeaburire ĩhmugu iimi. ĩhmutuhaja õpa arĩmi:

—Dohpaguere Espĩritu Santore ñeaque mua mua mera árĩbure.

²³ Masa erã ñeri dipuwajare bujawerecũ ĩarã, “Mua ñero iirare cohãa,” arĩmasia mua erãre. Erã bujawerebircũ ĩarã, “Mua ñeri iirare cóãbiribu,” arĩmasia mua, arĩmi Jesu guare ĩgu buherãre.

Jesure masa muriadigure Toma ĩañumi

²⁴ Jesu gua watope ĩgu dehyoacũ Toma suhruadigu erã arĩgu gua mera marimi irisubure.

²⁵ ĩgu eropa maricũ gua ĩgu mera majarã ĩgure werebu.

—Mari Opure gua ĩabu, arĩ wereribu gua ĩgure.

Gua eropa arĩ werequerecũ ta õpa arĩmi Toma:

—ĩgu mojotorire erã pabiara goberire ĩabigu iri goberire yu mujusĩru mera puñabigu “Diaye ta masa muriañumi,” ne arĩsome. Eropigu ĩgu patore gubuye árĩri gobere yu mojoto mera sĩ acubigu, “Diaye ta masa muriañumi,” ne arĩsome yuhũ ĩgure, arĩmi Toma.

²⁶ Yuju semana puhru gua ĩgu buherã gua ya wihigue árĩbu. Irisubure Toma gua mera árĩmi. Iri wihi bihara wihi árĩbu. Bihara wihi árĩquerecũ ta Jesu ñaja, gua watope dehyoanugaja õpa arĩmi:

—¿Ahriri mua? arĩmi.

²⁷ Eropa arĩtuha ĩgu Tomare weremi:

—Īaque yu mojotorire. Eropi mu mujusĩru mera yu mojotorire erã pabiara goberire puñaque. Eropigu mu mojoto mera yu patore gubuye árĩri gobere sĩ acuñaque. “Diaye árĩbeaa,” arĩbiricãque. “Diaye ta ãhraa,” arĩque muhũ, arĩmi Jesu Tomare.

²⁸ Īgu eropa arĩra puhru Toma yuhrimi:

—Muhũ yu Opu ãhraa. Muhũ yahagu Goãmu ãhraa, arĩmi Toma Jesure pare.

²⁹ —Yure mu ĩara puhru yure “Diaye ta ãhraa,” arãa. Gajirãpu yure ĩabiriquererã ta “Diaye ta ãhraa,” arĩ umupeorãcoma. Eropirã erã turaro mucubirirã árĩrãcoma, arĩmi Jesu Tomare.

Jesure masa erã masiburire ipũre gojañumi
Ñu

³⁰ Eropigu baja gaji sãre Goãmu ĩgu turari mera ii ĩhmũmi Jesu gua mera árĩgu. Irire ĩgu iirare ipũre gojapehobirabu yuhũ.

³¹ Eropa gojapehobiriqueregu ta ipũ yu wererare gojagu, “Jesu ta Cristo Goãmu ĩgu obeodigu ãhrimi. Īgu diaye ta Goãmu magu ãhrimi,” mua arĩ masiburire gojabu. Eropirã mua ĩgure umupeorã Goãmu mera mua eropa árĩniguiburire gojabu ipũre.

21

Jesu siete ĩgu buherãre dehyoañumi

¹ Puhru Tiberia waĩcũri ditaru tũro dipaturi guare ĩgu buherãre dehyoami daja. Guare dehyoagu õpa iimi ĩgu daja.

² Simo Pedro, Toma suhruadigu erã arĩgu, Natanae Galilea yeba árĩri maca Caná waĩcũri maca majagu, gua perã Zebedeo porã, gajirã sã perã gua oã nũcũ gamenere árĩbũ.

³ Gua eropa gamenerera pũhrũ Simo Pedro õpa arĩmi:

—Wai wejẽgu wagu iiaa, arĩmi ĩgu.

—Gua sã mũ mera warãra, arĩbũ gua ĩgure.

Eropa arĩtuha buha wabũ. Eropirã dohodiru mera wabũ. Iri ñamire gua õaro boyotahmuquererã ne yujugu waimũre wejẽbiricarabũ.

⁴ Boyodiji merejacũ Jesu imiporo ĩgu niguicũ ĩaribũ gua. Eropa ĩaquererã ĩgure ĩha masibiricarabũ gua.

⁵ Eropigu guare õpa arĩ serẽpimi:

—Ne, ¿wai wejẽari mũa? arĩmi Jesu.

—Ne wejẽbirabũ, arĩ yũhribũ gua.

⁶ —Dohodiru diayepũ wejẽdire mehyuque. Iripũ mehyurã wai wejẽrãca, arĩbeo niguimi guare. ĩgu eroparĩcũ peerã ĩgu arĩdiro dopa ta mehyubũ. Gua mehyura pũhrũ bajarã wai ñajama. Bajarã wai ñajacũ ĩarã wejẽdigure dohodirugue aĩsã turabiricarabũ gua.

⁷ Eropigu yũhũ Jesu ĩgu mahigu Pedroro werebũ:

—Mari Opũ ãhrimi sihĩ imiporo niguigu, arĩbũ Pedroro.

Yũ eroparĩcũ Jesu ĩgu árĩcũ masigu, Simo Pedro ĩgu suhrirore sañami. Wai wejẽbu ĩgu suhrirore tuweadigu árĩmi. ĩgu suhrirore sañatuha diague yuriñajami.

⁸ Eropirã gajirã gua buherã dohodirugue árĩbũ. Cien metro yoarõ diaguere payabũ gua. Eropirã

wejëdigure wai bajarã ñajadigure dohodiru mera taramajaabu gua.

⁹ Turogue tuhajarã pea niti dihta gose oyari peame weca waire ñgu mupunugupidigure ñabu gua. Panru sãre ñabu gua.

¹⁰ Gua eropa ñacũ Jesu guare õpa arĩmi:

—Dohparagã mua wejënirãre bajamerãgã aĩgãrique, arĩmi guare.

¹¹ Ñgu eroparĩcũ Simo Pedro Jesu mera árĩgu ñgu sã dohodirugue ñaja, wejëdire tara majaami imiporogue. Pagarã wai ñajanirã ciento cincuenta y tres wai árĩma. Bajarã wai ñajaquererã wejëdire ne yehguebirima.

¹² —Banirã arique, arĩmi Jesu guare.

—¿Noano ãhriri mũhu? arĩ serëpiñabiribu gua ñgure. Gua Opũ ñgu árĩcũ masibu gua.

¹³ Eropigu Jesu peame pohrogue eja, panre aĩ guare gueremi. Wai sãre gueremi.

¹⁴ Eropigu Jesu ñgu masa muriara pũhrũ imiporo dehyoagu uhresubu guare ñgu buherãre dehyoagu iimi.

Jesu Simo Pedro mera weretamuñumi

¹⁵ Gua bara pũhrũ Jesu Simo Pedore serëpimi:

—Simo, Jona magũ, ¿oãre mũ mahiro tauro yũre mahiri mũhu? arĩmi Simo Pedore.

—Opũ, mũre mahia yũhu. Mũre yũ mahirire masia mũhu, arĩ yũhrimi Simo Pedro.

Jesu arĩmi:

—Eropigu ovejagãre mari ejodiro dopa ta yaharãre buheque mũhu, arĩmi Jesu.

¹⁶ Eropa arĩtuha dipaturi ñgu Simo Pedore serëpimi daja:

—Simo, Jona magu, ¿yure mahiri mahu? arimi Jesu.

—Opu, mure mahia yahu. Mure yu mahicu masia mahu, arī yuhrimi Simo Pedro.

Jesu arimi daja:

—Ovejare ihadibugu ovejare igu oaro ihadiburo dopa ta yahare oaro ihadibuque, arimi Jesu Pedore.

¹⁷ Eropa arītuha dipaturi Simo Pedore serēpimi:

—Simo, Jona magu, ¿diaye ta yure mahiri mahu? arimi Jesu daja.

Uhresubu igu eropa serēpicu peegu Simo Pedro turaro bujoweremi.

—Opu, mahu masipehoa. Mure yu mahicu masia mahu, arimi Simo Pedro.

—Ovejare mari ejodiro dopa ta yahare buheque mahu.

¹⁸ Diaye mure arigu iiaa. Mahu mamu arigu mu suhire saña, mu gamerogue curimuribu mahu. Eropa arīdi arīqueregu ta puhru mahu bugu arīcu, mu mojotorire sibeocu gajigu mure mu suhire sāgucumi. Eropigu mu wadia-birogue mure aīgāgucumi, arimi Jesu Simo Pedore.

¹⁹ Eropa arigu Simo Pedro dohpa wa igu siriborore wereyugu iimi. Eropigu Simo Pedro sirigu Goāmure, “Ōagu, turagu āhraa,” masa erā arīcu igu iiborore wereyugu iimi. Eropigu Pedro mera weretamutuhagu opa arimi Jesu igure:

—Diaye ta yu buhediro dopa iique mahu, arimi Jesu Pedore.

Jesu ĩgu mahigu ipũre gojadigu árĩmi

²⁰ ĩgu eroparĩcũ Pedropu yũre Jesu ĩgu mahigure erãre yu nũrusiacũ ĩami ĩgu. Yũpu ĩgu ĩagupu ero core Jesu pohrogã badoagu ĩgure õpa arĩdigu árĩbu. “Opu, ĩmure ĩhaturirãre wiabupu nihino árĩcuri ĩgu?” arĩ Jesure serẽpidi árĩbu yũpu. Eropa yũre ĩagu Pedro serẽpimi Jesure:

²¹ —Opu, ĩihĩ Ñupu dohpa wagucuri? arĩ serẽpimi:

²² —Ire mure werebeaa. I yebaguere yu dujari-boro core ĩgure árĩniguicũ yu iicũ irire masibea maũu. Eropigu ĩgu waborore guñabita maũu. Diaye ta yu buhediro dopa iique mupu, arĩmi Jesu Pedore.

²³ Irire ĩgu yũre Ñure wererare peerã árĩpehrerã Jesu yarã weresiririma. Irire weresirirã õpa arĩrima erã: “Jesu ĩgu mahigu buhegu sĩrisome,” arĩ weresiririma yũre Jesu yarã erã basi. Erã eropa arĩquerecũ ta “Ĩgu sĩrisome,” arĩgu iibirimi Jesu. “I yebaguere yu dujaricũ ĩgure árĩniguicũ yu iicũ irire masibea mupu,” arĩmi Jesu Pedore.

²⁴ Jesu buhegu ire weregu, ipũre gojagu āhrra yuũu. Eropirã i wereri diaye ta árĩcũ masia mari.

²⁵ Baja gaji sãre Jesu iimi. ĩgu iirare mari gojapehocũ iripũri gojarapũri baja tariari pũri waboya. Eropiro iripũrire mari dibucũ siha-jabiriboya i yeba. Ujutaria waboya yu pepicũ. Iripẽta āhrra.

Desano

Desano: Goñmu Yare Wereripu New Testament

copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 19 Dec 2025 from source
files dated 1 May 2025

17771afc-c309-57fd-9ff3-2d5a0cd59ff1